





ԶՄԻՄԾԻՆ



AMC 190



ԼԳ
ՏԱՐԻ



ԷԶՄԻԱԾԻՆ



ՊԱՇՏՈՆԱԿԱՆ
ԱՄՍԱԳԻՐ
ՀԱՅՐԱՊԵՏԱԿԱՆ
ԱԹՈՌՈՅ
Ս. ԷԶՄԻԱԾՆԻ

ՅԻՆԱՐԿ

1976



ՀՐԱՄԱՆԱԻ

Տ. Տ. ՎԱԶԳԵՆԻ ԱՌԱՋՆՈՅ

ՎԵՀԱՓԱՌ ԵՒ ՍՐԲԱԶՆԱԳՈՑՆ ԿԱԹՈՂԻԿՈՍԻ
ԱՄԵՆԱՑՆ ՀԱՅՈՑ



ՀԱՅՐԱՊԵՏԱԿԱՆ ՔԱՐՈՉ ՓՐԿՉԻ ՀՐԱՇԱՓԱՌ ԵՎ
ՍՈՒՐԲ ԾՆՆԴՅԱՆ ՏՈՆԻ ԱՌԹԻՎ ՄԱՅՐ
ՏԱՃԱՐՈՒՄ
(1976 թ. հունվարի 6)

«Քրիստոս ծնաւ և յայտնեցաւ»:

Սիրելի հավատացյալներ,

Նոր տարվա այս լույս առավոտյան, Մենք՝ Հայրապետը ձեր, անհուն բերկրանքով բերում ենք ձեզ բոլորիդ մեծ ավետիսը աշխարհի Փրկչի՝ Հիսուս Քրիստոսի հրաշալի Ծննդյան:

Իբրև լուսմն օրինաց և մարգարեից, Որդին Աստուծո բարձունքներից իջալ երկիր և ծնալ որպես մարդ սուրբ Կույս Մարիամից՝ բոլոր մարդկանց, բոլոր ազգերի համար բաց անելու ճանապարհը ճշմարիտ կյանքի, ճանապարհը հոգիների փրկության, ճանապարհը սիրո և խաղաղության:

Ի՞նչ անիմանալի ու սքանչելի խորհուրդ: Ի՞նչ վեհ ու լուսապայծառ տեսիլք: Թեև ահա երկու հազար տարիներ եկել ու անցել են այդ անկրկնելի օրերից, սակայն մեծ հույսը հոգիների փրկության և հոյակապ տեսիլքը մի խաղաղ ու երջանիկ աշխարհի, այսօր էլ բոլոր մարդկային սրտերին խոսում են այնպես քաղցր, այնպես թարմ ու այնպես այծմեական, որ կարծես նոր, մեր օրերին է բացվել երկինքը, հենց մեզ համար, մեր հոգևած ու ծարավի հոգիներին բերելու պատգամներն այդ փրկարար, տեսիլքներն այդ երազ: Ահա թե ինչու հույժ երջանիկ ենք ձեզ տալու ավետիսը ավետիսների, բարի լուրը Քրիստոսի Ծննդյան և Աստվածահայտնության:

Եվ ինչքան խորհրդանշական է և իմաստալից, որ Քրիստոսի Ծնունդն ու Աստվածահայտնությունը ավետվում է աշխարհին համայն, նոր տարվա սեմին, ժամանակի մի նոր լուսաբացին, երբ իրար են հանդիպում անցյալն ու գալիքը: Անցյալն իր հետ բերած բոլոր իրադրժումներով, նվաճումներով ու զարգացումներով, բայց ավաղ նաև՝ իր դառնություններով, հուսախաբություններով ու մեղանշումներով:

Կանգնած այսօր, նոր տարվա սեմին, Մենք ողջունում ենք և օրհնում անցյալի լավն ու բարին, բայց և տխրում ու ցալում նույն անցյալի՝ աշխարհին բերած չարիքների և ողբերգությունների համար:

Կանգնած այսօր, նոր տարվա սեմին, մեր բոլորի տկար, բայց հուսացյալ հոգիները, վերստին զորացած ու ներշնչված սուրբ Ծննդյան շնորհներով ու երկնառաք պատգամներով, վերանորոգում են իրենց ուխտը երկրների հետ, այն պայծառ հավատքով, թե ճշմարիտ աղքատը բարյաց, ճշմարիտ ճանապարհը սիրո և խաղաղության, ճշմարիտ գրավականը մարդկանց ու ազգությունների երջանիկ համակեցության, սկիզբ է առնում այն գերագույն գիտակցությունից, թե բոլոր մարդիկ անխտիր եղբայրներ են հարազատ, իբրև զավակները միևնույն Արարիչ Հոր Աստուծո:

Կանգնած այսօր, նոր տարվա սեմին, աղոթենք և ամեն մեկս մեր միջոցներով, մեր դիրքերից գործենք անհոգնաբեկ վճուպկան եռանդով, որ գալիքը չպետք է վարակվի անցյալի մեղքերով, անցյալի խարխալումներով, որ արմատախիլ պետք է արվեն բոլոր տեսակի արմատները չարիքին, որոնք թունավորում են հոգիները մարդկանց, թունավորում հարաբերությունը միջազգային: Այդպիսի չարիքներ են մեր օրերին, մանավանդ ազգամիջյան ատելությունները, ընկերային անարդարությունները, ազգայնական եսամոլություններն ու ցեղապաշտական խտրականությունները, անսանձ սպառազինություններն ու ոմանց՝ արյուն թափելու հիվանդագին հոգեվիճակը, որ երբեմն անհավատալի չափերով զարգանում է աշխարհի տարբեր շրջաններում, անմեղ մարդկանց կյանքը խլող ահաբեկչական անմարդկային արարքներով: Կարելի չէ այլևս հաշտվել նման չարիքների, նման ողբերգությունների հետ: Տե՛ր Աստված ամենակարող, օգնության հասիր մեր աշխարհին, ավելի լույս տուր մարդկանց մտքերին և ավելի խաղաղություն նրանց հոգիներին, բոլորին անխտիր: Եվ թող աշխարհի բոլոր մարդասեր ու հառաջդիմատենչ մարդիկ ու ժողովուրդներ, մեկտեղեն իրենց գաղափարական-քարոշական բոլոր զենքերը, բոլոր հնարավորությունները, և անխորտակելի պատենչ կանգնեցնեն՝ ի պաշտպանություն արդարության, ազատության և խաղաղության սկզբունքների, սկզբունքներ, որոնք մեզ քրիստոնյաներիս համար հանդիսանում են կրոնական հավատքի և ավետարանական սիրո պատգամից ճառագայթող՝ ապրելու և գործելու հրամայականներ:

Կանգնած այսօր, նոր տարվա սեմին, Մեր գոհությունն ենք վերառաքում երկինք, որ մեր օրերի խոռվահույզ աշխարհում, մեր մայր երկիրը հաստատ ու աներեր կամքով գտնվում է ժողովուրդների խաղաղ գոյակցության գաղափարի պաշտպանության դիրքերի վրա, բազմազգ ազգությունների եղբայրական մի մեծ ընտանիքում, աշխարհի բոլոր խաղաղասեր ժողովուրդների՝ լայն զանգվածների կողքին:

Հայ ժողովրդի անցյալ դարերի պատմության ողբերգական փորձը առավել հրամայական է դարձնում մեզ համար ազգությունների բարեկամության և համերաշխության սկզբունքները: Ինչպե՞ս կարող ենք մոռացության տալ անլուր ողբերգությունները, որոնք բարեպաշտ, աշխատասեր հայ ժողովրդի կյանքի բաժինը եղան դարեր շարունակ և մանավանդ 1915-ի և 1918-ի սև տարիներին՝ իբրև հետևանք կայսերապաշտական եսամոլ շահերի և անխիղճ բռնակալների քաղաքականության: Մեր անցյալի ահարկու փորձություններից հետո, ինչքա՞ն մխիթարական է մայր երկրի բոլոր հայերիս և արտասահմանի Մեր զավակների համար, որ թեև աշխարհում կան այսօր էլ հրդեհված շրջաններ, կան տատապող ազգեր, սակայն մեր հայրենաբնակ ժողովուրդն իր վերածնած հայրենիքում ապրում է ու աշխատում խաղաղ ու անվտանգ պայմանների մեջ՝ ազատորեն զարգացնելով ու ավ-

բացնելով իր քաղաքական, տնտեսական և ազգային մշակութային կյանքի հիմքերը, տիրապես վստահ ու լավատես դեպի իր վաղվա օրը, դեպի իր է՛լ ավելի լուսավոր ապագան:


Մենք և մեր եկեղեցու բոլոր նվիրյալ սպասավորները Մեր սեպուն պարտքն ենք նկատում միշտ կողքին մնալ մեր ժողովրդին և միշտ նեցուկ՝ մեր երկրի մնայուն ու տևական շահերին, և միշտ աղոթող ու անձանձրույթ գործող՝ ի խնդիր խաղաղության ու ազգությունների համերաշխության դատի վերջնական հաղթանակին, որը հանդիսանալու է նաև հաղթանակը մարդացյալ Աստուծո սուրբ Ավետարանին, հաղթանակը մեր քրիստոնեական հավատքին:

Միրեցյալ հոգևոր զավակներ Մեր,

Կանգնած այսօր, նոր տարվա սեմին, շնորհավորում ենք ձեզ բոլորիդ և մաղթում, որ լույս շնորհներովը Քրիստոսի սուրբ Ծննդյան, լուսով լցվի ձեր կյանքն ու հոգին ամբողջ, և դուք դառնաք լուսո որդիներ, միշտ պատրաստ նվիրվելու շինարար աշխատանքի, բարի գործի, եկեղեցաշեն ու հայրենանվեր առաքելության: Դուք բոլորդ, որ ի Հայաստան և ի սփյուռս աշխարհի, ողջ մնացեք ու քաջառողջ, միշտ զորացյալ սուրբ Հոգով, միշտ ամուր կանգնած ձեր նախնյաց հավատքի վեմին վրա և հավետ օրհնյալ ի Տյառնե. ամեն:

Ծնորհավոր Նոր տարի և սուրբ Ծնունդ:





ԱՄԱՆՈՐԻ ԵՎ ՍՈՒՐԲ ԾՆՆԴՅԱՆ ԽՈՂԵՐ

Պատմության գիրկն անցավ ի մասնավորի մեր եկեղեցու և ժողովրդի համար նախ 1915 թվականի ողբերգական և ապա հաջորդ տարիների հերոսական ու պատմական իրադարձություններով հարուստ Ի դարի երեք քառորդը:

Նոր տարի է, 1976 թվականը:

Ի՞նչ գեղեցիկ ու սրտատուչ է Նոր տարվա լուսաբացին հայրենի հողի վրա, քո ժողովրդի ծոցում, հարազատներով շրջապատված, հոգիդ սիրով, թևավոր երազանքներով, գեղեցիկ նպատակների իրագործման վսեմ զգացումով լի, բարի լույսով բացված տեսնել պայծառ ու խաղաղ երկինքը հայոց:

Արդարև, իմաստալից է Ամանորը, որպես նոր ժամանակի տուն իր խոհերով, իր խորհրդով և իր լիառատ սեղաններով:

Քրիստոնեական մտածողության համար երբեք էլ պատահական չէ Ամանորի և սուրբ Ծննդյան տոների այս հաջորդականությունը, ժամանակի և կյանքի խորհուրդների այս ներքին աղերսը:

Քրիստոսի ծնունդը համայն մարդկության երջանկության, երբայրության համընդհանուր ներդաշնակությունն է, կյանքի հաղթական մի պահը, հավերժական ու անփոփոխ ժամանակի մեջ ապրված մի ակընթաց, աստեղային մի ժամ, Ավետարանի պատգամների լույսի ներքո:

Ամանորն ու սուրբ Ծնունդը միաժամանակ մարդկությանը հասցեագրված սրբազան մի կոչ է, նորոգված, պայծառակերպ-

ված, ավելի բարձր ու «առավել» կյանքով ապրելու և աշխատելու համար:

Լուսե գալիքի նկատմամբ հույսերի, երազանքների, հավատի մեջ աշխարհն է՛լ ավելի է գեղեցկանում, իսկ մարդը, իր հուզական, զգացական և իմացական աշխարհով, է՛լ ավելի է արիանում, գեղեցկանում և բյուրեղանում:

«Եվ ինչքա՛ն խորհրդանշական է և իմաստալից,—նշում է Հայոց Հայրապետը սույն թվականի հունվարի 6-ին Ծննդյան իր գեղեցիկ քարոզում,—որ Քրիստոսի Ծնունդն ու Աստվածահայտնությունը ավետվում են աշխարհին համայն, նոր տարվա սեմին, ժամանակի մի նոր լուսաբացին երբ իրար են համդիպում անցյալն ու գալիքը: Անցյալը իր հետ բերած բոլոր իրագործումներով, նվաճումներով ու զարգացումներով, բայց ավաղ նաև՝ իր դառնություններով, հուսախաբություններով ու մեղանշումներով»:

Հավատում ենք, որ կգա լույսի և մտքի համընդհանուր թագավորությունը, երբայրությունը տիեզերական, Վեհափառ Հայրապետի քարոզի պատկերավոր խոսքերով ասած՝ «Եջմարիտ աղբյուրը բարյաց, ճշմարիտ ճանապարհը սիրո և խաղաղության, ճշմարիտ գրավականը մարդկանց և ազգությունների երջանիկ համագործակցության, որը սկիզբ է առնում այն գերագույն գիտակցությունից, թե բոլոր մարդիկ անխափր եղբայրներ են հարազատ, իբրև զավակները միևնույն Արարիչ Հորն Աստուծո»:

Անցնող երկու հազար տարիների մարդկության կյանքի և քաղաքակրթության փորձը ցույց է տվել, որ Ավետարանի ճշմարտությունները միայն կարող են լուսավորել մարդկանց սրտերը, ազնվացնել ու խաղաղեցնել նրանց խոտվահույզ հոգիները:

«Ես եմ ճանապարհ, ճշմարտություն և կեանք»:

Այս խոհերով և այս սրբազան սպասումներով հայ ժողովուրդը և՛ մայր հայրենիքում, և՛ սփյուռքի տարածքի վրա, գիտակից և լուրջ պատասխանատվության զգացումով, սրտատուշ լավատեսությամբ ու անկոտրում հավատով, բացում է ահա մի անգամ ևս **նոր ժամանակների և նոր կյանքի** սպիտակ մատյանը, որը լցվելու է հայրենաակեր, մարդասիրական, ազնիվ ու ստեղծագործ աշխատանքներով:

1975 թվականը հայ եկեղեցու, Մայր Աթոռ Ս. Էջմիածնի և մեր վերածնված Հայոց աշխարհի համար ա՛յլ իմաստով եղավ աշխատանքով, ստեղծագործություններով հարուստ, պատմական մի տարի:

1975 թվականը եկեղեցական-ազգային տեսակետից հանդիսացավ հիշատակության արժանի բեղմնավոր մի տարի նրանով, որ հայ եկեղեցին, իր նվիրապետական Աթոռներով, թեմական կազմակերպություններով, Մայր Աթոռ Ս. Էջմիածնի օրհնությամբ, շարունակեց իր նախախնամական հոգևոր, եկեղեցական ու հայրենասիրական առաքելությունը մեր ժողովրդի կյանքում:

Պատմական նշանակություն ունեցան 1975 թվականի մայիս-հուլիս ամիսներին Հայոց Հայրապետի հովվապետական այցելությունները Ռումինիա, Բուլղարիա, Լոնդոն, Փարիզ, Ամման և Երուսաղեմ: Սույն այցելությունով Է՛լ ավելի ամրապնդվեցին նաև Մայր Աթոռի միջեկեղեցական հարաբերությունները, Էկումենիկ ոգով, բույր եկեղեցիների հետ:

Մայր Աթոռի օրհնությամբ սփյուռքում հայ եկեղեցին է հիմնական ու համազգային կենտրոնը, որին վստահված է նաև ազգային գոյատևումին հսկելու և նորահաս մեր նոր սերնդին քրիստոնեական ու հայրենասիրական դաստիարակություն ջանքերու պատասխանատու և պատվավոր առաքելությունը, մեր ժողովրդի գերագույն նպատակների, ազգային իդեալների իրականացման ճանապարհի վրա:

Սփյուռքի հայությունը հեռու է իր հայրենիքից, կորցրել է իր ոտքերի տակ հայրենի հողի կենսունակությունը և կառչած է հոգեկան ուժերին՝ եկեղեցի, դպրոց, մամուլ,

մշակույթ, հայ մնալու համար: Սփյուռքը հերոսական ջանքեր է ի գործ դնում այս բնագավառում:

Սփյուռքում այս տարի էլ ամեն տեղ տոնական ու անխափան հնչեցին հայ եկեղեցու զանգերը և բաց ու պայծառ մնացին մեր աղոթքի տաճարները, որպես հաղթանակները մեր ժողովրդի ոգեկան նվիրումի, հրաշագործ գործության և անկոտրում հավատքի: Բաց ու պայծառ մնացին նաև մեր կրթական օջախների դռները հայ մանուկների առաջ:

Հայ ժողովուրդն իր մայր հայրենիքում, իր հարազատ պետականության ապահով ու խաղաղ պայմաններում նոր տարին դիմավորում է արդար հպարտության, շինարար և ստեղծագործ աշխատանքի պայմաններում՝ հրաշքի՝ համազոր սխրագործություններ, նվաճումներ արձանագրելով իր հոգևոր նոր կյանքի կերտման բոլոր բնագավառներում:

1975 թվականը մայր հայրենիքի համար եղավ արդարորեն հաղթանակների, կառուցումների, խիզախումների հարուստ տարի: Բազում երազանքներ իրականություն դարձան հերոսական աշխատանքներով: Ծառք մտան մշակույթի ու գիտության նոր օջախներ, արդյունաբերական հսկաներ, գործարաններ, էլեկտրակայաններ: Առատացավ հայրենական, համայնական դաշտերի բերքատվությունը: Ամբարվեց հազար բերք ու բարիք: Այսպիսով մեր հայրենիքի հոգևոր, տնտեսական վերածնունդն խոստումնալից տարեգրության մեջ արձանագրվեց մի նոր ու փառավոր էջ:

Երջանիկ ու բախտավոր է այն ժողովուրդը, որը հավատքով, վստահությամբ և թևավոր երազանքներով է նայում նոր տարուն:

Ու մեր ժողովուրդը նոր տարվա սեմին լի է հզոր եռանդով՝ բացելով նոր հնարավորությունների գեղեցիկ ու խոստումնալից հեռանկարների դռները՝ հայրենասիրական ոգևորությամբ շարունակելու իր հաղթական երթը՝ ի բարօրություն հայրենյաց, հասնելու համար ստեղծագործական իր բոլոր ուժերի նոր վերելքին, հանուն իր հայրենիքի ապագա հզորության, խաղաղության ու բարօրության:

Անցնող տարվա ընթացքում հայ ժողովուրդը հայրենի հողի վրա, համաժողովրդական կազմակերպվածությամբ ու արժանավայել լրջությամբ նշեց հայ տառապանքի ու մեր հավաքական նահատակության 60-ամյակը և իր գլուխը խոնարհեց Ապրիլյան նահատակների անմոռաց հիշատակի առաջ:

Անցնող տարում հայ ժողովուրդը երախ-

տագիտության և հպարտության զգացումով նշեց նաև իր ազգային վերածննդյան 55-ամյակը՝ Հայաստանում սովետական կարգերի հաստատման պանծալի տարեդարձը, ինչպես նաև Հայրենական պատերազմում տարած Մեծ հաղթանակի 80-ամյակը:

1975 թվականի դեկտեմբերի 19-ին քաղաքամայր Երևանի ճարտարապետական կերպարը գեղեցկացնող ու հարստացնող քաջն Վարդան Մամիկոնյան գորավարի մոնումենտալ, պղնձակոփ հուշարձանը և Գառնիի 2000 տարվա հեթանոսական տաճարի վերականգնումը խորհրդանշեցին «մեր վերածնած ժողովրդի ապրելու կորովն ու հաստատակամությունը»:

Անցնող տարին եղավ նաև խաղաղության տարի, խոստումնալից ու հուսադրիչ հեռանկարներ բացվեցին աշխարհի խաղաղության, Եվրոպայի անվտանգության և համագործակցությանը նվիրված խորհրդակցությամբ, ինչպես նաև Հելսինկիում Եվրոպայի անվտանգության և համագործակցության խորհրդակցությունում ընդունված եզրափակիչ պատմական ակտով, ակտ, որը ոչ միայն Եվրոպայի մայրցամաքի ժողովուրդների խաղաղության, անվտանգության և լարվածության թուլացման ամուր ու հուսալի հիմքերն էր դնում, այլ նաև հանդիսանում էր կարևոր մի ավանդ՝ ընդհանուր խաղաղության ամրապնդման գործում ողջ աշխարհում:

Մայր Աթոռ Ս. Էջմիածինը, Հայոց աշխարհը և հայ ժողովուրդը 1976 թվականը դիմավորում են ստեղծագործական նոր եռանդով լեցուն, հայրենասիրական բարձր տրամադրությամբ և ավելի քան երբեք հզոր, միասնական հավատով լի ու կենսունակ կանգնել են լուսե գալիքի նկատմամբ պայծառ և խանդավառ հեռանկարների առաջ:

1976 թվականը մեր եկեղեցու և Մայր

Աթոռ Ս. Էջմիածնի համար կնշանակորվի հորեղանական, համազգային հանդիսություններով և իրադարձություններով:

1976-ի սեպտեմբերի 26-ին, կիրակի օրը, Վարազա Ս. Խաչի տոնին, կկատարվի Մայր տաճարում, ավանդական շքեղ հանդիսությամբ, սրբալույս մեռուցի օրհնություն:

Սեպտեմբերի 27-ին, երկուշաբթի օրը, Վեհաբանում, համազգային շուքով կկայանա հանդիսավոր նիստ՝ նվիրված Հայոց Հայրապետի զահակության քսանամյակին, հանդիսություններ, որոնց ներկա կլինեն մեր նվիրապետական Աթոռների, թեմերի պատգամավորներ, բազում ուխտավորներ և քույր եկեղեցիների բարձրաստիճան ներկայացուցիչներ:

Մայր Աթոռում կազմվել է այս առթիվ հորեղանական կենտրոնական հանձնաժողով:

«Ուրախ լեր, Ս. Էջմիածին», «Քն պարծի այսօր», ո՛վ Հայրապետ Հայոց, «Եկեղեցին Հայաստանեայց»:

Գալը բարի, Նոր տարի:

1976 թվականը թող լինի, հավերժական Ս. Էջմիածնի օրհնության ներքո, հայ եկեղեցու համար հոգևոր, եկեղեցական նոր վերազարթոնքի, ազգային միասնության և համերաշխության տարի:

Այս զգացումներով և խոհերով, հանուն Ամենայն Հայոց Հայրապետի, «Էջմիածին» ամսագրի խմբագրությունը ջերմորեն շնորհավորում է բովանդակ հայության Ամենորն ու Ս. Ծնունդը: Թող «լույս շնորհներով Քրիստոսի սուրբ Ծննդյան, լույսով լցվեն ձեր կյանքն ու հոգին ամբողջ և դուք դառնաք լուսոտ որդիներ, միշտ պատրաստ նվիրվելու շինարար աշխատանքի, բարի գործի, եկեղեցաշեն ու հայրենանվեր առաքելության», բարեմաղթում է Հայոց Հայրապետը:

Ամեն: Նղիցի, եղիցի և եղիցի:

Ա. Հ.



Քույր եկեղեցիներ



ԱՄԱՆՈՐԻ ԵՎ ՓՐԿՉԻ ՀՐԱՇԱՓԱՌԻ ԵՎ ՍՈՒՐԲ ԾՆՆԴՅԱՆ
ՏՈՆԵՐԻ ԱՌԹՎ ԱՄԵՆԱՅՆ ՀԱՅՈՑ ԾԱՅՐԱԳՈՒՅՆ
ՊԱՏՐԻԱՐԷ ԵՎ ԿԱԹՈՂԻԿՈՍ, ՆՈՐԻՆ ՍՈՒՐԲ ԾԾՈՒԹՅՈՒՆ
Տ. Տ. ՎԱԶԳԵՆ Ա ՀԱՅՐԱՊԵՏԻ ԵՎ ՔՈՒՅՐ ԵԿԵՂԵՑԻՆԵՐԻ
ՀՈԳԵՎՈՐ ՊԵՏԵՐԻ ՈՒ ԿՐՈՆԱԿԱՆ ԱՅԼ ՀԱՄԱՅՆՔՆԵՐԻ ԵՎ
ԿԱԶՄԱԿԵՐՊՈՒԹՅՈՒՆՆԵՐԻ ՂԵԿԱՎԱՐՆԵՐԻ ՄԻՋԵՎ
ՓՈԽԱՆԱԿՎԱԾ ՈՂՋՈՒՅՆԻ ՀԵՌԱԳՐԵՐՆ ՈՒ
ԳՐՈՒԹՅՈՒՆՆԵՐԸ

Հոռմեական կաթողիկ եկեղեցու Քահանայապետ, Նորին Սրբություն
ՊՈՂՈՍ Զ ՊԱՊԻՆ (Հոռմ),
Կոստանդնուպոլսի հունաց տիեզերական Պատրիարք, Նորին Սրբություն
ԴԵՄԵՏՐԻՈՍԻՆ (Ստամբուլ),
Մոսկվայի և համայն Ռուսաստանի Պատրիարք, Նորին Սրբություն
ՊԻՄԵՆԻՆ (Մոսկվա),
Ալեքսանդրիայի և համայն Աֆրիկայի հունաց ուղղափառ եկեղեցու
Պատրիարք, Նորին Սրբություն ՆԻԿՈՂԱՅՈՍ Զ-ԻՆ
(Ալեքսանդրիա),
Երուսաղեմի հունաց ուղղափառ եկեղեցու Պատրիարք, Նորին Սրբություն
ԲԵՆԵԴԻԿՏՈՍ Ա-ԻՆ (Երուսաղեմ),
Ղաթի ուղղափառ եկեղեցու Պատրիարք, Նորին Սրբություն
ԱՄԲԱ ՇԵՆՈՒԴԱ Գ-ԻՆ (Ալեքսանդրիա),
Անտիոքի և համայն Արևելքի հունաց ուղղափառ եկեղեցու Պատրիարք,
Նորին Սրբություն ԷԼԻԱՍ Դ-ԻՆ (Դամասկոս),
Համայն Եթովպիայի Պատրիարք, Նորին Սրբություն
ԱԲՈՒՆԱ ԹԵՈՖԻԼՈՍԻՆ (Ադիս-Աբեբա),
Հնդկաստանի և Արևելքի մալաբար եկեղեցու կաթողիկոս, Նորին
Սրբություն ԲԱՍԻԼԻՈՍ ՕԳԵՆ Ա-ԻՆ (Քոթայամ),

Համայն Վրաց Պատրիարք-կաթողիկոս, Նորին Սրբություն
ԳԱՎԻԹ Ե - ԻՆ (Թբիլիսի),
Ռումին օրթոդոքս եկեղեցու Պատրիարք, Նորին Սրբություն
ԺՈՒՍՏԻՆԻԱՆԻՆ (Բուխարեստ),
Բուլղար օրթոդոքս եկեղեցու Պատրիարք, Նորին Սրբություն
ՄԱՔՍԻՄԻՆ (Սոֆիա),
Անտիոքի և համայն Արևելքի մարումիտ Պատրիարք, Նորին Սրբություն
կարդինալ ՊՈԼ ՄԵՈՒՇԻՆ (Բեյրութ),
Անտիոքի և համայն Արևելքի հույն կաթոլիկ եկեղեցու Պատրիարք, Նորին
Սրբություն ՄԱՔՍԻՄՈՍ Ե ՀԱՔԻՄԻՆ (Դամասկոս),
Անտիոքի ասորի կաթոլիկ եկեղեցու Պատրիարք, Նորին Սրբություն
ԻԳՆԱՏԻՈՍ ԱՆՏՈՒԱՆ ՀԱՅԵԿ Բ - ԻՆ (Բեյրութ),
Քենթրբերիի արքեպիսկոպոս, համայն Անգլիայի եպիսկոպոսապետ և
միտրոպոլիտ, Նորին Գերաշնորհություն
ՄԱՅԶԼ ՌԵՄՋԻՆ (Լոնդոն),
Աթենքի և համայն Հելլադայի միտրոպոլիտ, Նորին Գերաշնորհություն
ՍԵՐԱՖԻՄԻՆ (Աթենք),
Սերբիայի և համայն Հարավսլավիայի Պատրիարք, Նորին Սրբություն
ՀԵՐՄԱՆԻՆ (Բելգրադ),
Վարշավայի և համայն Լեհաստանի միտրոպոլիտ, Նորին Գերաշնորհություն
ՎԱՍԻԼԻՆ (Վարշավա),
Պրագայի և համայն Չեխոսլովակիայի միտրոպոլիտ, Նորին
Գերաշնորհություն ԴՈՐՈՖԵԻՆ (Պրագա),
Հայ կաթողիկե եկեղեցու Պատրիարք, Նորին Ամենապատվություն
ԻԳՆԱՏԻՈՍ ՊԵՏՐՈՍ ԺԶ ՊԱԹԱՆՅԱՆԻՆ (Բեյրութ),
Կիպրոսի արքեպիսկոպոս, Նորին Գերաշնորհություն
ՄԱԿԱՐԻՈՍԻՆ (Նիկոզիա),
Եկեղեցիների համաշխարհային խորհրդի ընդհանուր քարտուղար
դոկտ. ՖԻԼԻՊ ՓՈԹԸՐԻՆ (Ժնև),
Վատիկանի պետական քարտուղար, Նորին Ամենապատվություն
կարդինալ ԺԱՆ ՎԻԼԼՈՅԻՆ (Վատիկան),
Վիեննայի արքեպիսկոպոս, Նորին Ամենապատվություն
կարդինալ ՖՐԱՆՑ ԿՅՈՆԵԻԳԻՆ (Վիեննա),
Փարիզի արքեպիսկոպոս, Նորին Ամենապատվություն
կարդինալ ՖՐԱՆՍՈՒԱ ՄԱՐՏԻՆ (Փարիզ),
Քրիստոնեական միության քարտուղարության նախագահ, Նորին
Ամենապատվություն կարդինալ ԺԱՆ ՎԻԼԼԲՐԱՆԴՍԻՆ (Վատիկան),
Մարսելի արքեպիսկոպոս, գերաշնորհ
ՌՈԺԵ ԷԶԵԳԱՐԱՅԻՆ (Մարսել),
Լատվիական ՍՍՀ ավետարանական-լուծարական եկեղեցու արքեպիսկոպոս,
Նորին Գերազանցություն Յ. Պ. ՄԱՏՈՒԼԻՍԻՆ (Ռիգա),
Էստոնական ՍՍՀ ավետարանական-լուծարական եկեղեցու արքեպիսկոպոս,
Նորին Գերազանցություն ԱԼԵԲԵԴ ՏՈՈՄԻՆԳԻՆ (Տալլին),
Միջին Արևելքի հայ ավետարանական եկեղեցիների միության նախագահ,
Վերապատվելի ՀՈՎՀԱՆՆԵՍ ԱՀԱՐՈՆՅԱՆԻՆ (Բեյրութ),
Ֆրանչիսկյան միաբանության կուստոդ
ՄՈՐԻԼԻՈ ՍԱԿԿԻՆ (Երուսաղեմ),

Խաղաղության համաքրիստոնեական կոնֆերանսի գլխավոր քարտուղար
դոկտ. ԿԱՐՈՒԻ ՏՈԹԻՆ (Պրագա),
Իրաքի պապական նվիրակ, Գերաշնորհ

ԺԱՆ ՌՅՈՒՊԻՆ (Բաղդադ),
Մխիթարյան ուխտի աբբահայր, Գերապայծառ Հայր

ՊՈՂՈՍ վարդապետ ԱՆԱՆՅԱՆԻՆ (Վենետիկ),
Մխիթարյան ուխտի աբբահայր, Գերապայծառ Հայր

ԳՐԻԳՈՐԻՍ վարդապետ ՄԱՆՅԱՆԻՆ (Վիեննա),
Վերապատվելի ՀԱՐՈՒԹՅՈՒՆ ՀԵԼՎԱՃՅԱՆԻՆ (Մարսել),

Վերապատվելի ՍԵՆԵՔԵՐԻՄ ՍՅՈՒԼԱՀՅԱՆԻՆ (Նյու-Յորք),

«Քրիստոս ծնաւ և յայտնեցաւ»:

Նոր տարվո ալս լուսաբացին մեր սուրբ Աթոռից ուրախ ենք Ձեզ ողջունելու ավետիսով սուրբ Ծննդյան Տյառն մերո Հիսուսի Քրիստոսի, որ իջավ երկիր և ծնավ որպես մարդ ի Մարիամա սրբո Կուսեն, բերելու համար աշխարհին և մարդկության համայն՝ փրկագործ պատգամները խաղաղության և մարդասիրության:

Մեծ խորհուրդը հրաշալի ալս Ծննդյան, ալսօր էլ մեր հուսացյալ հոգիներին բերում է՝ մխիթարություն, ներշնչանք ու երանության տեսիլք, մեր օրերին մանավանդ, երբ մարդկային աշխարհը տակավին հեռու է վերջնական ու տևական խաղաղ մի կյանքի նավահանգստից: Սակայն հաւտաւ լավատեսությամբ Մենք մնում ենք Ձեզ հետ միաստեղ մշտաբերուն աղոթող ու գործող, վասն խաղաղ գոյակցության աշխարհի բոլոր ազգությունների և պետությունների:

Ջերմապես աղօթում ենք որ Փրկչի հրաշալի Ծննդյան շնորհները առատապես բաշխվեն Ձեր պատմական սուրբ եկեղեցու հոգևոր սպասավորների և հավատացյալ ժողովուրդի զավակներին, ի հոգվո շինություն նրանց կյանքի ու աշխատանքի:

Այս երջանիկ առիթով հաճեցեք ընդունիլ նաև Մեր ամենաբարի մաղթանքները որ երկար տարիներ տակավին փառքով պսակեք Ձեր սուրբ առաքելությունը:

Եղբայրական սիրով ի Քրիստոս՝

ՎԱԶԳԵՆ Ա.


ԾԱՅՐԱԳՈՒՅՆ ՊԱՏՐԻԱՐԷ ԵՎ ԿԱԹՈՂԻԿՈՍ
ԱՄԵՆԱՅՆ ՀԱՅՈՑ

Ս. ԷԶՄԻԱԾԻՆ

*
* *

Ամենայն Հայոց Վեհափառ Հայրապետի՝ Ամանորի և Փրկչի հրաշալիստ և սուրբ Ծննդյան շնորհավորական գրություններին ի պատասխան ստացվել են բույր եկեղեցիների հոգևոր պետերի և կրոնական այլ համայնքների ու կազմակերպությունների ղեկավարների՝ այդ առթիվ ուղարկված ջերմագին շնորհավորական հեռագրեր ու գրություններ, որոնցում մի անգամ ևս պայծառորեն արտահայտվում է քրիստոնեական եղբայրության ու համագործակցության սրտագին ոգին բույր եկեղեցիների ու կրոնական այլ համայնքների և կազմակերպությունների միջև:

Հանուն Հայոց Հայրապետի ջերմ շնորհակալություն ենք հայտնում ստացված պատասխան շնորհավորականների համար:



ԱՄՆԱՅՆ ՀԱՅՈՑ ՎԵՀԱՓԱՌԻ ՀԱՅՐԱՊԵՏԻ
ԾՆՈՐՀԱՎՈՐԱԿԱՆ ԳԻՐԸ ԱՄԱՆՈՐԻ ԵՎ ՍՈՒՐԲ ԾՆԵԴՅԱՆ
ՏՈՆԵՐԻ ԱՌԹԻՎ՝ ՈՒՂՂՎԱԾ ՀԱՅԱՍՏԱՆՅԱՅՑ ԵԿԵՂԵՑՈՒ
ՆՎԻՐԱՊԵՏԱԿԱՆ ԵՐԵՔ ԱԹՈՌՆԵՐԻՆ, ԹԵՄԱԿԱԼ ԲՈԼՈՐ
ԱՌԱՋՆՈՐԴՆԵՐԻՆ ԵՎ ԵԿԵՂԵՑԱԿԱՆ ՀԱՄԱՅՆՔՆԵՐԻՆ

«Քրիստոս ծնաւ և յայտնեցաւ»:

Սիրեցյալ եղբայր Մեր ի Քրիստոս,

Նոր տարվո աչս լուսաբացին, երջանիկ ենք Ձեզի բերելու ավետիսը սուրբ Ծննդյան և Աստվածահայտնության Տյառն մերոյ Հիսուսի Քրիստոսի, որ իջավ երկիր ու ծնավ որպէս մարդ ի Մարիամա սրբո Կուսեն, բերելու համար աշխարհին և մարդկության համայն՝ փրկագործ պատգամները խաղաղության և մարդասիրության:

Մեծ խորհուրդը հրաշալի աչս Ծննդյան, աչսօր ալ մեր հուսացյալ հոգիներուն կբերե մխիթարություն, ներշնչանք ու երանության տեսիլք, մեր օրերուն մանավանդ, երբ մարդկային աշխարհը տակավին հեռու է վերջնական ու տևական խաղաղ կյանքի մը նավահանգիստեն: Սակայն հաստատ լավատեսությամբ Մենք կմնանք մշտաբար աղոթող ու գործող՝ վասն խաղաղ գոյակցության աշխարհի բոլոր ազգություններու և պետություններու:

Սիրո և խաղաղության ոգին թող իշխե նաև մեր եկեղեցական համայնքներն ներս և մեր ժողովուրդի զավակները թող համերաշխ գործակցությամբ

ապրին ու ձեռք-ձեռքի տված զարգացնեն իրենց հոգևոր ու մշակութային կյանքը, հետզհետե առավել բարի ու շինարար արդյունքներով:

Զերմապես կադրերնք Միածնաէջ Մայր տաճարիս սուրբ Սեղանի առաջ, որ մեր Փրկչի հրաշալի Ծննդյան շնորհները առատապես բաշխվին տիրախնամ Աթոռիդ միաբանության և համայն հայ հավատացյալ ժողովուրդին, ի հոգվո մխիթարություն բոլորին և ի հաջողություն անոնց քրիստոսասեր ու եկեղեցաշեն գործոց:

Սուրբ Ծննդյան ուրախությամբ կմաղթենք Զեզի, սիրեցյալ եղբայր, մշտատև բաջառողջություն և միշտ պտղառատ ու շինարար արդյունքներ Զեր մվիրական առաքելության ճանապարհի վրա:

Ենորհավոր Նոր տարի և սուրբ Ծնունդ:

Եղբայրական սիրով ի Քրիստոս՝

Վ Ա Զ Գ Ե Ն Ա

ԾԱՅՐԱԳՈՒՅՆ ՊԱՏՐԻԱՐԷ ԵՎ ԿԱԹՈՂԻԿՈՍ
ԱՄԵՆԱՅՆ ՀԱՅՈՑ

Ս. ԷԶՄԻԱԾԻՆ

*
* *

Ամանորի և ս. Ծննդյան տոների առթիվ Ամենայն Հայոց Վեհապետ Հայրապետի անունով ստացվեցին ամենաջերմ և հարգալից զգացմունքներով զեղուն բազմաթիվ շնորհավորական հեռագրեր և նամակներ մեր մվիրապետական երեք Աթոռների գահակալներից, արտասահմանի և ներքին բոլոր թեմերի առաջնորդներից, ազգային-եկեղեցական, մշակութային, հայրենակցական, տիկնանց, օրիորդաց և երիտասարդաց զանազան կազմակերպություններից, հայ և օտար պաշտոնական անձնավորություններից:





ՆՈՐ ՏԱՐՎԱ ԱՌԹԻՎ ՓՈԽԱՆԱԿՎԱԾ ՀԵՌԱԳՐԵՐ
ԱՄԵՆԱՅՆ ՀԱՅՈՑ ՎԵՀԱՓԱՌ ՀԱՅՐԱՊԵՏԻ ԵՎ
ՊԵՏԱԿԱՆ ԱՆՁՆԱՎՈՐՈՒԹՅՈՒՆՆԵՐԻ ՄԻՋԵՎ

ՀԱՅԿԱԿԱՆ ՍՍՀ ԳԵՐԱԳՈՒՅՆ ՍՈՎԵՏԻ ՆԱԽԱԳԱՀՈՒԹՅԱՆ
ՆԱԽԱԳԱՀ ՄԵԾԱՀԱՐԳ Բ. ՍԱՐԿԻՍՈՎԻՆ

Հանուն Հայաստանյայց եկեղեցու և հավատացյալ ժողովրդի սրտանց
շնորհավորում ենք Ձեր Նոր տարին և մաղթում Ձեզ քաջառողջություն և
հայրենակալեր գործունեության երկար արդյունավետ տարիներ:

Մաղթում ենք, որ նոր տարին լինի խաղաղության տարի աշխարհի բո-
լոր ազգերի համար, նաև նորանոր շինարար նվաճումների տարի մեր վե-
րաճնված մայր հայրենիքի համար՝ սովետական ժողովուրդների եղբայրա-
կան մեծ ընտանիքում:

Խորին հարգանք՝

Վ Ա Զ Գ Ե Ն Ա

Ծայրագույն Պատրիարք և կաթողիկոս
Ամենայն Հայոց

Մայր Աթոռ ս. Էջմիածին

*
* *

ՀԱՅԿԱԿԱՆ ՍՍՀ ՄԻՆԻՍՏՐՆԵՐԻ ՍՈՎԵՏԻՆ ԱՌԸՆԹԵՐ
ՀԱՅ ԵԿԵՂԵՑՈՒ ԳՈՐԾԵՐԻ ԽՈՐՀՐԴԻ ՆԱԽԱԳԱՀ
ՄԵԾԱՀԱՐԳ Ս. ԳԱՍՊԱՐՅԱՆԻՆ

Նոր տարվա սեմին երջանիկ ենք Ձեզ շնորհավորելու և հանուն հայ
եկեղեցու ու հավատացյալ ժողովրդի Ձեզ մաղթելու արևշատ ու քաջա-
ռողջ տարիներ և միշտ հաջողություններ Ձեր հայրենակալեր աշխատանքի
ճանապարհին:

Նոր տարին թող լինի կառուցման ու հառաքելության տարի մեր մայր
երկրի ու ժողովրդի համար:

Նոր տարին թող լինի բարի կամեցողության և խաղաղ գործակցության տարի համայն աշխարհի համար:

Վ Ա Զ Գ Ե Ն Ա

Ծայրագույն Պատրիարք և կաթողիկոս
Ամենայն Հայոց

Մայր Աթոռ ս. Էջմիածին

*
* *

ԾԱՅՐԱԳՈՒՅՆ ՊԱՏՐԻԱՐԶ ԵՎ ԿԱԹՈՂԻԿՈՍ ԱՄԵՆԱՅՆ ՀԱՅՈՑ
ՎԱԶԳԵՆ ԱՌԱՋԻՆԻՆ

Խորապես շնորհակալ եմ Նոր տարվա առթիվ ինձ հղած շնորհավորանքների և բարենախառնությունների համար: Իմ կողմից սրտանց շնորհավորում եմ Ձեր Նոր տարին: Կամենում եմ Ձեզ քաջառողջություն, բարօրություն և երջանկություն՝ մաղթելով, որ նոր տարին լինի սովետական հայրենիքի և ժողովրդի հետագա բարգավաճման, ժողովուրդների խաղաղության, բարեկամության և խաղաղ համագործակցության տարի:

Բ. ՍԱՐԿԻՍՈՎ

Հայկական ՍՍՀ Գերագույն սովետի նախագահության
նախագահ

Երևան

*
* *

ԾԱՅՐԱԳՈՒՅՆ ՊԱՏՐԻԱՐԶ ԵՎ ԿԱԹՈՂԻԿՈՍ ԱՄԵՆԱՅՆ ՀԱՅՈՑ
ՎԱԶԳԵՆ ԱՌԱՋԻՆԻՆ

Ձերդ Սրբություն,


Ընդունեցեք իմ ջերմ շնորհավորանքները և անկեղծ բարենախառնությունները: Սրտանց կամենում եմ Ձեզ քաջառողջություն, բարօրություն և նոր հաջողություններ Ձեր ազգային-հայրենասիրական գործունեության մեջ: Թող նոր տարին լինի մեր հայրենիքի և ամբողջ աշխարհի խաղաղության տարի, բոլոր ժողովուրդների բարեկամության ու խաղաղ համագործակցության տարի:


Խորին հարգանքով՝

Ս. ԳԱՍՊԱՐՅԱՆ

Հայկական ՍՍՀ Մինիստրների սովետին առընթեր
հայ եկեղեցու գործերի խորհրդի նախագահ

Երևան





ՀԱՅՐԱՊԵՏԱԿԱՆ ՀԱՆԴԻՍԱՎՈՐ Ս. ՊԱՏԱՐԱԳ ԵՎ ՔԱՐՈՉ
ՄԱՅՐ ՏԱՃԱՐՈՒՄ ՓՐԿՉԻ ՀՐԱՇԱՓԱՌ ԾՆՆԴՅԱՆ ՏՈՆԻ
ԱՌԻԹՈՎ

Հունվարի 6-ին, երեքշաբթի.—Տօն Ծննդեան և Աստուածայայտնութեան Տեառն մերոյ Յիսուսի Քրիստոսի.

Առավոտյան Մայր տաճարում, ողջ միաբանության և ուսանողության մասնակցությամբ, պաշտովում է ս. Ծննդյան ժամերգությունը:

Ժամը 11-ին վեհափառ Հայրապետը եկեղեցական թափորով առաջնորդվում է Մայր տաճար՝ ս. Ծննդյան հանդիսավոր պատարագը մատուցելու:

Ս. Սեղանին սպասարկում են տ. Տիրան, տ. Թորգոմ և տ. Մոմիկ արեղաները, Մայր Աթոռի սարկավագաց ողջ դասը:

Հակառակ ձյունախառն եղանակին, Մայր տաճարը լիքն է ուխտավոր և հավատացյալ բազմությամբ:

«Հայր մեր»-ից առաջ քարոզում է պատարագիչ Հայոց Հայրապետը՝ «Քրիստոս ծնաւ և յայտնեցաւ» բնաբանով (Հայոց Հայրապետի՝ Ծննդյան գեղեցիկ և բովան-

դակալից քարոզը տպւել է «Էջմիածին» ամսագրի սույն համարում, էջ 3):



Կիրակի օրը, երեկոյան ժամը 23-ին, վեհափառ Հայրապետի՝ Ծննդյան սույն քարոզը ձայնասփուլում է Երևանի ռադիոկայանից:

Ս. պատարագի ավարտին ավանդական հանդիսությամբ կատարվում է Զորքննյաց կարգը՝ ի հիշատակ Հորդանան գետում Քրիստոսի մկրտության՝ ս. Հովհաննէս Մկրտչի ձեռքով:

Այնուհետև վեհարանի ընդունարանում Հայոց Հայրապետն ընդունում է միաբանության, Մայր Աթոռի պաշտոնության, Մայր տաճարի երգչախմբի, ուխտավորների և հավատացյալների սրտագին շնորհավորանքներն ու բարեմաղթությունները ս. Ծննդյան տոնի առիթով և վերջում տալիս իր օրհնությունը:

«Քրիստոս ծնաւ և յայտնեցաւ, ձեզ և մեզ մեծ աւետիս»:





ԱՄԱՆՈՐՅԱ ԵՎ ՍՈՒՐԲ ԾՆՆԴՅԱՆ ՀԱՆԴԻՍՈՒԹՅՈՒՆՆԵՐ ՄԱՅՐ ԱԹՈՒՌՈՒՄ

Նոր տարվա դիմավորումը Ղազարապատի վանական սեղանատանը

Այս տարի էլ Ամանորի և ս. Ծննդյան տոներին նվիրված հանդիսությունները Մայր Աթոռում կատարվեցին ավանդական շուքով, սրտագին մթնոլորտում և անխառն ուրախությամբ:

Ղազարապատի վանական սեղանատանը, ամանորյա զվարթ սեղանների շուրջ, համախմբված էին Գերագույն հոգևոր խորհրդի և Մայր Աթոռի միաբանության ու վերստուգիչ հանձնաժողովի անդամները, «Էջմիածին» ամսագրի խմբագրական կազմը, հոգևոր ճեմարանի տեսչությունը, դասախոսական կազմն ու ուսանողությունը, մայրավանքի ղեկավար պաշտոնությունը, Մայր Աթոռում իրենց պարտքը կատարած աշխատանքի մարդկանց արդար խղճով և գոհունակությամբ, Հայոց Հայրապետի օրհնաբեր ներկայությամբ ճանապարհելու անցնող տարին, որն իրապես եղավ հոգեվոր, եկեղեցական, մշակութային ու շինարարական իրադարձություններով հարուստ տարի, և վստ իրադարձություն, անկտրում հավատով ու լավատեսությամբ, գալիքի նկատմամբ պայծառ երազանքներով ողջունելու նոր տարին, որը բացվում է բոլորի առաջ որպես նոր կյանքի և աշխատանքային սխրանքների սպիտակ մատնան:

Դեկտեմբերի 31-ին, չորեքշաբթի.

Ժամը 20-ին վեհապատ Հայրապետը մուտք է գործում վանական սեղանատուն, որը զարդարվել է Նոր տարվա հատուկ պայծառ լույսերով, տոնաձևառով և երփներանգ թղթե ծաղիկներով:

Հայոց Հայրապետի մուտքը ողջունվում է բոլոր ներկաների սրտագին ծափողջույններով և երախտագետ ծախունքներով:

Մայր Աթոռի բարիքներով ծանրաբեռն Ամանորի սեղանն օրհնում է Հայոց Հայրապետը:

Սեղանների շուրջ ստեղծվում է Ամանորի խոհերով, մտորումներով օծուն վանական ջերմիկ մթնոլորտ:

Հայոց Հայրապետի և բոլոր ներկաների Նոր տարին շնորհավորում է հոգևոր ճեմարանի տեսուչ տ. Հովհաննես ավագ քհն. Մարությանը:

«Ամանոր է: Խնդության, հրճվանքի օր, մտորելու, տխրելու, ուրախանալու, մի նոր եռանդով կյանքի հորձանքն ի վեր մաքառելու ուխտով գոտեպնդվելու օր:

Մի քանի ժամ ևս, ու պատմության գիրկըն է անցնելու մեզանից յուրաքանչյուրի կյանքից մի տարի ևս: Այս պահին ուրախանում է և՛ ծերունին, և՛ երիտասարդը, և՛ մանուկը՝ վերանորոգվող կյանքի խորհրդին ի տես: Նրանք այսօր ի մի են բերում երազանքների իրականացման ճանապարհին իրենց ձեռք բերած հաջողությունները



և դառնություն սալրում՝ ծրագրերի և իրականացած արդյունքների մեջ տեսնելով բաց կողմերը:

Կամոքն Աստուծո, այս տարի ևս մեր ժողովուրդը հայրենի երկրում և սփյուռքի տարածքի վրա խաղաղությամբ անցկացրեց հոգևոր-եկեղեցական, մշակութային, տնտեսական արդյունավետ մի տարի:

Վեհափառ Տեր, քանի որ Նոր տարին հաշվեհարդարի օր է, մեր նվաճումներով ոգևորվելու, ուրախանալու, մեր վրիպումներով տխրելու օր, այս առիթով Ձերո Սրբությանը կարող ենք վատահեցնել, որ Մայր Աթոռ ս. Էջմիածնի և մեր հավատացյալ ժողովրդի սիրտը հանդիսացող Էջմիածնի հոգևոր ճեմարանը, պայմանների ընձեռած չափով, տեսչությունը, դասախոսական կազմը Ձերո Սրբության գլխավորությամբ անմնացորդ նվիրումով կարելին արեցին՝ անցյալ տարին ավելի արդյունավետ ուսումնական տարի դարձնելու համար:

Ս. Էջմիածնի հոգևոր ճեմարանի դասախոսական կազմն իր մանկավարժական փորձն ի ապաս է դրել մեր խնամքին հանձնրված աշակերտներից կերտելու մեր եկեղեցուն պիտանի ապագա սպասավորներ:

Մի քանի օր առաջ, դեկտեմբերի 25-ին, ս. Ստեփանոս նախավկայի տոնի օրը, Բ լսարանի մեր ուսանողներից յոթ հոգի սարկավագ ձեռնադրվեցին, իսկ դրանից մեկ օր առաջ այլ դասարանների ուսանողներից երկուսը ուրարակրի և ութը դպրության սատիճաններ ստացան:

Հավատում ենք, որ նրանցից շատերն ապագայում ընդգրկվելու են եկեղեցու ապավորների շարքերը՝ ուրախացնելով Ամենայն Հայոց Հայրապետին և մեր ժողովրդին:

Թող նոր տարին մարդկությանը բերի լույսի, հույսի շողեր, խաղաղություն՝ խոսվահույզ երկրների ժողովուրդներին:

Այսօր, Վեհափառ Տեր, Մայր Աթոռի միաբանության, հոգևոր ճեմարանի տեսչության, դասախոսական կազմի և ուսանողության համար Ձեր շուրջը համախմբվելու ու մեր ուխտերը վերանորոգելու առիթ է:

Թող Աստված Ձեզ երկա՛ր ու երկա՛ր կյանք պարգևի՝ ավելի արդյունավորելու համար Ձեր հայրապետական կյանքի շրջանը:

Այս զգացումներով և մտածումներով թույլ տվեք, Վեհափառ Տեր, հոգևոր ճեմարանի տեսչության անունից շնորհավորել Ձեր Նոր տարին:

Կեցցե Մայր Աթոռ ս. Էջմիածինը:

Կեցցե ս. Էջմիածնի հոգևոր ճեմարանը: Կեցցե մեր բոլորիս սիրելի Ամենայն Հայոց Հայրապետը»:

Բոլոր ներկայները հոտնկալս և միասիրտ ու միախոհ եղանք են «Էջ Միածինն ի Հօրէ» Մայր Աթոռի հիմնը:

Ի դիմաց միաբանության, Մայր տաճարի լուսարարապետ տ. Հուսիկ եպս. Սանթրոյանը շնորհավորում է Վեհափառ Հայրապետի Նոր տարին և առաջարկում բաժակ բարձրացնել Նորին Սրբության կենացը, Նրա եկեղեցաշեն, հայրենամկեր ու խաղաղասիրական գործունեության հաջողության համար:

Ճեմարանի սաները երգում են Հայրապետական մաղթերգը:

Նոր տարվա ողջույնի և շնորհավորական խոսք է ասում, ի դիմաց հոգևոր ճեմարանի դասախոսական կազմի, Սամվել Անդոյանը:

Հանուն ճեմարանի ուսանողության, Հայոց Հայրապետին ողողյալ շնորհավորանքների և որդիական երախտագիտության հետևյալ ողերձն է կարդում Բ լսարանի ուսանող Արծրուն սրկ. Ավետիսյանը:

«Մարդկանց համար անհասանելի ու անպարփակելի ժամանակը սանձահարելու և տիրելու համար մարդը ստիպված է եղել նրան բաժանել, որպեսզի տիրի: Եվ այդ բաժանումներից ամենախորհրդավորն ու գեղեցիկը տարիների բաժանումն է:

Այս աստվածադիր ավանդության նախօրյակին բոլոր մարդիկ իրենց մտքում հանրագումարի են բերում այն ամենը, որ տեղի է ունեցել իրենց հետ ընթացիկ տարում:

Կյանքում ամեն մարդ ունի նպատակ և ձգտում, որ այն իրականանա: Բայց հասնել երազած նպատակին, նշանակում է՝ անցնել երկար ու ձիգ մի ճանապարհ, որի վրա սփռված են բազմաթիվ դժվարանց խոչընդոտներ: Բայց ինչպես քրիստոնեական գերագույն ճշմարտությունն է ասում, պետք է ունենալ հույս, հավատ և սեր: Այս երեքը հաջողության հասնելու այն նախապայմաններն են, որոնցով սկսվում է նպատակի իրագործումը: Եվ մենք հույսով ենք, որ կարողարացնենք մեզ վրա դրված հույսերը:

Մենք՝ ուսանողներս, նույնպես ուրախ ենք, որ հանձնել ենք մեր կիսամյա քննությունները և այժմ պատրաստ ենք զգույս մեզ՝ մտնելու նոր տարվա դռնից ներս, նոր երազներով ու ձգտումներով:

Մենք այժմ շնորհավորում ենք Ձեր Նոր տարին, Վեհափառ Տեր, և ցանկանում Ձեզ արևշատություն և Ձեր սանձահարած ա-

կրթարթին՝ հավիտենական ժամանակի մեջ փայլ ու պայծառություն:

Վեհափառ Տեր, թույլ տվեք ճեմարանի ուսանողության անունից համբուրել Ձեր հայրապետական սուրբ Աջը՝ բերելով մեր խոնարհ աղոթքները Ձերդ Վեհափառությանը՝ ստանալու համար Ձեր հայրապետական օրհնությունները:

Այնուհետև գործադրության է դրվում գեղարվեստական կոկիկ մի հայտագիր՝ խինդով ու ծիծաղով լցնելով բոլոր ներկաների հոգիները: Հայտագրի հաջող համարներից մեկն էր նաև սրամիտ, երգիծական «կաղանդեքներ»-ը, որ գրել էր Բ լսարանի ուսանող Լևոն սրկ. Բաղդասարյանը:

Հանդիսության ավարտին խոսք է առնում Հայոց Հայրապետը՝ շեշտելով, որ Ինքը սիրով և զոհունակությամբ եկավ Ամանորին նվիրված սույն հանդիսությանը՝ բերելու Իր հայրական ողջույնն ու օրհնությունը բոլորին և Իր գնահատանքը՝ օրվա առիթով գործադրված գեղարվեստական բաժնի ծրագրին:

Այնուհետև Հայոց Հայրապետը հայտարարում է, որ լավատեսությամբ ու պայծառ հավատքով բացենք նոր տարվա դռները: Մեր հաջողության, զոհունակության առաջին գրավականը մեր մայր հայրենիքն է: Գոհ ենք 1975 թվականի արդյունքներից և ավելի գոհ լինելու հիմքեր ունենք 1976-ից: Մեր հայրենիքը, շեշտում է Հայոց Հայրապետը, ապրում և ստեղծագործում է խաղաղության պայմաններում: Նորին Սրբությունը մաղթում է, որ մեր հայրենիքի այդ խաղաղությունը լինի ամուր, տևական, երբայրական ժողովուրդների մեծ ընտանիքում, ընտանիք, որը հուսալի պատվար է խաղաղության պաշտպանության:

Նորին Սուրբ Օծությունը խոսում է նաև այն մասին, որ այս նոր տարվա սեմին Ամանորի մեր ուրախությունների մեջ կան նաև տխրություն, որովհետև աշխարհի ուրոշ մասերում կրակ է ժայթքում, ողբերգություններ են կատարվում: Հայոց Հայրապետը սրտագին ցանկություն է հայտնում, որ խաղաղության աղավկին իջնի մանավանդ Լիբանանի օրհնյալ երկրի և ժողովուրդների վրա, որոնց ծոցում ապրում են նաև մեծ թվով հայեր:

Մեր հաջողության, զոհունակության երկրորդ գրավականը, հաստատում է Հայոց Հայրապետը, Մայր Աթոռ ա. Էջմիածինն է, որը հայ ժողովրդի և հայոց վերածնված հայրենիքի հանդեպ իր պարտքը, իր պատմական առաքելությունը կատարում է հավատքով ու սրբությամբ:

Այնուհետև Մայր Աթոռի միաբանության

և հոգևոր ճեմարանի ուսանողության ուղղյալ բովանդակայից ու սրտառույ խրատականով Հայոց Հայրապետն ավարտում է ամանորյա Իր խոսքը և պատգամը:

Ամանորի հանդիսությունն ավարտվում է ժամը 23-ին, միասիրտ երգված Տերունական աղոթքով:

Ժամը 24-ն է: Հնչում են Մայր տաճարի զանգերը, հնչում 365 անգամ: Պատմության գիրկն է անցնում Մայր Աթոռի կյանքում իրադարձություններով հարուստ ևս մեկ տարի:

Մայր տաճարում, խորին լուռության մեջ, նոր տարվա առաջին իսկ րոպեին, Մայր Աթոռի միաբաններն ու ճեմարանի ուսանողությունն իրենց անդրանիկ աղոթքն են մրմնջում, որպեսզի 1976 թվականը լինի ա. Էջմիածնի առավել պայծառության, հայրենիքի խաղաղության, առատության, քաղաքության և ողջ աշխարհում մնայուն ու կայուն խաղաղության տարի:

Ս. պատարագ Նոր տարվա առիթով

Հունվարի 1-ին, հինգշաբթի օրը, առավոտյան ժամը 10.30-ին, Մայր տաճարում տ. Թորգոմ արք. Մուշեղյանը ա. պատարագ է մատուցում Նոր տարվա առիթով և քաղաքում «Ո՛ր տայր ինձ գծվան ծխանի և գառաւօտն Նաւասարդի» բնաբանով՝ շնորհավորելով Վեհափառ Հայրապետի և Մայր Աթոռի միաբանության Նոր տարին:

Հավարտ ա. պատարագի Իջման ա. սեղանի շուրջ հանդիսավորությամբ կատարվում է Հայրապետական մաղթանք:

Հավարտ ա. պատարագի Վեհափառ Հայրապետը եկեղեցական թափոքով առաջնորդվում է Վեհարան, ուր Մայր Աթոռի դիվանապետ տ. Սրսեն եպս. Բերբերյանը մի անգամ ևս շնորհավորում է, ջերմ սիրով և երախտագիտությամբ, Վեհափառ Հայրապետի Նոր տարին՝ քաջառողջության սրտագին բարեմաղթություններով:

Հայոց Հայրապետը խորապես զգացված Նոր տարվա առթիվ միաբանության կողմից արտասանված որդիական բարեմաղթություններից, շնորհավորում է միաբանության Նոր տարին և տալիս Իր օրհնությունն ու պատգամը:

Մայր Աթոռի միաբաններն աջահամբույրով ստանում են Հայոց Հայրապետից 1976 թվականի ա. Էջմիածնի օրացույցներ:

Ծրագալույցի սուրբ պատարագ Մայր տաճարում

Հունվարի 5-ին, երկուշաբթի.—Ծրագալույց Ծննդեան և Աստուածայայտնութեան Տեառն մերոյ Յիսուսի Քրիստոսի.

Օրվա տոնի առիթով երեկոյան ժամը 17-ին Մայր տաճարում պաշտովում է Ծրագալույցի հանդիսավոր ժամերգություն՝ աստվածաշնչական ընթերցումներով և համապատասխան շարականների երգակցությամբ:

Եկեղեցական թափորով Մայր տաճար է առաջնորդվում Հայոց Հայրապետը:

Ս. պատարագից առաջ Մայր Աթոռի սարկավագներն ու հոգևոր ճեմարանի ուսանողներն Ավագ սեղանից ընթերցում են Դանիել մարգարեի «Երից մանկանց» օրհներգությունը:

Ծրագալույցի հանդիսավոր ս. պատարագը մատուցում է տ. Արսեն եպ. Բերքերյանը:

Հավարտ ս. պատարագի վեհափառ Հայրապետի հանդիսադրությամբ կատարվում է ս. Ծննդյան նախատոնակը: Մայր տաճարում վեհ ու տպավորիչ հնչում է «Խորհուրդ մեծ և սքանչելի»-ն:

Երեկոյան ժամը 20.30-ին Ղազարապատի միաբանական սեղանատանն օրհնվում են Մայր Աթոռի բարիքները, աղև ու հացը և ապա ողջ միաբանությունն ու ճեմարանի ուսանողությունը մասնակցում են ս. Ծննդյան ուրախ սեղանին:

«Քրիստոս ծնաւ և յայտնեցաւ»:


Ա. Հ.





ՎԵՂԱՔԱՌ ՀԱՅՐԱՊԵՏՆԵՐ՝ ՄԱՅՐ ԱԹՐՈՒՆ ԱՌՇԱԹԵՐ ԺԱՐՏԱՐԱՊԵՏԱԿԱՆ ՀԱՆՁՆԱԽԱՐԺԻ ԱՆՎԱՐՆԵՐԻ ԵՎ ՄԱՅՐ ԱԹՐՈՒՆ
ԻՆՇԵՆԵՐ-ՇԻՆԱՐԱՐՆԵՐԻ ՀԵՏ. ՎԵՂԱՐԱՆ, 1976 թ. ՀՈԽՎԱՐԻ 3

ՎԵՆԱՐԱՆՈՒՄ



ԸՆԴՈՒՆԵԼՈՒԹՅՈՒՆ ՎԵՆԱՐԱՆՈՒՄ Ի ՊԱՏԻՎ ՄԱՅՐ
ԱԹՈՒՒՆ ԱՌԸՆԹԵՐ ԾԱՐՏԱՐԱՊԵՏՆԵՐԻ
ՀԱՆՁՆԱԺՈՂՈՎԻ

Վեհափառ Հայրապետի գահակալության
ստաջին իսկ օրերից, ինչպես հայտնի է,
Նրա հրավերով Մայր Աթոռին առընթեր
կազմվում է անվանի հայ ճարտարապետ-
ներից բաղկացած մի հանձնաժողով, որն
ինքնաբուխ նվիրումով և հայ մարդուն հա-
տուկ սիրով իր վրա է վերցնում Մայր Ա-
թոռի և Հայաստանի պատմական վանքերի
ու եկեղեցիների վերանորոգչական և շի-
նարարական կարևոր աշխատանքների վե-
րահսկողությունը՝ մարմին տալու շինարար
և կառուցող Հայոց Հայրապետի ծրագրե-
րին:

Անցնող քսան տարիների ընթացքում
ճարտարապետների սույն հանձնաժողովը
ամենայն կանոնավորությամբ Վեհարա-
նում, Հայոց Հայրապետի նախագահու-
թյամբ, նիստեր է գումարում և այնտեղ
ընդունված որոշումների համաձայն ծավա-
լում շատ պատասխանատու և իրեն պա-
տիվ բերող վերանորոգչական-շինարարա-
կան աշխատանքներ թե՛ Մայր Աթոռում և
թե՛ վերոհիշյալ պատմական վանքերում ու
եկեղեցիներում:

Մայր Աթոռում վաղուց ավանդույթ է
դարձել՝ ամեն տարի հունվարի 2-ը և կամ
3-ը համարել ճարտարապետական հանձ-
նաժողովին նվիրված օր: Այս տարի էլ,
հունվարի 3-ին, շաբաթ օրը, Նոր տարվա
ուրախ ստիթով, Վեհարանի սեղանատա-
րը կազմակերպվում է ընդունելություն՝ ի

պատիվ Մայր Աթոռին առընթեր ճարտա-
րապետների հանձնաժողովի:

Ընդունելությանը ներկա էին ճարտարա-
պետների հանձնաժողովի անդամներ
դոկտ.-պրոֆ. Վարագդատ Հարությունյա-
նը՝ հանձնաժողովի նախագահ, ժողովրդա-
կան նկարիչ Գրիգոր Խանջյանը, ճարտա-
րապետ Բաղդիկ Արզումանյանը, ինժեներ-
կոնստրուկտոր Կոստանդին Ալթունյանը,
Մայր Աթոռի գլխավոր ճարտարապետ
Արծրուն Գալիկյանը, ինչպես նաև Մայր
Աթոռի ինժեներ-շինարարներ Միքայել
Հովհաննիսյանը, Գրիգոր Չաթալյանը և
Հակոբ Բաբախանյանը:

Ընդունելությանը հրավիրված էին նաև
տ. Կոմիտաս և տ. Արսեն սրբազանները,
Գերագույն հոգևոր խորհրդի անդամներ
դոկտ.-պրոֆ. Սարգիս Մելիքսեթյանը,
դոցենտ Հովհաննես Թոփուզյանը, Վեր-
ստուգիչ հանձնաժողովի անդամ Եփրեմ
Ալեքսանյանը, «Էջմիածին» ամսագրի խմբ-
ագիր Արթուր Հատիսյանը, Մայր Աթոռի
Միջեկեղեցական հարաբերությունների
բաժնի ընդհանուր քարտուղար Պարզև
Ծահրազյանը, Մայր Աթոռի ֆինանսական
բաժնի վարիչ Գառնիկ Քեհչալյանը, տրև-
տեսական բաժնի վարիչ Անդրանիկ Ու-
թույանը, Մայր Աթոռի փոխադրական մի-
ջոցների բաժնի վարիչ Լևոն Խոջամիրյանը
և արվեստագետ-ուկերիչ Ժիրայր Չուլույա-
նը:

Սեղանն օրհնում է Հայոց Հայրապետը: Հանուն բոլոր ներկաների տ. Կոմիտաս արքեպ. Տեր-Ստեփանյանը ջերմ խոսքերով շնորհավորում է Հայոց Հայրապետի Նոր տարին՝ մաղթելով, որ 1976 թվականին էլ իրագործվեն Նորին Աթոռության շինարարական ծրագրերը:

Այնուհետև, խոսք առնելով, Վեհափառ Հայրապետը շնորհավորում է բոլոր ներկաների Նոր տարին՝ շեշտելով այս առթիվ մանավանդ, իր կողքին, իր գահակալության քսան տարիների ընթացքում, Մայր Աթոռին առընթեր ճարտարապետների հանձնաժողովի կատարած շինարարական-վերանորոգչական աշխատանքները, և, դրանք արժանացնելով հայրապետական իր բարձր ուշադրությանը և գնահատությանը, մաղթում, որ մեր ճարտարապետներն այսուհետև էլ իր կողքին լինեն՝ մարմին տալու համար Մայր Աթոռի շինարարական ծրագրերին՝ ի վայելումն ազգիս հայոց:

Հանուն Մայր Աթոռին առընթեր ճարտարապետների հանձնաժողովի, նրա նախագահ դոկտ.-պրոֆ. Վարազդատ Հարությունյանը շնորհակալության և երախտագիտության սրտագին խոսք է ուղղում Հայոց Հայրապետին և խոստանում՝ եռանդով ու պատասխանատվության բարձր զգացումներով, ինչպես անցնող տարիների ընթացքում, այսուհետև էլ շարունակել իրենց վստահված շինարարական աշխատանքները և արդարացնել Հայոց Հայրապետի մեծ վստահությունը:

Մայր Աթոռին առընթեր ճարտարապետների հանձնաժողովի շնորհաշատ և համակրելի անդամ է նաև ճարտարապետարվեստագետ Բաղդիկ Արզումանյանը՝ «Երևաննախագիծ» ինստիտուտի հատակագծման արվեստանոցի վարիչը:

Ծարտարապետ Բ. Արզումանյանը մեծ ու շնորհակալ վաստակ ունի նաև հայրապետական մի շարք պատմական, հոբելյանական կոնդակների, եկեղեցական արվեստի գործերի նախագծման աշխատանքներում, Մայր Աթոռի հրատարակությունների, «Էջմիածին» ամսագրի նկարազարդումների գեղարվեստական ձևավորման բնագավառում:

1976 թվականի հունվարի 1-ին լրացավ ճարտարապետ Բ. Արզումանյանի ծննդյան 60-ամյակը:

Ծարտարապետ Բաղդիկ Արզումանյանի 60-ամյակը և նրա շնորհալի գեղագիտական վաստակը Մայր Աթոռում իր մասնավոր ուշադրությանն ու գնահատությանն է արժանացնում Հայոց Հայրապետը հունվարի 3-ի ընդունելության ժամանակ և, շնորհավորելով հոբելյարին, մաղթում նրան նորաճար հաջողություններ իր ապագա գործում՝ հուրախություն իր սրտի և ի փառս հայ եկեղեցական արվեստի:

Հարգելի հոբելյարին այս ուրախ առիթով շնորհավորում են նաև դոկտ.-պրոֆ. Վարազդատ Հարությունյանը և ժողովրդական նկարիչ Գրիգոր Խանջյանը:

«Էջմիածին» ամսագրի խմբագիր Արթուր Հատիտյանը, խոսք առնելով, շեշտում է Վեհափառ Հայրապետի նախագահությամբ Մայր Աթոռին առընթեր ճարտարապետների հանձնաժողովի կատարած օգտակար աշխատանքները, որոնք Հայոց Հայրապետի տեսիլքներն ու վեհ ապրումները հավերժացրին մի անգամ ևս ս. Էջմիածնի հազարամյա քարերի վրա, որպեսզի երազը անգամ մը ևս իրականություն դառնա, ինչպես հաստատում է Վեհափառ Հայրապետը: Արդարև, քսան տարիների ընթացքում Հայոց Հայրապետը սկսած է շինել, ինչ որ անցյալի մեջ չար ձեռքեր քանդեցին, դարեր ու դարեր, և Մայր Աթոռում դրված յուրաքանչյուր մի նոր քար դարձավ վկայությունը հայ ժողովրդի կառուցողական, ստեղծագործ ոգու:

Իր խոսքի ավարտին Ա. Հատիտյանը նույնպես շնորհավորեց շնորհալի ճարտարապետ Բաղդիկ Արզումանյանի ծննդյան 60-ամյակը:

Վերջում, ի մասնավորի Հայոց Հայրապետին, և ապա բոլոր ներկաներին ուղղված շնորհակալության և երախտագիտության խոսք ասաց ճարտարապետ Բ. Արզումանյանը:

Ընդունելությունն ավարտվեց Վեհափառ Հայրապետի գոհաբանական աղոթքով:

Ա. Հ.





ԵԿԵՂԵՑԱԿԱՆ ԲԵՄ. ԼՈՒՐԵՐ

**Հունվարի 4-ին, կիրակի.—2 օր Ծնընդ-
եան պահոց.**

Այսօր Մայր տաճարում ս. պատարագ է մատուցում տ. Մոմիկ աթղ. Սարգսյանը:

*
* *

**Հունվարի 7-ին, չորեքշաբթի.—Բ օր
Ծնընդեան. Յիշատակ մեռելոց.**

Այսօր Մայր տաճարում ս. պատարագ է մատուցում տ. Հակոբ քհն. Հակոբյանը:

Հավարտ ս. պատարագի կատարվում է հոգեհանգստյան պաշտոն՝ «վասն համօրէն ճնջեցելոց»:

*
* *

**Հունվարի 9-ին, ուրբաթ.—Այսօր, երե-
կոյան ժամը 18-ին, Վեհափառ Հայրապե-
տի նախագահությամբ, Երևանի հայրապե-
տական վիլլայում տեղի է ունենում Գերա-
զույն հոգևոր խորհրդի հերթական նիստը,
որտեղ քննարկվում է աղետի հետևանքով
Վեհնտիկի հայոց ս. Դազար վանքի կրամ
նյութական մեծ կորստի հարցը:**

*
* *

**Հունվարի 11-ին, կիրակի.—2 օր Ծնընդ-
եան.**

Այսօր Մայր տաճարում պատարագ է մատուցում վրահայոց թեմի առաջնորդ տ. Գևորգ եպս. Սերայդարյանը:

*
* *

**Հունվարի 12-ին, երկուշաբթի.—Ամանո-
րի և ս. Ծննդյան տոների արձակուրդներից
հետո հոգևոր ճամարանում վերսկսվում են
դասավանդությունները:**

*
* *

**Հունվարի 13-ին, երեքշաբթի.—Տօն ան-
ուանակոչութեան Տեառն մերոյ Յիսուսի
Քրիստոսի.**

Այսօր Մայր տաճարում ս. պատարագ է մատուցում տ. Եզնիկ վրդ. Պետրոսյանը:

*
* *

Նույն օրը. Մոսկվայում, ռուս պրավոս-
լավ եկեղեցու արտաքին հարաբերություն-
ների բաժնի կենտրոնում, գումարվում է
Մոսկվայի Խաղաղության ուժերի բարե-
կամների միջազգային համաժողով նախա-
պատրաստող կոմիտեի խորհրդակցական
ժողովը, որին, հանուն Մայր Աթոռի և հայ
եկեղեցու, մասնակցում էր դիվանապետ տ.
Արսեն եպս. Բերբերյանը՝ որպես կոմիտեի

տաաը հոգուց բաղկացած անդամներից մեկը:

Սույն խորհրդակցությունում որոշվել է մարտի 29—31-ը Մոսկվայի մոտ, ռուսական Ջագորսկ վանքում, հրավիրել խաղաղության ուժերի բարեկամների միջազգային համաժողով նախապատրաստող կոմիտեի ընդլայնված նիստը, միջազգային մակարդակով:

Մոսկվայի խաղաղության ուժերի բարեկամների միջազգային համաժողովը հրավիրվելու է Մոսկվայում, 1977 թվականի սկզբներին:

Տ. Արսեն եպս. Բերքերյանը Մայր Աթոռ վերադարձավ հունվարի 20-ին:

* *

Նույն օրը, Ամանորի և ս. Ծննդյան տոների առթիվ, Վեհափառ Հայրապետն այցելում է Երևան, Արարատյան թեմի առաջնորդարան, ուր Նրան ջերմորեն դիմավորում են Արարատյան թեմի առաջնորդական փոխանորդ տ. Կոմիտաս արքեպ. Տեր-Ստեփանյանը և թեմականի պատվարժան անդամները:

Վեհափառ Հայրապետին ողջեցում էին Մայր տաճարի լուսարարապետ տ. Հուսիկ եպս. Սանթրոյանը, «Էջմիածին» ամսագրի խմբագիր Ա. Հատիսյանը, Մայր Աթոռի Միջեկեղեցական հարաբերությունների բաժնի ընդհանուր քարտուղար Պ. Ծախազյանը և Մայր Աթոռի ֆինանսական բաժնի վարիչ Գ. Քեհյայանը:

Առաջնորդարանում Վեհափառ Հայրապետի պատվին տրվում է ընդունելություն:

Տ. Կոմիտաս արքեպ. Տեր-Ստեփանյանը, հանուն թեմի, ողջունում է Վեհափառ Հայրապետի ներկայությունը և զեկուցում թեմում կատարված եկեղեցական-վանական նորոգչական աշխատանքների մասին:

Վեհափառ Հայրապետի ներկայությունը ողջունում են նաև տ. Ռուբեն ավագ քհն. Մարտիրոսյանը, թեմականի ատենապետ Մուշեղ Սերոբյանը, Զավեն Աղասյանը, Գուրգեն Մուրադյանը, ապա Ա. Հատիսյանը և Գ. Քեհյայանը:

Վերջում օրհնության խոսք է ասում Վեհափառ Հայրապետը, շնորհավորում բոլորի Նոր տարին և ս. Ծնունդը ու ցանկություն հայտնում, որ մինչև ընթացիկ տարվա սեպտեմբեր ամիսն ավարտվեն ս. Սարգիս եկեղեցու վերանորոգչական աշխատանքները, որպեսզի սեպտեմբերի հանդիսությունների ժամանակ կատարվի վերանորոգված եկեղեցու հանդիսավոր բացումը:

Հունվարի 17-ին, շաբաթ.—Հին տոմարով Ամանորի և ս. Ծննդյան տոների առթիվ, պատարագելու և Բանին կենաց քարոզությամբ հավատացյալների միաթաղության համար, Կիրովաբադ է մեկնում տ. Հուսիկ եպս. Սանթրոյանը՝ ընկերակցությամբ Միաք արկ. Մարգարյանի, Ախալքալաք՝ տ. Մոսիկ արք. Մարգարյանի, Արմավիր՝ տ. Հովսեփ քհն. Հակոբյանի, իսկ Թբիլիսի՝ Կիրակոս արկ. Հովհաննիսյանի:

* *

Հունվարի 18-ին, կիրակի.—Ա. Կիրակի զկնի Ծննդեան.

Այսօր Մայր տաճարում ս. պատարագ է մատուցում տ. Տիրան արք. Կյուրեղյանը և «Հայր մեր»-ից առաջ քարոզում «Եթե ոչ ոք ծնցի ի ջրոյ և ի Հոգւոյ, ոչ կարէ մտանել յարքայութիւն Աստուծոյ» (Հովհ. Գ 5) բնաբանով:

* *

Հունվարի 25-ին, կիրակի.—Բ. Կիրակի զկնի Ծննդեան.

Այսօր Մայր տաճարում ս. պատարագ է մատուցում տ. Մասիս վրդ. Գալստյանը և քարոզում «Յիշեաչիր զօրն շաբաթոց սրբել զնա» (Ելք Ի 9) բնաբանով:

Ս. պատարագին ներկա էր Վեհափառ Հայրապետը:

* *


Հունվարի 26-ին, երկուշաբթի.—Այսօր, երեկոյան ժամը 18-ին, Վեհափառ Հայրապետի նախագահությամբ, Վեհարանում գումարվում է Գերագույն հոգևոր խորհրդի հերթական նիստը:

Գերագույն հոգևոր խորհուրդը Նոր Նախիջևանի և Ռուսաստանի թեմի առաջնորդական տեղապահ է նշանակում Մայր Աթոռի միաբան տ. Տիրան արքեպ. Կյուրեղյանին:

* *

Հունվարի 29-ին, հինգշաբթի.—Այսօր, ժամը 17-ին, Վեհափառ Հայրապետը հանգրստանալու մեկնեց Կիսլովոյսկ, «Կրասնի կամեն» ատոլջարան:

Նորին Սրբությանն ողջեցում էր տ. Տիրան արք. Կյուրեղյանը:



ԳՐԻԳՈՐ ԱՐՇԱԿԻ ՀԱԿՈՒՅԱՆ

ԿՈՄԻՏԱՍ ԿԱԹՈՂԻԿՈՍԻ «ԱՆՁԻՆՔ ՆՈՒԻՐԵԱԼՔ» ԾԱՐԱԿԱՆԸ

Կոմիտաս կաթողիկոսի կյանքի և գործունեության մասին որոշ տեղեկություններ է հաղորդում Սեբեոս պատմիչը: Ապրել ու գործել է 7-րդ դարում: Եղել է Տառնի Գլակա վանքի առաջնորդը: Այս շրջանում նա աչքի է ընկնում դավանաբանական վեճերին ակտիվ մասնակցությամբ ու մեծ հմտությամբ: Սեբեոս պատմիչը հաղորդում է, որ 618 թվականին Կոմիտաս կաթողիկոսը քանդում է Վաղարշապատում կառուցված ս. Հովհաննիսի հին, փոքր մատուռը՝ վերանորոգելու համար, «զի կարի ցած և մթին էր շինուածն, որ շինեալ էր սրբոյն Սահակայ հայրապետի հայոց կաթողիկոսի որդոց սրբոյն Ներսէսի»¹: Ապա պատմիչն այդ մասին հաղորդում է հետևյալը. «Արդ մինչդեռ քակէին զորմն մատրանն, երևեցաւ յանկարծակի լուսաւոր և չքնադագիտ արքունական մարգարիտն՝ այսինքն կուսական մարմին սրբոյ տիկնոջն՝ Հովհաննիսի: Եւ քանզի անդամ անդամ յառեցին զնա յառել ի միմեանց. և երանելի, սրբոյն Գրիգորի կնքեալ մատնանա իրով և մատանեաւ երանելոյն Սահակայ հայոց կաթողիկոսի, զոր նա ոչ համարձակեցաւ բանալ: Եւ կնքեալ իրով ևս մա-

տանեաւ, որ արժանի իսկ էր կնքել զայսպիսի մարգարիտ՝ երից հաւատարմաց երրորդ մատանեալք»²: Ահա այս դեպքն է պատճառ դառնում գրելու «Անձինք նուիրեալք» սքանչելի շարականը: Սեբեոսին ծանոթ է եղել «Անձինք»-ը: Ս. Հովհաննիսի և Կոմիտաս կաթողիկոսի մասին նա հիացմունքով բացականչում է. «Ո՛ր մարգարիտ, որ ոչ ծովածին, այլ մարգարիտ, որ ծնեալ ի թագաւորական ազգէ, և սնեալ ի գիրկս սրբութեան և նուիրեալ Աստուծոյ, որում ցանկացեալ էին տեսանել զքեզ արդարք, և խանդակաթ էր ի սէր քոյ երանելին Կոմիտաս»³:

«Անձինք»-ի նյութը հեղինակը վերցրել է Ագաթանգեղոսից և գեղարվեստորեն մշակել: Սա ըստ էության մի ներբող-փառաբանություն է՝ նվիրված ս. Հովհաննիսյանց կույսերին, և մեր շարականների մեջ հոգևոր առաջին չափածո գործն է, որ գրված է այբուբենի կարգով: Դրանից հետո է, որ մեր չափածո հոգևոր և աշխարհիկ գործերում, հետևելով Կոմիտասին, գրում են այդ ձևով: Այս պոեմը մեր շարականների մեջ աչքի է ընկնում իր վեհ գաղափարներով, գեղարվեստական բազմազան

¹ Սեբեոս եպիսկ., Պատմ., Թիֆլիս, 1913 թ., էջ 141:

² Սեբեոս, նշվ. աշխ., էջ 141:

³ Անդ, էջ 141:

ու նոր ձևերով և, որ գլխավորն է, ջերմ քնարականությամբ ու երկյուղած բարեպաշտությամբ: Պոեմում բանաստեղծը հեռապահով է երկու հիմնական նպատակ՝ ցույց տալ և Հոփսիսիանց նվիրվածությունը իրենց հավատին ու համոզմունքներին, նրանց հոգեկան կորուվը, աշխարհիկ, բռնակալ ուժի պարտությունը: Հոգեկան գեղեցկության հաղթանակը մարմնականի վրա՝ մի կողմից, իսկ մյուս կողմից՝ հորինել մի արժանավայել ներքող Հոփսիսիանց կույսերի տոնին նվիրված: Պոեմում մի քանի տեղ է հիշվում այդ մասին.

«Ցնծությամբ տոնեցուք, գլիշատակըս
նոցունց,
Զի և նոցին հաղորդեցուք փրկութեան,
Խնդրելով յԱրարչէն գարգես երկնաորս,
Եւ զդասիլն ընդ նոսին ի յարկան լուսեղէն»:

Այս անգուգական երկի հորինելու և կույսերի տոնին նվիրելու նպատակը երևում է «Անձինք»-ի հենց սկզբի տողերից.

«Անձինք նուիրեալք սիրուն Քրիստոսի,
Երկնաոր նահատակք և կուսանք
իմաստունք,
Ի պարծանս ձեր բարձրացեալ տօնէ
Մայր սիրովն դստերօքն իւրովք»⁴:

Իսկ ո՞րն է շարականի հիմնական գաղափարը, և այն գեղարվեստական ինչպիսի՞նք՝ նոր ձևերով ու պատկերներով է դրսևավորվել: Բանաստեղծը ցույց է տալիս, որ անձնորաց, Քրիստոսի սիրուն նվիրված կույսերը եկել են Հայաստան աշխարհ՝ քրիստոնեություն տարածելու: Քրիստոսն իսկ կույսի՝ Հոփսիսիանի մարմնական գեղեցկությամբ տարվում է հեթանոս, բռնակալ թագավորը: Վերջինս ուզում է տիրանալ գեղեցկուհի Հոփսիսիանին: Սակայն Հոփսիսիան անհողողող, աննվաճելի է: Սկսվում է հոգեկան և մարմնական պայքարը հզոր թագավորի և տկար կույսի միջև: Հաղթում է Հոփսիսիան: Ահա սա է այս մեծ ներքողի հիմնական գաղափարը, որի շուրջը պտտվում են շարականում եղած բոլոր մտքերն ու պատկերացումները, այլաբանություններն ու խոսքի գեղարվեստական բոլոր ձևերը: Իսկ ինչպե՞ս է այդ ամենը ներկայացվել և ինչպիսի՞ հաջորդականությամբ ու զարգացմամբ: Ամենից առաջ երևան է գալիս հոգեկան և մարմնական գեղեցկության վերաբերյալ բանաստեղծի

նորորակ, ինքնատիպ ըմբռնումը: Բախվում են հոգեկան և մարմնական գեղեցկությունները: «Անձինք»-ի մեջ հոգեկան գեղեցկության կողքին միաժամանակ փառաբանվում է նաև մարմնական գեղեցկությունը:

«Գեղեցկությունք մարմնաոր պայծառությամբ
Յիմարեցուց զթագաւորն և պակեան
հեթանոսք,
Ի գեղ սքանչելի աստուածատոր
կուսանացն
Տարփացեալ զուարթունքն ընդ մարդկան
տօնեցին»⁵:

Այստեղ ս. կույսերի երկրային գեղեցկությամբ մահկանացու մարդկանց հետ հիացած են նաև երկնային «զուարթունքն», այսինքն հրեշտակները: Աշխարհիկ գեղեցկության մեծարումն ու նման փառաբանումը, այն էլ հոգևոր երգերում, 7-րդ դարի համար ոչ միայն նորություն ու առաջադիմական մտայնություն էր, այլև մեծ համարձակություն: Այդ մարմնական գեղեցկության հանդեպ անզորանում և հիմարանում են աշխարհի թագավորները, նրանց հետ և հեթանոսները: Հոփսիսիանին տիրանալու համար տենչում է ոչ միայն հայոց թագավորը, այլև ուրիշ թագավորներ, և մի ներքին խնդությամբ ուզում էին տիրանալ այդ մարմնավոր «մարգարտին»:

«Ի վերայ միոյ պատուական մարգարտի,
Խաղացին ցընծալով ամենայն հեթանոսք...
Լուան թագաւորք և լցան խնդութեամբ»⁶:

Ու սկսվում է մի պայքար գեղեցիկ կույսերի և գրավիչ գեղեցկությամբ հարբած հեթանոս թագավորի միջև: Եթե կույսերի մարմնական գեղեցկությամբ մարդկանց հետ հիացել էին նաև հրեշտակները, ապա այժմ, երբ սկսված է ճակատումը կույսերի և թագավորի միջև, այդ տեսարանով հետաքրքրվում է նաև ամենակարող Արարիչը, որը երկնքի բարձունքներից խոնարհվում և դիտում է այդ ճակատամարտը.

«...Քանզի էնն Աստուած ամենագօր
զօրութեամբն
Խոնարհեալ տեսանէր զհանդէս
կուսանացն»⁷:

⁴ Շարական հոգևոր երգոց, Երուսաղիմ, 1936 թ., էջ 581—582:

⁵ Անդ, էջ 573:

⁶ Անդ, էջ 573—574:

⁷ Անդ, էջ 575—576:

⁸ Անդ, էջ 574—575:

Այդ պատերազմում անհողորդը ու անսասան էին կույսերը, որոնք հոգեպես սերտ կապված էին իրար հետ: Հեղինակը ցույց է տալիս, թե ինչպես մարմնով այդ թույլ արարածները հոգով կորովի են և արհաբար ճակատամարտի մեջ են մտնում՝ հույսը իրենց հավատի ու հաղթանակի վրա դրած⁹:

«Միաբան ընթացեալք ի տեղի ճակատու, Զիենցան հաւատով և կացին յանդիման»⁹:

Պատկերավոր է տրված նաև այդ անհավասար, հոգեկան և մարմնական պատերազմի ելքը՝ վախճանը: Չնայած Տրդատըն ունի հզոր ուժ, զենքի զանազան տեսակներ, սակայն այդ ամենը նսեմանում, անզորանում են հզոր հոգի ու հավատ ունեցող կույսերի հանդեպ, ու մարտից հաղթանակով դուրս են գալիս մարմնով տկար կույսերը, իսկ թագավորը ոչ միայն պարտվում, այլև ամոթահար է լինում:

«Թագաւորն պերճացեալ զօրութեամբ և փառօր, Ի մանուկ ի կուսէն պարտեալ ամաշէր»¹⁰:

Ըստ բանաստեղծի կույսերը ոչ միայն քրիստոնեական նոր հավատն էին քարոզում, այլև սպալար էին մղում սնտիսպաշտության, տգիտության ու խավարի դեմ: Այստեղ հեղինակը ցույց է տալիս քրիստոնեության աշխարհայացքի վեհությունը հեթանոսական կրոնների համեմատությամբ:

Ա. Բառնալով զխաւար դիւսպաշտ մոլորութեանց յաշխարհէ...

Բ. Բաշխեն զքծշկութիւն հոգւոց և մարմնոց...

Գ. Փարստեցին զխաւար դիւսպաշտ մոլորութեանց...

Դ. Եւ եղեն փրկանք անձանօք աշխարհին...

Ե. Պայծառացեալք լուսովն որ ի Հօրէ ծագեցաւ...

Զ. Ռահս յոլովս առաքինութեան յայտնեցին...

Եվ, վերջապես, կույսերն իրենց նահատակությամբ դարձան «զոհք փրկութեան...»՝ նոր հավատ և լուսավորություն տարածելու համար ոչ միայն Հայաստանում, այլև ամբողջ Կովկասում: Եվ կույսերը անձնուրաց կերպով, տանելով գաղափարական հաղթանակ, հասնում են իրենց նպատակին: Նրանց ցանած հավատի սեր-

մը անում է շատ ազգերի մեջ, և որոնք լուսավորվում ու հոգով զարգանում են կույսերի քարոզած գաղափարներով:

«Ծնան կուսանք ազգս բազումս»,

ազգեր, որոնք

«Անեցին հաւատով զարդարեալք ի Բրիստոս»¹¹:

Կույսերի տարած հաղթանակը, նոր գաղափարների տարածումը Հայաստանում և ուրիշ երկրներում բանաստեղծի հոգին լցնում է բերկրությամբ: Այստեղ նա ավելի ոգևորված և ավելի քնարականությամբ ներբողում է կույսերին՝ գեղեցիկ պատկերներով, այլաբանություններով ու համեմատություններով, որտեղ միաժամանակ դրսևեկորվել է նաև իր՝ բանաստեղծի վերաբերմունքն իր պոեմի հերոսների նկատմամբ: Նրանք «երկնային քարքառներով» լցրել են երկիրը, որպես «բանաւոր ողջակեզք» իրենց անուշ հոտով բուրել են «ի Բրիստոս». ողջակեզվելու համար նրանք ընտրվել են Աստուծո կողմից որպես «որոշք անարատ»: Վերոհիշյալ բոլոր պատկերների մեջ հորդում են բանաստեղծի ոգևորությունն ու սերը, երախտագիտական զգացումները և փառաբանական մոտիվները: Հայոց հոգևոր երգի մեջ, մինչև Կոմիտասի «Անձինք»-ը, որպես կին ինչպես և ամբողջ քրիստոնյա աշխարհում փառաբանվել ու ոգևորության առարկա է եղել Տիրամայրը՝ Մարիամ Աստվածածինը: Կոմիտասի երգի հերոսները կանայք են: Այս հանգամանքը նորություն էր մեր հոգևոր երգի մեջ թե՛ իր թեմայով և թե՛ իր ձևով ու բովանդակությամբ: Տիրամայրը նվիրված ջերմաշունչ բազմաթիվ «Մեծացուսեցներ»-ի մեջ. բանաստեղծները նկատի են ունեցել ոչ թե կինը, Մարիամի «...մարմնաւոր գեղեցկութեան պայծառութիւնը», այլ միայն այն, որ նա Աստվածածին է՝ լցված երկնային զորությամբ և շնորհներով, որովհետև նա Փրկչի մայրն է: Այստեղ փառաբանվում են Աստվածածնի աստվածային, գերմարդկային, ոչ աշխարհիկ կողմերը: Այդպես չէ, սակայն, ոչ պակաս փառաբանական մոտիվներ ունեցող Կոմիտասի «Անձինք» բանաստեղծությունը: Այստեղ ներբողվում են մարդկային, երկրային գծերով օժտված մի խումբ կանայք, որոնք եկել էին, ըստ ավանդության, արևմուտքի երկրներից՝ Հայաստանում, Վրաստանում և Աղվանքում նոր կրոն և լուսավորություն

⁹ Անդ, էջ 375:

¹⁰ Անդ, էջ 575:

¹¹ Անդ, էջ 576:

տարածելու համար: Միշտ է, այստեղ էլ հեղինակը կույսերին օժտել է գերմարդկային, երկնային գծերով: Կույսերը, «խաչակից լինելով կուսածին Արարչին», ունեցել են «արարչագործ զօրություն», սակայն, ըստ էության, կույսերը երկրային ու մարդկային են:

«Փառաց ի փառս բարձրացեալ պարծին, Ի պատիւ և ի փառս երեսուն և եօթեանքն. Քանզի այս է թիւ երանեալ կուսանացն, Որք անթառամ պսակեցան յանվախճան յաիտեանն»:

Կույսերին նվիրված Կոմիտասի այս հոգեվոր երգը «հագեցված է կյանքով ու շերտությամբ»¹², հետևաբար ոչ զուրկ աշխարհիկ երանգներից: Սակայն Կոմիտաս կաթողիկոսը կույսերի գեղեցկության «մարմնական պայծառությունն» ու աշխարհիկ կողմերը չանտեսելով հանդերձ, առաջնությունը տալիս է հոգեկան գեղեցկության ուժին, քանի որ կույսերը պայքարում են ոչ թե մարմնական, ժամանակավոր, այլ հոգեկան, հավիտենական կյանքի գեղեցկությունների համար.

«Մերժեցին զկարիս մարմնական
կենցաղոյս,
Զի ծանեան եթէ երազ է և սուտ
պաճուճանք,
Ոչ հեշտացան ի գրկանս փափկութեան,
Իմացան եթէ սնոտի է անցաւոր
մեծություն»¹³:

Բանաստեղծը համոզված է, որ Հոփիսիմյանք այնպիսի հերոսություն ու անձնագոհություն են ցույց տվել աշխարհին, որ կարող են իրենց նահատակությամբ բաղձալի օրինակ ծառայել բոլորի համար.

«Զեզ նմանիլ կարոտին ամենայն հոգիք»¹⁴:

Ահա այս խնդիրներն են կազմում Կոմիտասի «Անձինք» շարականի գաղափարական և փառաբանական բովանդակությունը, նրա հիմքն ու էությունը:

Այժմ փորձենք տեսնել, թե վերոհիշյալ գաղափարները գեղարվեստորեն ինչպե՞ս են մարմնավորվել և ինչպիսի՞ ձևերով են դրսևորվել «Անձինք նուիրեալք»-ում:

Քրիստոսի հավատի համար մարտնչող

մարտիրոսներին ու նահատակներին նվիրված շարականներում ներքողական և փառաբանական մոտիվները նորություն չէին և՛ մեր, և՛ քրիստոնյա եկեղեցու հոգևոր երգերում: Սակայն այդ մոտիվները նոր ձևերով, թարմ պատկերներով, ջերմ զգացմունքներով և խոր քնարականությամբ են արտահայտվել Կոմիտասի մոտ: Թեպետ «Անձինք»-ը ծավալով համարվում է մեր մեծագույն շարականներից, գրված է այբուբենի կարգով, ու ամեն տան մեջ մենք հանդիպում ենք ներքողի ու փառաբանության, սակայն չեն երևում այն կրկնությունները, ինչպես այդ կարգի մեր մյուս շարականներում: Այստեղ ամեն մի այլաբանությունը, համեմատությունն ու հակադրությունն ունի իր ուրույն երանգն ու տեղը, թարմությունն ու նորությունը: Ծարականի հեղինակը ոչ միայն օժտված է բանաստեղծական մեծ տաղանդով, ունի նուրբ ճաշակ, դիտողական ձիրք, այլև մտավոր մեծ պաշար, որը հնարավորություն է տալիս հեղինակին իր մտքերն արտահայտելու բազմափոփոխ ձևերով ու եղանակներով: Նա քաջ ծանոթ է անտիկ աշխարհի արվեստին ու գրականությանը և հոգևոր երգին: Բանաստեղծը գեղարվեստորեն է օգտագործել նույնիսկ Հոփիսիմե հատուկ անվան իմաստը:

Հոփիսիմե հունարեն «նշանակե՛լ ընկեցեալ... բայց ոմանք համարին կրճատութեամբ ստեալ ի յունականէն Էֆրօսիմի, իբրև թէ բարեխորհուրդ, քաջախորհուրդ, և թերևս յայս հայեցեալ յօրինող շարականիս ասաց մեծ խորհուրդ»¹⁵: Ահա Հոփիսիմեի անվան հունարեն իմաստը նկատի ունենալով, բանաստեղծը «Հ» տառով հորինել է հետևյալ գեղեցիկ տունը.

«Հոփիսիմե մեծ խորհուրդ և անուն
ցանկալի,

Ընտրեալ ի յերկրի և դասեալ ընդ

հրեշտակս,

Եղեր օրինակ սրբութեան կուսանաց,
Վարդապետութիւն արանց արդարոց»¹⁶:

Ո՞րն է այդ «մեծ խորհուրդը», որը հեղինակը այլաբանորեն կապում է Հոփիսիմեի անվան հունական իմաստի հետ: Բացի այն, որ այդ իմաստուն կույսերը նոր վարդապետություն են տարածում, բանաստեղծը դրանց ղեկավարի՝ Հոփիսիմեի անվան հետ է կապում մի ուրիշ մեծ խոր-

¹² Մ. Մկրյան, Գր. Նարեկացի, Երևան, 1955 թ., էջ 32:

¹³ Ծարակ., էջ 578:

¹⁴ Անդ., էջ 577:

¹⁵ Հ. Գ. Ավետիսյան, Բացատրություն շարականաց, Վեներտիկ, 1814, էջ 440:

¹⁶ Ծար., էջ 577:

նորոգ, որը հասնում է մինչև նախամարդը՝ Ադամն ու Եվան: Եվայի կատարած մեղքի պատճառով դատապարտվել է ամբողջ մարդկությունը: Ահա Տիրամորից հետո Հոփսիսիմեն է, որ իր կյանքի գնով մարդկությանն ազատում է նախամոր հավիտենական մեղքից:

«Երկունք մահաբերք անիծիցն լուծան,
Եւ Ադամ վերստին աստուածակերպ
ճոխանայ,
Փոխանակ Եւայի դստերըք նորա,
Մարտիրոսք և կուսանք ընծայելոք
Աստուծոյ»¹⁷:

Հոփսիսիմեն պատկերվում է որպես դրախտ. եղեմի այն պարտեզը, որտեղից վտարվել էր Եվան: Հոփսիսիմեն օժտված է երկնային զորությամբ, նա զարդարում է մարդու համար Աստծո կողմից ստեղծված պարտեզը՝ այնտեղ տնկելով նոր, կենաց ծառ:

«Դարձեալ վերստին արարչագործ
զօրութիւն,
Եւ դարձեալ եղեմ աստուածատունկ
զարդարի.
Քանզի ծառն կենաց տնկեցաւ ի դրախտին,
Բերելով մեզ պտուղ զերանելին
Հոփսիսիմէ»¹⁸:

Գեղեցիկ հակադրություններ են բռնակալ զորեղ թագավորի և նվիրված գաղափարական տկար կույսերի, հոգեկանի և աշխարհիկ վայելքների պայքարի հաղթանակի և պարտության տեսարանները: Թագավորը կորույթի է և ունի հաստաձիգ աղեղներ, իսկ կույսերը ոչ միայն անզեն են, այլև թույլ ու տկար: Թագավորը հոխորտում է իր պերճությամբ ու փառքով, բայց հաղթում են կանայք՝ իրենց հոգու և հավատի զորությամբ:

Կույսերի և թագավորի պայքարի տեսարանն այնքան զարմանալի է եղել և ուշագրավ, որ ոչ միայն աշխարհիկ հեթանոս բազմությունն է հավաքվել՝ այդ անհավասար պատերազմը դիտելու, ոչ միայն հրեշտակներն էին տարվել կույսերի գեղեցկությամբ, այլև Աստված ինքը երկնքի բարձունքներից խոնարհվել և նայում էր այդ պայքարի տեսարանին:

«Քանզի էնն Աստուած ամենագոր
զօրութեամբն

Խոնարհեալ տեսանէր զհանդէս
կուսանացն»¹⁹:

Պոեմի մեջ բազմատեսակ ու նոր ձևերով է պատկերվում Հոփսիսիմեն: Այնքան պայծառ ու կատարյալ է դառնում նրա կերպարը: Հոփսիսիմեն նման է մի «պատվական մարգարտի», որին տիրանալ են ձրգտում հեթանոսները, բայց այդ չի հաջողվում: Այդ մարգարտը եկել է Հայաստան իր ընկերներով՝ ազգերը լուսավորելու և նոր գաղափարների «չքնաղ տեսութիւնը քարոզելու»: Եվ այդ նրանց հաջողվում է նահատակության գնով: Այլաբանորեն և վառ համեմատություններով է պատկերված նաև այդ նահատակությունը:

Բանաստեղծը հոփսիսիմյանց գործունեությունը և նահատակությունը համարում է այն լուսավոր ճանապարհները, որով հնարավորություն ստեղծեցին «եղանել ամենայն մարդոյ առ Աստուած»:

Կոմիտաս կաթողիկոսն իր շարականի հերոսների կերպարներն ավելի պայծառ ու ամբողջական դարձնելու համար չի սահմանափակվում միայն այլաբանություններով, հակադրություններով, համեմատություններով, իրական և կրոնական կյանքից վերցրած պատկերներով: Իր խոսքն ավելի ազդու, կույսերի, առանձնապես Հոփսիսիմենի կերպարն ավելի վառ կերտելու նպատակով նա դիմում է խոսքի նաև ճարտասանական ձևերին ու եղանակներին: Կույսերի հոգեկան հարստությամբ, կորույթով ու հաղթությամբ հիացած, բացականչում է.

«Ո՛վ զգաստութեան իմաստուն
կուսանացն,
Որոց ոչ յաղթեաց հեղգութիւն և քուն»²⁰.

Կամ կույսերի փառաբանության կապակցությամբ, պոեմի վերջում, խոսքն ուղղվելով Քրիստոսին, ասում է.

«Քեզ, որ ցնծութիւնդ ես Քրիստոս
Աստուած.
Եւ ուրախութիւն ամենայն արդարոց,
Քաղցրասցին վասն մեր աղաչանք սրբոցն,
Ծնորհելով զթողութիւն մեր բազում
յանցանաց»²¹:

Հոփսիսիմյանք պատկերված են որպես հոգևոր հերոսներ, որոնք իրենց նա-

¹⁷ Աճ, էջ 574:

¹⁸ Աճ, էջ 574:

¹⁹ Աճ, էջ 574—575:

²⁰ Աճ, էջ 579:

²¹ Աճ, էջ 582:

հատկությունը մարդկության համար դարձան՝

«Շինուածք երկնատրք ի յերկրի
հաստատեալք,
Եւ արծանք լուսեղէնք ի յերկինս
կանգնեալք»...²²

Պոեմի վեհ տրամադրությունները, ջերմությունն ու անմիջականությունը, վճիռ պարզությունը, ճոխ, բազմատեսակ համեմատությունները, գեղեցիկ պատկերների շղթան, սահուն ու աշխույժ ոճը, ճաշակավոր չափը,—այս բոլորն «Անձինք նուիրեալք»-ը դարձնում են գեղարվեստական մի գոհար և մեր հարուստ Ծարակնոցի պսակն ու պարծանքը:

«Անձինք»-ը որպէս կատարյալ մի մեծ հոգևոր երգ հանկարծակի չծնվեց և պատահական երևույթ չէր: Կոմիտասից երկու դար առաջ սկզբնավորվելով, մեր հոգևոր երգը մի հարյուրամյակի ընթացքում ունեցավ բուռն զարգացում և նախադրյալ հանդիսացավ հետագա դարերի ոչ միայն հոգեվոր երգերի, այլև աշխարհիկ քնույթի բանաստեղծության զարգացման համար: Սահակ Պարթևի գրած շարականների լեզվի պարզությունը, մտքերի ու գաղափարների վեհությունը, Մաշտոցի հուզաթափանչ ու պատկերավոր ապաշխարության մոտիվները, բազմազան դարձերով ու երաժրշտական ոսկեղենիկ լեզվով, Մ. Խորենացու՝ Ծննդյան և Տիրամորը նվիրված բազմաթիվ «Մեծացուցներ»-ն իրենց վեհությամբ, քնարականությամբ ու փառաբանական մոտիվներով, Հովհան Մանդակունու աղոթքներն ու «քարոզներն» իրենց գաղափարական, հայրենասիրական մոտիվներով և դարձյալ պարզությամբ ու ազգային հերոսների մեծարանքով և փառաբանությամբ,—այս ամենը որպէս ժառանգություն ու հայրենական ավանդ հասան Կոմիտասին, դարձան հիմք և առաղձ, կատարելագործվեցին, զարգացան

այս տաղանդավոր բանաստեղծ կաթողիկոսի ձեռքով, ու ծնվեց հայոց հոգևոր երգի փառքն ու պսակը՝ «Անձինք նուիրեալք» սքանչելի շարականը:

Բնականաբար, բարձր վարպետությամբ ստեղծագործված այսպիսի մի կատարյալ հոգևոր բանաստեղծությունը պիտի իր գործող ազդեցությունն ունենար ժամանակակից և հետագա դարերի հոգևոր երգերի և բանաստեղծությունների վրա՝ թե՛ ձևի, թե՛ ոճի և թե՛ բովանդակության կողմերով: Կոմիտաս կաթողիկոսն առաջինն էր, որ, շրջանցելով հոգևոր երգեր ստեղծելու ժամանակի գրական հին ավանդները, դուրս եկավ շարականների երեք տնանոց ծավալի անձուկ շրջանակներից, ոչ միայն լայնացրեց մեր հոգևոր երգի սահմանները, այլև գրեց հայոց այնպիսի տառերի կարգով, այնպիսի մի մեծ գործ, որպիսին նրա երեսունվեց տներից բաղկացած «Անձինք նուիրեալք» պոեմն է: Հետագայում մեր շարականագիրներից շատերը, Կոմիտասի օրինակով, այնպիսի կարգով շարականներ գրեցին, ինչպես Ներսէս Ծնորհալու «Այսօր անճառ», «Արարչական», «Առաւօտ լուսոյ», «Աշխարհ ամենայն», «Աստուած անեղ» հոգևոր երգերը, Հովհաննէս Մկրտչին նվիրված, Հովհաննէս Երզնկացու «Արեգական արդարության» շարականը, Աստվածածնի Վերափոխման տոնին նվիրված Կիրակոս Երզնկացու «Արևելք գերարփին» և այլն: Մեր «Մեծացուցներ» Ծննդյան ու Վերափոխման շարականների վրա ավելի գործող է «Անձինք»-ի բովանդակության և արվեստի ազդեցությունը:

Վերևում բերված փաստերը և համեմատությունները ցույց են տալիս, որ Կոմիտաս կաթողիկոսի «Անձինք նուիրեալք» շարականը ոչ միայն մեր հոգևոր երգերի գլուխ-գործոցներից է իր բարձր արվեստով, նոր ձևով ու նոր բովանդակությամբ, այլև այն հիմք հանդիսացավ բանաստեղծական մի նոր դպրոցի: Կոմիտասի «Անձինք»-ը ուսանելի օրինակ հանդիսացավ հետագա դարերի շատ բանաստեղծների, մանավանդ շարականագիրների համար:

²² Անդ, էջ 579:





**«ԾԱՆՍԱՊԱՐՀՈՐԴՈՒԹԻՒՆ
ՄԵՍՐՈՎԲԱՅ Դ. ԹԱՂԻԱԴԵԱՆՑ Վ. Ա. ՍԱՐԿԱՒԱԿԻ
ՍՐԲՈՅ ԷԶՄԻԱԾՆԻ Ի ՀԱՅՍ»**

Հայկական ՍՍՀ գիտությունների ակադեմիայի Մանուկ Աբեղյանի անվան Գրականության ինստիտուտի և Հայկական ՍՍՀ Կուլտուրայի մինիստրության Եղիշե Չարենցի անվան Գրականության և արվեստի թանգարանի գիտական խորհուրդների որոշումով, 1975 թվականի վերջերին Երևանում Հայկական ՍՍՀ գիտությունների ակադեմիայի հրատարակչությունը լույս է ընծայել **Գրական ժառանգություն** մատենաշարի 9-րդ հատորը՝ հետևյալ վերնագրով.

**«Մեսրոպ Թաղիադյան
Ուղեգրություններ, հոդվածներ և մամուլներ,
վավերագրեր» (618 էջ)**

«Գրական ժառանգություն» մատենաշարով լույս են տեսել մինչև այժմ Ալեքսանդր Ծատուրյանի և Նար-Դոսի ևս մամուլային, Ալ. Սայենդիարովի ևս մամուլները (ռուսերեն), Գևորգ Ախվերդյանի, Դանիել Վարուժանի, հ. Ղ. Ալիշանի ևս մամուլները, Արեվմտահայ գրողների ևս մամուլային, Դերենիկ Դեմիրճյանի «Անձնագրեր էջեր»-ը և «Ժամանակակից գրողների հուշերը հայ դասական գրողների մասին» աշխատությունները:

«Գրական ժառանգություն» մատենաշարի վերջերս հրատարակված 9-րդ հատորը ընդգրկում է «ս. Էջմիածնի սարկավագ», հմուտ մանկավարժ և հրապարակագիր, ակադավոր գրող ու թարգմանիչ, ջերմ հայրենասեր Մեսրոպ Թաղիադյանի (1803—1858) «Ժամապարհորդություն ի Հայս» (Ա հատոր) հայրենագիտական աշխատությունը, «Ժամապարհորդություն ի Պարս-

կաստան» (Բ հատոր), նրա շուրջ 40 հրապարակախոսական երկերն ու հոդվածները, օրագրերը, ավելի քան 40 նամակներն ու ճառերը և 17 վավերագրեր:

Սույն թվանդակակից հատորի բնագիրը (էջ 25—533) գիտական, բարեխիղճ ուսումնասիրություններով ու ծանոթագրություններով (էջ 537—601) հրատարակության է պատրաստել հմուտ մատենագետ Ռուզան Նանումյանը, որը և գրել է հրատարակված հատորի հետաքրքիր Հառաջաբանը (էջ 5—21): Հրատարակված սույն հատորն ունի նաև «Անձնանունների ցանկ» (էջ 603—615):

Հատորը խմբագրել է գրականագետ Պիոն Հ. Հակոբյանը:

Մեսրոպ Թաղիադյանը ԺԺ դարի 20—50-ական թվականներին մեր եկեղեցու տարեգրության և հայ մշակույթի անդաստանում ծավալել է բեղուն ու շահեկան գործունեություն, մանկավարժական, հրապարակախոսական, գրական-թարգմանական բնագավառներում:

Մեսրոպ Թաղիադյանը ծնվել է 1803 թվականի հունվարի 1-ին կամ 2-ին Երևանում և ս. Ծննդյան տոնի օրը, հունվարի 6-ին, մկրտվել Երևանի ս. Սարգիս եկեղեցում: Փոքր հասակից որբ է մնացել: Մանկությունը եղել է դառն ու ծանր: Մինչև 12 տարեկան լինելը մեծացել է տատի մոտ, որն «ապա ուխտ է գիս՝ որպես սաի՝ ի ծառայութիւն սրբոյ Էջմիածնի»¹:

¹ Մեսրոպ Թաղիադյան, Ժամապարհորդություն ի Հայս, Երևան, 1975, էջ 29—30:

Մայր Աթոռում «պատկառազոր, առաքելապատիւ և մեծն» Ներսէս արքեպ. Աշտուրակեցոյ մասնավոր կարգադրութեամբ ուսումնաստեմէ ու խոստումնալից պատանու դաստիարակությունը հանձնվում է բագրեւանցի «Քուրդ» կոչված Հովհաննէս վարդապետին, որը ս. Էջմիածնի միաբանության «սրբագումար անդամների մէջ» աչքի էր ընկնում իր «առաքինական բնատրութեամբ և արուեստական հմտութեամբ, սրբոյի անվեհեր արիութեամբ»²:

ԳՐԱԿԱՆ ԺԱՌԱՆԳՈՒԹՅՈՒՆ

== 9 ==

ՄԵՍՐՈՊ ԸՄԱՂԻԱԴՅԱՆ

*Ողբերգութեան
Հոգեւորական
Զանգեզուր
Վանքի վանքի*

Այնուհետեւ 1816 թվականից սկսած, դարձյալ Մայր Աթոռում, Մեսրոպ Թաղիադյանը, Եփրեմ Զորագեղցի կաթողիկոսի հովանավորությամբ, կատարելագործում է իր եկեղեցագիտական և հայրենագիտական մասնագիտությունը, իր իսկ վկայությամբ՝ «երանելի, աստուածառաք, մեծանուն վարդապետն առաքինութեանց» Պողոս (Ներսիսյան) Ղարադաղցոյ մոտ, նրա «անմահ, աստուածաշնորհ և հոգեբույժ դաստիարակութեամբ»³:

Մեսրոպ Թաղիադյանը Մայր Աթոռում Պողոս վարդապետի մոտ իր հոգեւոր ուսումնասիրության տարիների մասին երախտագիտությամբ և հպարտությամբ գրում է. «Երանի՜ որոց այսպիսի վարդապետի աշակերտեցան դաստիարակութեամբ»⁴:

Մայր Աթոռում իր ուսումն ավարտելուց հետո, Մ. Թաղիադյանն իր կյանքն ու գործունեությունը ընդմիջտ կապել է Մայր Ա-

թոռի առաքելության և պատմության հետ:

Մայր Աթոռում եղած տարիներին Թաղիադյանը վարում է «առանց իրիք տրտրեւանաց ու կանոնաւոր խղճմտանօք և օրինաւոր կարգապահութեամբ զպաշտօն վարժապետութեան արուեստից ազատականաց, և զպաշտօն խորհրդական գրագրութեան կաթողիկոսի Ամենայն Հայոց և սրբազան Սինհոդոսի, անարատ խորհրդապահութեամբ, սրբութեամբ և անկեղծ հաւատարմութեամբ»⁵:

1821-ին Թաղիադյանը, Եփրեմ կաթողիկոսի կարգադրությամբ, սարկավագ է ձեռնադրվում և 1822-ին նրան է ընկերակցում, երբ կաթողիկոսը 2—3 տարի ժամանակով հեռանում է Մայր Աթոռից և բնակվում Հաղբատի վանքում:

Մ. Թաղիադյանը Մայր Աթոռում իր ուսումնասիրության և ապա իր պաշտոնավարության տարբեր ժամանակներում մոտիկից և հանգամանորեն ծանոթանում է Վաղարշապատի և նրա շրջակայքի պատմական հուշարձաններին, ողբերկական շրջագայություններ կատարում հայրենի աշխարհում, իր անվանի ուսուցիչ Պողոս վրդ. Ղարադաղցոյ, ապա Մայր Աթոռի նվիրակներ Բարսեղ և Դանիել եպիսկոպոսների հետ՝ Արարատյան դաշտավայրում, Նախիջևանում, Սյունիքում, Օւշիում, Գանձակում, Հաղբատում և «մեծ հետաքրքրություն է հանդես բերում հայրենիքի պատմական անցյալի և նրա ժամանակակից քաղաքական-հասարակական իրադարձությունների հանդէպ»⁶:

Այս բոլորի արդյունքն է լինում «Ծանապարհորդութիւն Մեսրոպայ Դ. Թաղիադեանց Վ. Ա. սարկավագի սրբոյ Էջմիածնի ի Հայս» ողբերգության Ա հատորի պատրաստությունը և հրատարակությունը:

«Ծանապարհորդութիւն»-ը լույս է տեսել «տետրակ առ տետրակ», նախ 1847 թվականին Կալկաթայում հրատարակած Թաղիադյանի «Ազգասէր» ամսագրում⁷:

«Գրական ժառանգություն» մատենաշարի 9 հատորում առաջին տեղը հատկացված է ահա Թաղիադյանի «Ծանապարհորդութիւն» արժեքավոր հայրենագիտական, ողբերկական աշխատությանը, որը և ներկայացնում ենք մեր ընթերցողների ուշադրությանը՝ Մայր Աթոռի այդ շրջանի տարեգրության հետ կապված իր շահեկանության համար:

Սույն աշխատության մեջ Թաղիադյանը

² Անդ, էջ 81:

³ Անդ, էջ 82—83:

⁴ Անդ, էջ 84:

⁵ «Էջմիածին» ամսագիր, 1947, մարտ, էջ 34:

⁶ «Ծանապարհորդութիւն», «Հաւաքարան», էջ 7:

⁷ Անդ, էջ 587—588:

«գրի է առնում Հայաստանի մի շարք գավառներում կատարած շրջապայությունների տպավորությունները... Ականատեսի հուշերին ավելանում է հայրենիքի պատմության նրա լայն իմացությունը», որով «միացնելով պատմական և ականատեսի փաստերը, ստեղծել է 1820-ական թվականների Արևելյան Հայաստանի իրական պատկերը», որը «հնարավորություն է տալիս ճանաչելու ժամանակը բնորոշող երևույթներ, մարդկանց կերպարները բնութագրող հարաբերություններ... մարդկանց գնազան կերպարներն իրենց առօրյա հոգներով, մտորումներով, երազանքներով»⁸:

«Ճանապարհորդություն»-ը բաժանված է վեց հատվածների:

Հատումած առաջին⁹. Ավիրվել է Թադիադյանի ընտանեկան, «ատունին անցք»-երին, «Նոր եղանակ դաստիարակություն մանկանց» հարցին, Մայր Աթոռում իր ուսումնառության տարիներին և իր վարդապետ ուսուցիչների ու իր բարերարներ Եփրեմ կաթողիկոսի և Աշտարակեցու հիշատակին:

Հատումած երկրորդ¹⁰. Ակարագրությունն է Վաղարշապատի դաշտին, ապա «տեղագրական ծանոթությունը սրբոյ Էջմիածնի...», «շրջապատ Էջմիածնի», ուր խոսում է Արարատյան դաշտի, նրա օդի, ջրի, գետերի, ձկնաբանության (ձկների տեսակների), ձկնորսության, լեռների և բլուրների, հայ բնակչության բազմաճյուղի, միստ ու կացի, բարքերի, սովորույթների և «գեղեցկություն կերպարանաց ազգի մերոյ» խրճիթների մասին:

«Առանձնապես հետաքրքիր են նրա քրեական հայացքը և հնախոսական դիտողությունները հատկապես Վաղարշապատի, Դվինի, Երվանդաշատի, Արաքսի հնօրյա հունի, Մեծամորի և Ռահ գետերի, Էջմիածնի Մայր տաճարի, Զվարթնոցի և այլ կոթողների մասին («Հառաջաբան», էջ 9):

Հատումած երրորդ¹¹. ամբողջությամբ ավիրված է Մայր Աթոռին և նրա ժամանակակից առօրյային ու միաբանության կյանքին: Հատվածի վերնագիրն է. «Կաթողիկոս և կառավարությունը Էջմիածնի»: Մայր Աթոռի գահակալին բնութագրում է նստեցնագիտական, պատմական ճշգրիտ տվյալներով «Ընդհանրական Հայրապետ Ազգիս, և գլուխ Համօրէն Ազգին» վարդապետ

դելոց ի հեռաւոր ծագս աշխարհի արդեամբք գոյով լաջորդ Գրիգորի Լուսաւորչին մերոյ»:

Այնուհետև Թադիադյանը, որպես ականատես և միաբան, հիացմունքով ու ազգային հպարտությամբ նկարագրում է «զուր և զարտօնութիւն կաթողիկոսին... յորժամ նա արտաքո ելանէ ի վանացն Էջմիածնի»՝ շրջապատված արքեպիսկոպոսներով, եպիսկոպոսներով, ծայրագույն վարդապետներով, որոնք ձի նստած կրում են նրա առջևից «զխաչվառն և զգաւազանն հայրապետական...»:

Հայրապետի ճանապարհի վրա ժողովրդական բազմությունները խանդավառորեն դիմավորում են նրան, «վառեն ընդ առաջ նորա զհեծեալս ի քաջարշա պատանեկաց, որք ի զանազան խաղս ձիավարժութեան իրեանց սխրալի յօրինեն ոչ միայն զփառս Հայրապետին, այլ զհին և զքաջարարս նախահարց իրեանց»¹²:

Թադիադյանն ապա նույնպիսի խանդավառությամբ նկարագրում է այն հանդիսությունները Մայր Աթոռում, երբ կաթողիկոսը կիրակի օրերին և տոներին 12 արքեպիսկոպոսների, եպիսկոպոսների ուղեկցությամբ առաջնորդվում է Մայր տաճար:

Առանձին և «մանրապատում» հանդիսավորությամբ նկարագրվում են այստեղ. հայ ժողովրդի սրտին շատ մոտ սրբալույս մեռնի մեծահանդես օրհնությունը, ինչպես նաև կաթողիկոսական և եպիսկոպոսական ձեռնադրությունները:

Մ. Թադիադյանը սույն բաժնում խոսում է նաև բացատրություններով իր ժամանակի Մայր Աթոռում գոյություն ունեցող պատասխանատու պաշտոնատարների և պաշտոնների մասին, ինչպիսիք են տեղապահը, խորհրդարանի կամ «հոգևորական կառավարության», այսինքն Սինոդի անդամները, արքեպիսկոպոսը, գործակալը, ձիթապանը, գինեպանը, տնտեսը, ավագ լուսարարը, գանձապետը, հյուրընկալը, գրագիրը, ծաղկարարը (ծաղկիչ կամ նկարիչ կոնդակաց հայրապետական), տպարանապետը, գրքապետը (գրադարանապետը), ժամօրհնողը, ժամասացները¹³:

Սույն գլխում խոսվում է նաև այդ ժամանակի Մայր Աթոռում գոյություն ունեցող հոգևոր ճեմարանի, «խցի և վարժատան», ինչպես նաև «ուսման եղանակի» մասին¹⁴: **Հատումած չորրորդ¹⁵.** «Առաջին ճանապար-

⁸ Աճ, «Հառաջաբան», էջ 8, 9 և 10:

⁹ Աճ, էջ 29—35:

¹⁰ Աճ, էջ 35—72:

¹¹ Աճ, էջ 73—80:

¹² Աճ, էջ 74:

¹³ Աճ, էջ 77—79:

¹⁴ Աճ, էջ 79:

¹⁵ Աճ, էջ 80—115:

հորդություն իմ ի Մասիս»։ այստեղ Մ. Թադիսյանը խոսում է 1816 թվականի մայիսի 15-ին իր սիրելի ուսուցիչ Պողոս վարդապետ Լարսիսյանի հետ Էջմիածնից դեպի Մասիս իրենց ճանապարհորդության և ուղևորության ժամանակ այցելած վանքերի, գյուղերի, սրբավայրերի մասին, ինչպիսիք են և. Հոփսիսիմեն, Շողակաթը, Զվարթնոցը, Փարաբարը, Երևանը, Ջորագյուղի Անապատը, Նորքը, Բանաքետը, Գառնին, Գեղարդա վանքը, Դարաշիշակը, Սևանը, ճորից Երևանը, ապա Դվինը, Խորվիրապը, Ակոռու և. Հակոբ վանքը և աղբյուրը Մասիսի լանջին և ապա նկարագրությունը «քարծրաքերձ և երկնամասն լեռն Մասիսի»։

Մ. Թադիսյանը Ակոռու գյուղում եղած ժամանակ «երկու անգամ քարծրացել է Փոքր Մասիսի կատարը»¹⁶։

Այնուհետև սույն գլխում Մեսրոպ Թադիսյանը նկարագրում է իր ուղևորությունը դարձյալ Պողոս վարդապետի հետ 1819 թ. հոկտեմբերին դեպի Արագածոտն, Եղվարդ, Օշական, Ուշի, Արկունի, Կոշ կամ Քոշ, Խանդուքի ձոր, Նպատ, Աղավնատուն, Ագոստիոս քար, ապա Նախիջևան, Մայր Անդ, Զարվանդ¹⁷։

Հատուած հինգերորդ¹⁸. «Ծանապարհորդություն իմ դեպ յոտն Արագածոյ»։ այստեղ Մ. Թադիսյանը պատմում է իր ճանապարհորդությունը դեպի Մուղնու և. Գեվորգ եկեղեցի, Հովհաննավանք, Սաղմոսավանք, նկարագրում այդ վանքերում կատարված ժողովրդական ուխտագնացությունները, ապա իր այցելությունների մասին Օշական, Աշտարակ, Կարբի, Փարսի, Ապարան, Բյուրական, Տեղեր, Անքերդ։ Այստեղ ցանկացել է «ելանել ի քարծրագոյն գագաթն Արագած լեռին, ուր է լին իմն ջուրց, մայր անհամար վտակաց և աղբերակացն նորուն»¹⁹։ Վերադարձին աղելել է Ագարակ և «Կոշայ սուրբ Սարգիս եկեղեցին»։

Հատուած վեցերորդ²⁰. «Ծանապարհորդություն իմ ի Սինիս, 1819»։ Մ. Թադիսյանի «Ծանապարհորդություն ի Հայս» աշխատության վերջին գլխի ընդարձակագույն մասը նվիրվել է ոչ թե 1819, այլ 1821 թվականի զարմանք նրա ուղևորությանը դեպի Սյունիք՝ թելադրությանը Եփրեմ կաթողիկոսի, որպես ուղեկիցը Մայր

Աթոռի նվիրակ և լուսարարապետ Դանիել եպիսկոպոսի՝ «Էջմիածնի պարտքերը մարելու նպատակով»²¹ նվիրակություն կատարելու։

Այս ուղևորության ժամանակ Մ. Թադիսյանը այցելում է ճանապարհի մի շարք գյուղեր, ապա Աստաբադ, Ագուլիս, Ցղնա, Դաշտ, Օրդուբադ, Մեղրի, Շուշի, ապա Տաթև, Բոնակոթ, Զահով, Երևնակ։

Մ. Թադիսյանը վերադարձի ճանապարհին, 1821-ի նոյեմբերին, հանդիպում է Եփրեմ կաթողիկոսին Նախիջևանում, երբ կաթողիկոսը Երևանի պարսիկ խանի «հարկապահանջություն»-ից փախչում էր դեպի Տաթև։ Թադիսյանն այստեղ միանում է հայրապետական շքախմբին, նկարագրում Երևանի խանի հետապնդումներից ազատվելու և ռուսական սահմանն անցնելու համար երեկոյան ժամերգության կատարումը ձիերի վրա նստած, «շարժական եկեղեցի»-ում²², և ապա իրենց ապահով ժամանումը Շուշի, ձմռան եղանակին, ուր ցարական կառավարությունը սակայն արգելում է կաթողիկոսին՝ շարունակելու ճանապարհին իր սահմաններում, խուսափելու համար պարսկական կառավարության հետ հարաբերությունները վատացնելուց։

Այնուհետև նկարագրվում է Ներսես Աշտարակեցու ռուս կառավարության մոտ ազդու բողոքների վրա, Եփրեմ կաթողիկոսի բազում դժվարություններից հետո, 1822 թվականի սեպտեմբերի 22-ին ժամանումը Հաղբատի վանք²³։

Եփրեմ կաթողիկոսի թելադրությամբ Թադիսյանը Հաղբատից Մայր Աթոռ է վերադառնում 1822 թվականի հոկտեմբերին։ Ապա նորից Հաղբատ է վերադառնում նոյեմբերի վերջերին, ուր մնում է մինչև 1823 թվականի ապրիլ ամիսը։ Մայիսին Մ. Թադիսյանը, դարձյալ Եփրեմ կաթողիկոսի հրահանգով, գործողվում է Հնդկաստան՝ Պարսկաստանի վրայով։ Այստեղ էլ ավարտվում է Թադիսյանի «Ծանապարհորդություն ի Հայս» ուղեգրության առաջին հատորը, որը ազգագրական, հայրենագիտական բովանդակալից ու արժեքավոր ուսումնասիրություն է, և որպես պատմություն «ժամանակաշրջանի վկայությունն է դարաշրջանի մասին» («Էջմիածին», 1956, սեպտ., էջ 94)։

«Գրական ժառանգություն» մատենաշարի 9-րդ հատորում հրատարակվել է, առաջին անգամ լինելով, «Ծանապարհորդություն Մ.

¹⁶ Անդ, «Ծանոթագրություններ», էջ 548։

¹⁷ Անդ, էջ 104—114։

¹⁸ Անդ, էջ 115—130։

¹⁹ Անդ, էջ 126։

²⁰ Անդ, էջ 180—198։

²¹ Անդ, «Ծանոթագրություններ», էջ 550։

²² Անդ, էջ 153։

²³ Անդ, «Ծանոթագրություններ», էջ 555։

Դ. Թաղիադեանց ի Պարսկաստան», հատոր Բ²¹, որը համարվում է վաստակաշատ հեղինակի «Ծանապարհորդություն ի Հայս» աշխատության երկրորդ մասը²⁴:

Սույն ժողովածուում տեղ են գտել նաև Թաղիադյանի շուրջ 40 հրապարակախոսական հոդվածներ, որոնց մեծ մասը լույս է տեսել Կալկաթայում նրա հրատարակած «Ազգասեր» (1845) և «Ազգասեր Արարտեան» (1848) պարբերականներում²⁵, նամակներ, ճառեր, դիմումներ²⁷ և իր կյանքի ու գործունեության վերաբերյալ վավերագրեր²⁸, որոնք չափազանց կարևոր, պատմական նշանակություն ունեն և՛ մշակութային, և՛ հայրենասիրական, և՛ հայագիտական առումներով:

Մ. Թաղիադյանի նամակներից պետք է հիշել մանավանդ 1828 թվականի հոկտեմբերի 8-ին Կալկաթայից Ներսես Աշտարակեցուն²⁹ և նույն թվականի նոյեմբերի 1-ին, դարձյալ Կալկաթայից՝ Երևանի «աստուածասեր» և ազգասեր հասարակության հայր» գրած նամակները³⁰:

Սույն երկու նամակները բացառիկ նշանակություն ունեն:

Աշտարակեցուն գրած նամակում Թաղիադյանը նրան առաջարկում է ամբողջ «հայության ազգային լուսավորության և կուլտուրական շինարարության մի ընդարձակ ծրագիր, որ բացահայտված են երիտասարդ լուսավորչի խորհրդածությունները ազատագրված հայրենիքի հոգևոր զարթոնքի ու վերածնության բացված նոր ուղիների մասին»³¹:

1828 թվականի նոյեմբերի 1-ին Կալկաթայից երևանցիներին գրած նամակում «Թաղիադյանը առաջինը ողջունեց Արևելահայաստանի ազատագրումը Պարսից լծից և միակցումը Ռուսաստանին»: «Փառք բարերարին Աստուծո, — գրում է նա, — որ այ-

սուհետև ավելի նեղություն չէր ունենալեց, ազատ քաղաքի քաղաքացի պիտի անվանիք, ձեր ազգասիրության իմաստության լուրն և արվեստից առաջադիմությունն բոլոր աշխարհ պիտի տարածվին»:

Նույն նամակում Թաղիադյանը թելադրում էր նաև երևանցիներին, որ դպրոցներ բացեն, որպեսզի երեխաները «դաստարակ բուշեքումը ման չկան», և նրանց կոչ էր անում:

«Ա՛խ, իմ լավ քաղաքացիք, ա՛խ, հոգիս հարապ է կանչում, հին խմորն թողեք, նոր ազգի լուսավորության և պայծառության հետևեցեք»³²:

«Գրական ժառանգություն» մատենաշարի 9-րդ հատորում տեղ չեն գրավել Մ. Թաղիադյանի այլ աշխատություններ:

Մ. Թաղիադյանը եղել է նաև հայրենաշունչ վիպասան: Նրա գրչին են պատկանում «Սոս և Սոնդիպի», «Վեպ Վարդգեսի», «Վեպ Վարսենկյան» հայրենասիրական չափածո վիպասանությունները:

Մայր Աթոռի միաբան և սարկավագ Մեսրոպ Դ. Թաղիադյանն իր ստեղծագործական ուժերի հատկության շրջանում, 55 տարեկան հասակում, Պարսկաստանի Ծիրազ քաղաքում իր աչքերը փակեց, 1858 թվականին՝ «ծանր տառապանքներով, անհայտության և անհուսության մատնված»³³:

Բայց երախտագետ հայ ժողովուրդը չմոռացավ երբեք իր վաստակաշատ գավալին:

1975 թվականի վերջերին Երևանում՝ ՀՍՍՀ գիտությունների ակադեմիայի Մ. Արեղյանի անվան Գրականության ինստիտուտի և ՀՍՍՀ Կուլտուրայի մինիստրության Ե. Չարենցի անվան Գրականության և արվեստի թանգարանի գիտական խորհուրդների որոշումով լույս տեսած

«Մեսրոպ Թաղիադյան Ուղեգրություններ, հոդվածներ, նամակներ վավերագրեր»

մատենաշարն արժանավոր ու անմոռաց մի հուշարձան է մեծ մասնավարժի, ակադեմիկոս գրողի ու ջերմ հայրենասերի պայծառ կյանքին ու գործունեությանը նվիրված:

Ա. Հ.

²⁴ Անդ, էջ 203—372:

²⁵ Անդ, «Ծանոթագրություններ», էջ 557: Տե՛ս նաև «Հառաջարան», էջ 5:

²⁶ Անդ, էջ 295—373:

²⁷ Անդ, էջ 377—475:

²⁸ Անդ, էջ 479—532:


²⁹ Անդ, էջ 390—395:

³⁰ Անդ, էջ 410—413:

³¹ «Հառաջարան», էջ 5—6:

³² Անդ, էջ 412:

³³ «Հառաջարան», էջ 21:



Լ. ՀԱԶՅԱՆ

ԳԱՔՐԻԵԼ ԱՐՔԵՊԻՍԿՈՊՈՍ ԱՅՎԱԶՅԱՆԸ Ի. Ա. ԿՌԻԼՈՎԻ ԱՌԱԿՆԵՐԻ ԹԱՐԳՄԱՆԻՉ

Ա. Էջմիածնի վաստակաշատ միաբանության անդամների շարքում իր առանձին ու հատուտ տեղն ունի Գաքրիել արքեպիսկոպոս Այվազյանը: Ծնվել է 1812 թվականի մայիսի 12-ին Ղրիմի Թեոդոսիա քաղաքում: Հինգ տարեկանից հաճախում է Թեոդոսիայի գավառական դպրոցը: Յոթ տարի աչտեղ սովորելուց հետո աշակերտում է Բ. Մինաս Բժշկյանին, իսկ 1826 թվականին մեկնում է Վենետիկ, ս. Ղազար՝ Մխիթարյան միաբանության դպրոցում իր ուսումը կատարելագործելու նպատակով: Այստեղ նա աշակերտում է վաստակաշատ հայագետներ Բ. Մկրտիչ Ավգերյանին, Բ. Մանուել Զախչախյանին և Բ. Միքայել Զամչյանին: Բնածին ընդունակություններն ու ստացած կանոնավոր կրթությունը շուտով տալիս են դրական արդյունք: Գ. Այվազյանը մասնակցում է «Հայկազյան» և «Առձեռն» քառարանների ստեղծմանը, ինչպես նաև, քացառության կարգով, դեռ նախքան քահանայական աստիճան ստանալը, նշանակվում է ուսումնարանի՝ սկըզբում ելրոպական և արևելյան լեզուների, ապա նաև՝ փիլիսոփայության և աստվածաբանության ուսուցիչ: Նա միաժամանակ վարում է միաբանության ընդհանուր քարտուղարի դժվարին պաշտոնը: Տակավին երիտասարդ Գաքրիելը 1836 թվականին գրում է «Համառոտ պատմություն Ռուսաց» աշխատությունը, որով իր ընթերցողներին ծանոթացնում է Ռուսաստանի պատմու-


թյան Ռյուրիկ իշխանից մինչև Նիկոլայ 1-ի թագավորության հինգերորդ տարին ընկած ժամանակաշրջանին: Նրա հաջորդ՝ «Պատմություն Օսմանեան պետության» գործը ստվարածավալ աշխատություն է, որը զգալի հետաքրքրություն է ներկայացնում, մասնավորապես ազգագրական առումով:

Որքան էլ բազմազբաղ, այնուամենայնիվ նա հետամուտ է լինում ամսագիր հրատարակելու իր վաղեմի ձգտմանը, և ահա 1843 թվականին նրա ջանքերով հիմնվում է «Բազմալեզ»-ը: Վեց տարի շարունակ հմտորեն խմբագրելուց հետո, նա այդ գործը հաճձնում է իր լավագույն աշակերտ Բ. Ղևոնդ Ալիշանին, իսկ ինքն անցնում է Փարիզ՝ ղեկավարելու համար տեղի Մուրադյան վարժարանը:

Նշանակալից է եղել անվանի գիտնական ու բանաստեղծ Բ. Ղ. Ալիշանի հասունացման գործում Գաքրիել վարդապետ Այվազյանի դերը: Նա Ալիշանի «...երիտասարդության ժամանակակից ոգին էր, իր տարօրինակ խանդավառ գործունեությամբ ամբողջ երիտասարդությանը դեպ ի գործ և դեպ ի անխոնջ աշխատանք կը մղէ...»:

1848 թ. Փարիզի Ունիատ ակադեմիան Այվազյանին շնորհում է դոկտորի կոչում: Մուրադյան վարժարանում ծագած «կաթոլիկ—ոչ կաթոլիկ» վեճերի հետևանքով Գ.

¹ Հ. Ս. Երեմ, Կենսագրություն Բ. Ալիշանի, Կ. Ղազար, 1902, էջ 104:



Տ. ԳԱՐԻԻԵԼ, ԱՐԲԵՊԻՍԿՈՊՈՍ ԱՅՎԱԶՅԱՆ

վարդապետ Այվազյանը թողնում է դպրոցը, միաժամանակ հրաժարվելով նաև Մխիթարյան միաբանությունից²։ Իր երեք ընկերների հետ Փարիզում նա հիմնում է Հայկազյան վարժարանը, որին զուգահեռ հրատարակում է մի նոր պարբերական՝ «Մասեաց աղանի»-ն։ Այս շաբաթաթերթը լույս էր ընծայվում 1855 թ. սկսած՝ ֆրանսերեն և հայերեն լեզուներով։ Ֆրանսիացի ընթերցողին մատուցվում էին հիմնականում հայ ժողովրդի մշակութային հարուստ անցյալը ներկայացնող նյութերը, հայերեն տպագրվում էին պատմական, գրական, ազգագրական, ինչպես նաև քաղաքականությանը, արհեստների վերաբերող տեղեկություններ։

Գաբրիել վարդապետ Այվազյանը, մղված իր նոր համոզմունքներից և ընդառաջելով իր եղբոր՝ աշխարհահռչակ ծովանկարիչ Հովհաննես Այվազովսկու թախանձանքին³, դիմում է Ներսես Ե կաթողիկոս Աշտարակեցուն՝ խնդրելով ընդունել իրեն Մայր եկեղեցու գիրկը։ Ս. Էջմիածնի միաբանությունը ընդունում է նրան իր շարքերում։ 1857-ին Գաբրիել վարդապետը վերադառնում է Ղրիմ, նշանակվում Բեսարաբիայի և Նոր Նախիջևանի թեմի առաջնորդ։ Հիմնում է Խալիպյան վարժարանը, տպարանը և շարունակում հրատարակել «Մասեաց աղանի»-ն, այս անգամ արդեն՝ հայերեն ու ռուսերեն։

1867 թ. Գևորգ Դ կաթողիկոսը նրան նշանակում է Արարատյան թեմի առաջնորդական փոխանորդ, ձեռնադրում եպիսկոպոս և նշանակում ս. Էջմիածնի Սինոդի անդամ։ 1875 թ. նույն կաթողիկոսի կոնդակի համաձայն նշանակվում է Էջմիածնի Գևորգյան ճեմարանի տեսուչ՝ Ոկատի ունենալով այն, որ նա «...դատիարակու-

թյան կենսական խնդրով և արդյանց մեջ ևս ունեցած ողջամիտ՝ բազմափորձ հմտությունն և հաջողականությունն մեծ գրական ափսի լինի ճեմարանի ապագայի համար, և կհուսամք որ կարևոր աշակցությամբ և օժանդակությամբ նպաստավորյալ՝ Աստուծով կհաջողի իր մեծ անվան և բազմափորձ հմտությանց համաձայն մեծ և փառավոր արդյամբ զարդարել և ճոխացնել զճեմարան Մայր Աթոռույս, և Վեհ. Հայրապետի՝ ինչպես նաև Հայաստանյայց եկեղեցվո և Ազգի արդար և մեծահույս ակնկալությունը պսակել, միանգամայն առավել ևս շքեղացնել և պայծառացնել իր մեծահամբավ և արժանավոր անունը և փառքը»⁴։

Նույն թվականին նրան հանձնվում է Վրաստանի և Իմերեթի թեմակալությունը՝ արքեպիսկոպոսական պատվի հետ միաժամանակ։

Իր կյանքի վերջին տարիներին նա առանձնակի ավանդ է ներդրել Ներսիսյան դպրոցի, ինչպես նաև իր առաջնորդական տարիներին հիմնված Մարիամյան դպրոցի գործունեության մեջ։

1880 թվականի ապրիլի 28-ին իր մահկանացուն է կնքում Գաբրիել արքեպիսկոպոս Այվազյանը՝ ապրելով 68 տարվա բովանդակալից կյանք։

*
* *

Գաբրիել արքեպիսկոպոս Այվազյանը թողել է հրապարակախոսական, մատենագրական, կրոնա-եկեղեցական շուրջ երեսուն աշխատություններ, որոնցից հիշենք հետևյալները.

«Համառոտ պատմություն Ռուսաց» (Վեներտիկ, 1836), «Դասագիրք մեկնութեան խորհրդոց և արարողութեանց սրբոյ պատարագին» (Թեոդոսիա, 1870), «Խանգարմունք հայերեն լեզուի ի հնումն և ի նորումս» (Թեոդոսիա, 1869), «Հազար ու մի ստակաւոր բանք» (Կ. Պոլիս, 1875), «Յանու և կամ յաղագս անախալութեան պային» (ս. Էջմիածին, 1871), «Ուղղագրութիւն լեզուիս Հայոց» (Թեոդոսիա, 1869), «Վարք Քրիստոսի» (Փարիզ, 1854), «Տրուլի խորհրդածութիւնք» (Փարիզ, 1854), «Քրիստոնէական վարդապետութիւն կամ վարդապետարան» (Փարիզ, 1855), «Թե՛նք վայելուչ կենցաղավարութեան» (Փարիզ, 1854), «Հոովմէական եկեղեցին ոչ ևս է կաթողիկէ եկեղեցի, Միշոյ բահւնայի Փարիզեցոյ» (թարգմ. Վարդապետ, 1878)։

⁴ «Արարատ», Էջմիածին, 1875, էջ 230։

² Այս մասին տես. Գաբ. եպիսկ. Այվազյան, Պատմություն վերադարձի երկից վարդապետաց ի ծոց Հայաստանեաց ս. եկեղեցւոյ, վերադարձ և չորրորդին տ. Խորենաց Գալֆայեան քերթող վարդապետի, Փարիզ, 1858։

³ Գաբրիելի կրտսեր եղբայրը՝ Հովհաննես Այվազովսկին, շատ բան է արել տեսնելու համար Ղրիմն առանց կաթողիկոսների։ Այս մասին նա հաճախ ակնարկել է իրեն այցելող ու հյուրընկալող բարձրաստիճան անձանց շրջանում, բայց չտեսնելով շոշափկի որևէ արդյունք, 1846 թվականին մի նամակով (Մատենադարան, արխիվ, Կաթողիկոսական դիվան, թղթ. 121, վավ. 15) դիմում է Ներսես Ե կաթողիկոսին՝ շարադրելով իր, ինչպես նաև շատ-շատերի իղձը՝ հեռացնել Մխիթարյանների Տավրիկյան նահանգից, ուր նրանք պատակաւուն են առաջացնում հսկող մեջ։

Այժմ «Էջմիածին» ամսագրի ընթերցողների ուշադրությանն ենք ներկայացնում Գաբրիել արքեպիսկոպոս Այվազյանին, որպես Ի. Ա. Կոիլովի առակների հմուտ թարգմանիչ:

• •

19-րդ դարի 30-ական թվականներից սկսած հայ գրական գործիչների շրջանում երևան է գալիս առանձնակի հետաքրքրություն ունի առակագիրների, հատկապես Կոիլովի նկատմամբ: Ռուսական առակների թարգմանությանը ձեռնամուխ են լինում Հարություն վարդապետ Ալամդարյանը, Խաչատուր Աթուկյանը, Հարություն Քյոքչյանը և ուրիշներ⁵:

Առակագրությանն իր էջերում որոշակի տեղ է հատկացնում ժամանակի մամուլը: Իր հրատարակման առաջին իսկ տարվանից «Բազմավեպ»-ում Գաբրիել վարդապետ Այվազյանն սկսում է տպագրել ինչպես հայ ժողովրդական, այնպես էլ առանձին հեղինակների առակներ:

Գիտակցելով առակի դերն ու նշանակությունը ժողովրդի մշակութային կյանքում, տիրապետելով բազմաթիվ լեզուների և ունենալով ստեղծագործելու ակնհայտ ձիրք, 40-ական թվականներից սկսած Գաբրիել վարդապետ Այվազյանը թարգմանում է Կոիլովի, ինչպես նաև Եզովսոսի, Բարիուսի ու Լաֆոնտենի առակները, որոնք առաջին անգամ լույս են տեսնում «Բազմավեպ»-ի էջերում: Թարգմանիչը միաժամանակ համապատասխան հոդվածով ներկայացնում է առակի մասին ունեցած իր տեսակետները:

Անդրադառնալով Կոիլովի առակների Այվազյանի կատարած թարգմանություններին, Լեոն ժամանակին գրել է. «2ի կարելի մոռանալ ունի առակախոս Կոիլովի առակների այն թարգմանությունը, որ կատարել է Գաբրիել վարդապետ Այվազյանը: Որպիսի չքնաղ պարզություն, որքան նորություն՝ հեզություն, ծաղր արտահայտելու համար: Այդ գործը կարելի է համարել մեր աշխարհաբար բանաստեղծական գրականության պարծանքներից մեկը»⁶:

Գաբրիել վարդապետ Այվազյան-մտա-

վորականի մասին բարձր է արտահայտվել նաև Աշոտ Հովհաննիսյանը. «Այվազյանի գրական ունակությունների մասին վկայում են Կոիլովի առակների թարգմանությունները, այլև նրա հայտնի օտմանյան պատմությունը: Նալբանդյանը դատում է նրան «գրական վարդապետների» շարքին, արժեք տալիս նրա պատմաբանական գրքվածքներին և նրա ընտիր հայախոսությանը: Ավելացնենք այս ամենին նրա քարոզչական ձիրքը և նրա պատկերավոր լեզուն...»⁷:

Սկզբնական շրջանում առակները գրաբարով թարգմանելն ընդհանուր երևույթ է եղել, ինչպես երևում է մեր կազմած տախտակից: Այդպես են վարվել բոլորը, այն տարբերությամբ միայն, որ հետագայում ոմանք ընդհանրապես դադարել են թարգմանելուց, ոմանք անհրաժեշտ են համարել գրաբարը փոխարինել աշխարհաբարով:

Այդպես է վարվել նաև գրաբարի մասին մեծ համարում ունեցող Գաբրիել վարդապետ Այվազյանը, որը, Կոիլովից ընդամենը հինգ առակ գրաբար թարգմանելուց հետո, անցնում է աշխարհաբար թարգմանությանը: Ավելին, նա հետագայում քննադատում է սկզբնական շրջանում իր և իրենից առաջ ուրիշների կողմից գրաբար կատարված մի քանի թարգմանությունները⁸: Այս կապակցությամբ գրել է. «Եվ որովհետև առակին մեծ կատարելությունը պարզ և ընտանի ոճով գրված ըլլալն է, առակ գրող հեղինակներուն մեջ անոնք միայն երևելի և անվանի եղեր են ամեն ազգաց մեջ, որոնք որ ուրիշներեն ավելի պարզ ու բնական ոճ մը ունեցեր են: Ասով կիմացվի, որ հին լեզուներով առակ գրելն ու միանգամայն աս պարզությունը և բնականությունը պահելը կրկին դժվարություն ունի, ուստի մեր լեզվին մեջ ալ գրաբար գրված առակները չեն կրնար իրենց վախճանին ինչպես որ պետք է հասնի, որովհետև գրաբարը վսեմ ծանրություն մը ունի, որ շատ դժվարությամբ կհարմարի ընտանի բացատրությանը: Աշխարհաբարը ավելի հարմար կերևա աս տեսակ թեթև գրվածքներու...»⁹:

1865 թվականին Այվազյանը հրատարակության է ներկայացնում իր հատընտիր

⁵ Մեր հոդվածի վերջում կարևոր համարեցինք մի առանձին աղյուսակով ներկայացնել 19-րդ դարում Կոիլովին թարգմանած հայ հեղինակների ցանկը՝ նշելով նրանց թարգմանած առակների քանակը, լեզուն, հրատարակության տարեթիվն ու վայրը:

⁶ Լեո, Ռուսահայոց գրականություն, Վենետիկ, 1904, էջ 51—52:

⁷ Հովհաննիսյան Ա., Նալբանդյանը և նրա ժամանակը, Երևան, 1955, էջ 261:

⁸ Գրաբարով թարգմանվել են շուրջ վեց տասնյակ առակներ. Հակոբ Տեր-Ջաքարյանի, Համազասպյանի, Հարություն Քյոքչյանի և Այվազյանի կողմից:

⁹ «Բազմավեպ», Վենետիկ, 1846, էջ 54:

թարգմանությունների անդրանիկ գրքույկը՝ «Առակք Քոիլովի»։ Այն կազմված էր հիմնականում Ռուսաստանի հայկական դրաբոցներում սովորող մանուկների համար։ Գրքույկում տեղ էին գտել նաև Կոիլովի այն բոլոր առակները, որոնց թարգմանությունները նախապես տպագրվել էին «Բազմալեզ» և «Մասեաց աղանի» պարբերականներում։ Այն ընդգրկում է 91 առակ։ Գրքույկն արագորեն սպառվեց։ Դա խորապես ոգևորեց Ալվազյանին. նա հինգ տարվա ընթացքում Կոիլովից թարգմանեց բազմաթիվ առակներ՝ ստեղծելով 197 առակից կազմված մի նոր ժողովածու, որպեսզի «ազգային արդի մատենագրության մեջ ավելնա Կոիլովի պես ընտիր հեղինակի մը առակներուն մեկ ամբողջ թարգմանությունը»¹⁰։

Թարգմանիչն իր ձեռքի տակ իբրև բնագիր ունեցել է դեռևս Կոիլովի կենդանության օրոք, 1840 թ., հրատարակված վերջին առակագիրքը։ 1870 թ. տպագրված «Առակք Քոիլովի» ժողովածուն կազմելիս Գաբրիել եպիսկոպոս Ալվազյանը պահպանել է Կոիլովի հրատարակության 9 գրքերի դասավորությունը։ Այն ունի սեղմ առաջաբան, ինչպես նաև «Վարք Յովհաննու Քոիլովի» բնութագիր-կենսագրականը, որը գրել էր Կոիլովին ժամանակակից ու մտերիմ Պ. Ա. Պլետնյովը։ Այդ «Վարք»-ով ընթերցողը հնարավորություն էր ստանում ծանոթանալու ոչ միայն Կոիլովի առակների ստեղծագործական մեթոդներին, այլև նրա կյանքին ու գրական գործունեությանը։ Թարգմանիչը ժողովածուին կցել էր նաև արժեքավոր ծանոթագրություններ։

Անդրադառնալով Ալվազյանի թարգմանչական սկզբունքներին, հարկ ենք համարում նշել, որ Կոիլովյան առակները նա թարգմանել է՝ ելնելով գուտ գրական-ստեղծագործական իր հետաքրքրություններից։ Այս կամ այն առակը որևէ առիթով նա տպագրել է նաև մամուլում՝ ուղղելով այն որոշակի նշանակետի։ Օրինակ. 1856 թ. «Մասեաց աղանի» ամսագրում տպագրված «Գալլն ու գաղը» առակին նախորդում է մի հոդված, ուր խոսվում է Մոլդավիայում հայկական գաղութի ստեղծման, ինչպես նաև նրան տրված շոշափելի արտոնությունների մասին. «Հայերը,—գրում է Ալվազյանը,—ամեն անգամ որ Մոլդավիա եկեր են, հետերնին բերած են իրենց հարքստությունն ու ճարտարությունը և գործնական կերպով հասարակաց օգտակար բաներուն մեջ շատ օգնություն քրած

են...»¹¹։ Նրանց տրված բազմաթիվ արտոնությունների շնորհիվ որոշ հայ իշխաններ հասնում են նույնիսկ մոլդավական իշխանական աթոռին նստելու պատվին։ Ապա հոդվածագիրը միաժամանակ նշում է այն անարդար վերաբերմունքի մասին, որին հետագա դարերի ընթացքում արժանացել են հայերը։ Հոդվածում այդ վիճակից դուրս գալու ելքը մատնացույց չի արված։ Սակայն դրանից անմիջապես հետո տպագրված առակն ասես մի բարոյախոսական բացատրական է, որն ընթերցողի կողմից մտովի առնչվելու է հոդվածի բովանդակությանը։

«Գալլն ու գաղը» առակը ամենից սիրվածներից է։ Այն հաճախ թարգմանվել է նաև գրական ուրիշ գործիչների կողմից։ Այդ առակի հիմնական ֆաբուլան, ինչպես նաև առակի ստեղծման մոտիվները շատ հին են և ըստ ավանդության գալիս են Եգովպոսից (6-րդ դար մ. թ. ա.)։

Կոիլովի առակներում հաճախ օգտագործվող ժողովրդական այս կամ այն արտահայտությունը միշտ վերարտադրելու համար ամենից առաջ թարգմանիչը պահանջվում էր լավատեղյակ լինել ժողովրդական բառ ու բանին։ Գաբրիել վարդապետ Ալվազյանի աշխատություններից երկուսը («Հազար ու մի առակավոր բանք», Կ. Պոլիս, 1874 թ., և «Երիմու հայոց լեզվովը շարադրված առակներ», Ռուստով Դ./վ., 1875) բացահայտում են նրա նաև բանահավաք լինելը։ Ռուսական արտահայտության համարժեքը գտնելու համար նա սովորաբար դիմել է ժողովրդի լեզվամտածողությանը, երբեմն միայն՝ իր երևակայությանը։ Այսպես, օրինակ, «Обезьяны»¹² առակի «украдкою глядела» արտահայտությունն Ալվազյանի թարգմանությունում դարձել է «Կը ծըկըլտար՝ աչքը տրեկած կը նայեր»։ **Ծկլտալ, ծկլալ** ժողովրդական ծագում ունի, որ նշանակում է սաստիկ հետաքրքրություններ նայել, լավ տեսնելու համար ծակոծով տեղերից նայել¹³, ինչպես նաև «գաղտնի տեղե մը նայիլ՝ ինքը անտեսանելի մնալով»¹⁴, և այլն։

¹¹ «Հայոց ազգին ընկերական վիճակը ի Մոլդավիա», «Մասեաց աղանի», 1856, էջ 53։ Հոդվածը տպված է եղել Կոստանդնուպոլսի «Փրես տ'Օոհիան» ամսումով ֆրանսերեն լրագրում, որտեղից և թարգմանված է Ս. Գրանիտյանցի կողմից։

¹² Н. А. Крылов, Басни, стр. 24.

¹³ «Հայոց բառ ու բան», Վաղարշապատ, 1912, էջ 312։

¹⁴ Էմիլյան ազգագրական ժողովածու, հատ. 60, Թիֆլիս, 1913, էջ 519։

¹⁰ «Առակք Քոիլովի», Կ. Պոլիս, 1870, էջ 2։

18—19-րդ դդ. թարգմանիչները, իրենց ընթերցողին նյութն ավելի մատչելի դարձնելու նպատակով, հետևողականորեն թարգմանում էին նաև անձնանունները, երբեմն, եթե դա հնարավոր էր, նույնիսկ տեղանունները: Այս երևույթն իր արձագանքը գտավ նաև Այվազյանի թարգմանություններից մի քանիսում:

Լավագույն թարգմանության օրինակ կարող է ծառայել «Демьянова уха» առակը: Այվազյանի թարգմանությունում հայացված է հնարավոր ամեն ինչ: Գործող անձներից, օրինակ, Демьян-ը դարձել է Թաթուլ, Фока-ն՝ Խեչո: Ժաշատեսակը, որ է уха, թարգմանված է «գալաճոշ»՝ այդ կապակցությամբ տալով հետևյալ բացատրությունը. «Բնագրին մեջ ուխա է, այսինքն՝ ձկնաթան կամ ձկնապուր, մեք գալաճոշ դրինք իբրև շատ հայաստանցվոց ծանոթ ապուր, որ չոր թանով, մսով, խլուսով ու սխտորով կեփվի»¹⁵: Հայացված է նույնիսկ հյուրասիրության ձևը՝ հյուրասիրությանը «խեղդելու» տանտիրոջ սովորությունը:

Գաբրիել արքեպ. Այվազյանի թարգմանությունները տեղայնացման առանձնահատկություններից բացի աչքի են ընկնում բազմաթիվ արժանիքներով, ինչպես նաև ռիթմի ու տաղաչափության հարազատ գույզորոշմամբ: Նրա կատարած թարգմանություններում շարժումը նկարեն է, դառնում է շարժանկար: Այս թարգմանությունները տարբեր են նրանից առաջ և հետո կատարվածներից:

Գաբրիել Այվազյանի թարգմանությունները ժամանակին ընդգրկվել են դասագրքերում ու ընտիր ժողովածուներում:

Լազարյան ճեմարանի հրատարակած «Ընտիր հատուածք»-ում տեղ են գտել նաև Այվազյանի թարգմանած 7 առակները, որոնցից երկուսը («Էշ և սոխակ» ու «Երածիշտք») Կոիլովի, մնացած հինգը Լաֆոնտենի, Փեդրոսի և Փինեթոթի առակների թարգմանություններն են՝ կատարված 1843—45 թվականների ընթացքում: Ավելի կոնկրետ. Կոիլովի առակներից «Էշ և սոխակ»-ը առաջին անգամ տպագրվել էր 1843 թ., իսկ «Երածիշտք»-ը՝ 1844 թ., երկուսն էլ «Բազմավեպ»-ում, որտեղից և, մի քանի մանր վրիպակներով, ճեմարանիներն արտատպել էին իրենց հիշյալ ժողովածուում: Հետագայում իրենց կազմած դասագրքերում դրանց տեղ են հատկացրել նաև Դազարոս Աղայանն ու Հովհաննես

Թումանյանը: Հայ թարգմանիչներից շատերը հետևել են Այվազյանի թարգմանական սկզբունքներին: Այսօրվա թարգմանություններում իսկ շատ են ուղղակի փոխառությունները նրա թարգմանություններից:

Այն, որ Այվազյանը թարգմանության համար ընտրեց Կոիլովի առակները, պատահական չէր: Անհատական գնահատականից ու նկատառումներից զատ թարգմանիչը հաշվի էր առնում դրանց համամարդկային արժանիքներն ու վայելած ընդունելությունը: Դրանք Ի. Ա. Կոիլովին դասիներ բերին նրա կենդանության իսկ օրոք, մի հեղինակ, որն ականատես դարձավ իր առակագրքերի 18-րդ հրատարակությանը:

Վաղ ժամանակներից առակներին քաջածանոթ հայ ժողովուրդը նույնպես սիրով պիտի ընդուներ ուս մեծ առակագիր Կոիլովի ստեղծագործությունը: Նա գիտակցում էր, որ, բացի զուտ գեղարվեստական արժեքից, առակը «բանաստեղծության մեկ տեսակն է, որ մարդուս միշտ սիրելի եղած է, վասնզի քիչ խոսքով շատ բան կհասկնացնե, առանց նեղացնելու կիրառե, առանց սիրտ կտրելու կհանդիմանե ու առանց ձանձրացնելու կամ հոգնեցնելու կզվարճացնե...»¹⁶:

Գաբրիել արքեպ. Այվազյանի թարգմանությունները բարձր գնահատելով, անվանի գրականագետ Արսեն Տերտերյանը Կոիլովի մահվան 100-ամյակի առթիվ հրատարակած իր գրքույկում թեև նշում է, որ նրա թարգմանություններում կան նաև գրաբարյան ու խիստ բարբառային կնիք կրող մի շարք տողեր, որոնք անհասկանալի են դարձնում Կոիլովի բյուրեղանման պարզ առակները, սակայն դրանք, մեր կարծիքով, ժամանակի լեզվամտածողությունը դրսևորող արտահայտչաձևեր լինելով, չեն կարող նսեմացնել նրա աշխատանքը: «...Այս բոլորը չի խանգարում ասել, — այնուհետև եզրակացնում է Տերտերյանը, — որ նրա թարգմանությունը ոչ միայն պատմական արժեք ունի, այլև այսօր էլ իր շատ էջերով մի չգերազանցված գործ է...»¹⁷:

Ավելորդ չենք համարում այս առիթով բերել թարգմանչի բացատրությունը. «Այսու սկզբամբ ջանացինք նաև մեր աշխատության մեջ ընդհանրապես չհեռանալ Տանկատանի հայոց մաքուր աշխարհաբարեն. բայց երբեմն՝ ուր որ իմաստիս ցուր

¹⁵ «Առակը Քոիլովի յինն գիրս», Կ. Պոլիս, 1870, էջ 213:

¹⁶ «Բազմավեպ», 1843, էջ 47:

¹⁷ Ա. Տերտերյան, Ռուս մեծ առակագիրու բանաստեղծը, Երևան, 1944, էջ 81:

ու կենդանություն տալու բաղձանքն ստիպվեցանք մահ ուրիշ աշխարհաբարներու, ևս և հասարակ տանկերենի խոսքեր, ոճեր, մասնիկներ փոխառությամբ ի գործ դնելու, լավ համարելով զոհել երբեմն մեր անկանոն աշխարհաբարին հատակությունը առականց ճիշտ թարգմանության, քան թե թարգմանության ճշտությունը հատակության»¹⁸:

Գաբրիել արքեպ. Այվազյանի աշակերտ ու կենսագիր Նիկողայոս Քարամյանցի վկայությամբ, Այվազյան-թարգմանիչը, մույնիսկ գրեթե զրկված լինելով տեսողությունից, օգնական ունենալով իր աշակերտներին, մինչև իր կյանքի վերջին օրն իսկ «զբաղված էր Կոիլովի առակների սրբագրությամբ, որոնց լեզուն փոփոխում էր և ավելի արևելյան աշխարհաբարին մոտեցնում, գալստաբարբառը սրբագրում և փոփոխում թեթևակի»¹⁹:

Ինչպես ասում են, բանաստեղծության թարգմանիչը բանաստեղծ պետք է լինի: Գաբրիել արքեպ. Այվազյանի թարգմանու-

թյունները մեզ ներկայացնում են ոչ միայն Կոիլովի գեղեցիկ առակները, այլև թարգմանչի գեղարվեստական բարձր ճաշակն ու հմտությունը: Որոշ առակների թարգմանություններում դրանք հասնում են կատարելության:

Գաբրիել արքեպ. Այվազյանն, ամենայն հավանականությամբ, անձամբ ծանոթ չի եղել Կոիլովի հետ: Կոիլովը մահացել է 1844 թ., երբ Այվազյանը նոր էր սկսում տպագրել նրա առակների թարգմանությունները Վենետիկում: Բայց Կոիլովը նրա կրտսեր եղբոր՝ ծովանկարիչ Հովհաննես Այվազովսկու արվեստի երկրպագուն էր, և մտերմական հարաբերություն կար պեզարդ առակագրի ու երիտասարդ, խոստումնալից հայ նկարչի միջև:

1896 թ., Գաբրիել արքեպ. Այվազյանի մահից 16 տարի անց, Ամենայն Հայոց կաթողիկոս Մկրտիչ Խրիմյանի հրամանով, անփոփոխ վերահրատարակվում է «Առակք Քոիլովի» 9 գրքերից (բաժիններից) կազմված ժողովածուն՝ թարգմանչի ընդարձակ կենսագրությամբ:


Ըստ ամենայնի սա պերճախոս մի ապացույց է հայ իրականության մեջ Կոիլովի առակների ունեցած մեծ ընդունելության, լայն ժողովրդականության:

¹⁸ «Առակք Քոիլովի», Կոստանդնուպոլիս, 1870, էջ 1:

¹⁹ «Առակք Քոիլովի», Վաղարշապատ, 1896, էջ ԾԹ:

ՅԱՆԿ Ի. Ա. ԿՈԻԼՈՎԻ ԱՌԱԿՆԵՐԻ ԹԱՐԳՄԱՆՈՒԹՅՈՒՆՆԵՐԻ (19-ԲԴ ԴԱՐ)

Թարգմանչի ազգանունը	Թվականը	Բանակը	Լեզուն		Որակ՝ գ է հրատարակվել
			դրաբ.	աշխ.	
Հարություն վրդ. Ալամգարյան	1814—1821				Մոսկվա
Խ. Արսվյան	1834—1840	10	2	10	Երևան
Հ. Տեր-Ջաբարյան	1841—1843	9	9	—	Ախալցխա
Հ. Համադասյան	1843	7	7	—	Թիֆլիս
Գաբրիել վրդ. Այվազյան	1843—1870	197	5	197	Վենետիկ, Փարիզ, Թեոդոսիա
Հ. Գեորգ չյուրմյուզ	1844	1	1	—	Վենետիկ
Հ. Քյուբչյան	1849	27	27	—	Մոսկվա
Գ. Պապանյան	1850	3	—	3	Թիֆլիս
Ն. Իսահակյան	1850	2	2	—	Թիֆլիս
Գ. Դոդոխյան	1850	6	—	6	Դոբրուշա
Ստ. Բաստամյանց	1850	1	1	—	Սիմֆերոպոլ
Մ. Մսերյանց	1852	2	2	—	Վենետիկ
Ս. Մանգինյան	1858	1	—	1	Մոսկվա
Մ. Հարությունյան	1859	1	—	1	Թիֆլիս
Ս. Վարշամյանց	1860	2	—	2	Վան
Հ. Ղուկասյան	1860	1	—	1	Թիֆլիս
Գ. Տեր-Ալեքսանդրյանց	1863—1865	4	—	4	Թիֆլիս
Ս. Խալաթյանց	1864	1	—	1	Թիֆլիս
Ն. Գ. Մ.	1864	2	—	2	Արմաշ
Տ. Լեոնյան	1865	8	—	8	Կ. Պոլիս
Ն. Լալայանց	1868—1869	2	—	2	Թիֆլիս
Բ. Քուչնեբյան	1878—1894	25	5	20	Վենետիկ
Մ. Լեւոնյան	1883	1	—	1	Թիֆլիս
Ղ. Ազգյան	1885	4	—	4	Թիֆլիս
Ա. Բահաթրյանց	1886	30	—	30	Շուշի
Ա. Նալբանդյան	1900—1904	8	—	8	Թիֆլիս



Հ. Մ. ԲԱՐԹԻԿՅԱՆ

ՄԱՄԻԿՈՆՅԱՆ (°) ՍՈՒՐԲ ՄԱՐԻԱՄ ՆՈՐԱՎԿԱՅԻ (+902—903 թթ.) ԲՅՈՒՋԱՆԴԱԿԱՆ ՎԱՐՔԸ*

6. Ահա այսպիսիք էին երանուհու սխրանքները, այդ հրաշալի կենդ ստավելությունները, որոնց ունկնդիրները կամ ակամատեաները ապշում էին, իսկ Աստված՝ փառավորվում։ Երբ նրա երկրորդ որդին էլ վախճանվեց, նա դժբախտությունը ուրախությամբ տարավ։ Շատ չանցած նա դարձյալ հղիացավ ու երկվորյակներ աշխարհ բերեց։ Նրանց մեկը ծնվելու պահին հրաշք կատարվեց. երկվորյակներից ստաշինը, որ Վահագն կոչվեց, աջ ուսից մինչև ձախ կողմ երկարող գոտու նման մի բան ուներ, իսկ նրանից հետո ծնվածը, նա Ստեփանոս կոչվեց, զիսից մինչև մեջքը երկարող գոտի։ [Երկխաների] հայրն ու մայրը այդ բանի մեջ ինչ-որ իմաստ տեսան և զարմացած մտածում էին, դա ի՞նչ է արդյոք նշանակում։ Մայրը նախագուշակեց, որ նրանցից մեկը զինվորական կդառնա, իսկ մյուսը՝ վաճառական։ Հայրն ասաց, թե ինքն էլ է ուզում առաջինին զինվորության տալ, իսկ մյուսին՝ քերականի, որպեսզի լավ ուսում ստանա և ծառայության մտնի արքունիք։ Երանուհին ասաց. «Ինչպես որ Աստված է կամենում, թող այդպես էլ լինի, ես նրանց երկուսի ինչ դառնալը չեմ տես-

նելու, քանզի գիտեմ, որ հետանալու եմ [այս աշխարհից] նախքան այդ բանի իրականանալը»։ Թե ինչպես նրա գուշակությունն իրականացավ և երկխաններից մեկը զինվորական դարձավ, մյուսը՝ վաճառական, ստորև կաավի։

7. Նա այդպես էր կենցաղավարում և այդպես փառաբանվում բոլորի կողմից, քայց նախապես Հորին, ապա Պետրոսին փորձողը, մեզ կրկնակոխ հետևող և կյանքի ընթացքի վերջին հայողը²⁰, պետք եղածի պես փորձության է ենթարկում նաև երանուհուն, կամենում նրա աստվածահաճո՝ կենցաղավարության ոտք գցել, շրջել նրա ընթացքը, խոչընդոտել նրա ուղիղ ճանապարհը։ Նա կամենց մեջ ամենաբարեպաշտին այնպիսի փորձության է ենթարկում, որով նա վախճանվում է և հանդերձյալ աշխարհը գնում։ Սակայն տեսեք փորձողի չարագործությունը ու սարսափելիությունը, այն բանին, թե ինչպես է նա ամենամեծ ու ամենամեծ փորձության ոչ թե սկզբում, այլ վերջում ենթարկում։ Նրա արվեստն ու վարպետությունն էլ հենց դրանում է կայանում, որ ամենադժնդակ ու զորեղ փորձությունները նա պահում է ամենավերջին, ամեն տեսակի մեքենայություններով դրանք առաջ քաշում, որպեսզի երբ նախապես գործի դրած սաղարանները ապարդյուն մնան, վրա բերելով ա-

* Ծարուհաված «Էջմիածին» ամսագրի 1975 թվականի № ԺԲ-ից։

մեծամեծությամբ, ընկնի ու պարտության մատնի: Ահա այդպիսին է [բանասերկուն] և նա երբեք չի հրաժարվի իր անհագործությունից: Բայց Տերը զորությանց գիտե յուրալիներին և թնայողություն և տալիս նրանց կոխել ի վերա անհայն զորությանց թշնամու, նա [Մարիամին] ուղղեց նրանց ճանապարհով, որով նրանք իր զորությամբ ուժ են ստացել: Եվ զարմանալիմ այն է, որ փառիկատուն կանայք անգամ հաղթում են պարծենկոտին: Այս իսկական աղավնին, որ ամբողջությամբ [սուրբ] հոգով էր ընթանում և որով նա խոսափում էր բանասերկոտի որոգայքներից, փորձության զոհ չդարձավ: Այդ [փորձությունը] ծանրագույն զըրպարությունն էր, որ անգամ տղամարդկանց է խեղճացնում, ըստ առակի, զրպարտություն, որին անգամ բազմաշարքար Հորը չկարողացավ դիմանալ, թեև զրպարտությունը նմանատիպ չէր: Ովքեր էին զրպարտության հորինողները: Ոչ այլ ոք, բան Մարիամի ամուսնու եղբայրները՝ Հելենե և Ալեքսիոս էր նրանց անունները, հենց նրանք են, որ զրպարտում են անբիծին իր ամուսնու առաջ (ինչպես, պատմում են, եգիպտոսիհն Հովսեփին)²¹, իրեն թե նա դատարկում է սուրը և հարսերով ու ծուռ Դեմետրիոսի հետ: Ամուսինը լսեց զրպարտությունը, այն հիմնավոր համարեց և այլևս չէր ուզում հաշտվել կնոջ հետ: Նա առանձնակի կանչելով կնոջ, ասաց. «Քո մասին լավ բաներ չեն լսում, ով կինն: Նրա հարցին, թե ի՞նչ են ասում, և ումից է նա այդ բանը լսել, նա պատասխանեց. «Եղբայրներն ասացին, և խոսքը տուր դատարկելու մասին է, և, որ ամենատարափելին է, ծուռ Դեմետրիոսի հետ քո անտակությանը»: Ամենամեծը, լսելով այդ ամենախայտառակ խոսքը, խոր ու ցավագին հառաչեց, աչքերը արցունքներով լցվեցին, և նա ասաց. «Ավա՛ղ, մարդկանց մոտից վերացել է վատամտությունը, եթե ի՞նչ այսօր ներկայացված մեղադրանքների՝ իմ հերքելու հավատ ընծայվեք, դու բանի տեղ չէիր դնի ինձ ներկայացված երկու զրպարտություններն էլ, և ինձ երկուսից էլ անմասն կհամարեիր: Ես չգիտեմ, ինչո՞ւ համար հորինվեցին այս բոլորը: Ես քեզանից բացի այլ տղամարդ չեմ ճանաչել, ո՛ր՛վ ամենաբաղձր ամուսին, որի հետ ես օրհնավոր կարգով ամուսնացել եմ, որին տրվել եմ իմ մոր կողմից և որին միայն գիտեմ: Ես հաճույքով կհրաժարվեի քեզանից էլ, եթե դա հնարավոր լիներ և աստվածային օրհները թույլ տար: Բայց այժմ ես գիտեմ, որ իմ մարմնի տերը չեմ, դու ես իմ զուլիդը²²: Ես այդ կարող եմ ասել իմ պաշտպանության համար այդ զարհուրելի զրպարտությունից և վկա եմ կանչում ամենատես աչքը՝ ես չեմ խայտառակել ինձ և չեմ անհավատվել քո մահին: Զրպարտիչների այն մեղադրանքին, թե ես ցիրուցան եմ անում տան ունեցվածքը, թող ասեն, ի՞նչ եմ վատում, որտե՞ղ և ո՞ւմ համար: Եթե նրանք ինձ մեղադրեն, թե շուտ եմ, պե՞տք էր կամ էլ հիմարությունից եմ ամեն ինչ ցարքայիվ անում և այդ բանի վերա-

բերյալ հավատի ու արժանահավատ ապացույցներ ներկայացնեմ, պատժի՛ր ինձ: Ես կառանամ սուրբ և իսկական փոխհատուցումը [անեղ] դատաստանի օրը²³: Իսկ եթե ես սրբերի պես եմ վարվում՝ սնում սովալներին և տիտիում աղքատներին, ապա դրանով ես մեր հասարակաց՝ իմ և քո փրկության մասին եմ հոգում, քանզի մեր կյանքն էլ է հասարակաց: Արդ, դրանք ցարքայիվ անելով վճա՛ս եմ տալիս, թե օգուտ: Զէ՛ որ սերմը մեծ բերք կտա»:

8. Նիկեիորը պատասխանեց. «Ես չեմ արգելում կարոտյալներին օգնել: Դու գիտես, ես երբեկին չեմ հակառակվել քո այդ նախանձախնդրության: Բայց դեմ եմ չափից շատ շուտ ու մեծահոգի լինելուն, քանզի ուրիշների կարիքները այդպես շուտ հոգալով մեք ինքներս ենք կատարյալ աղքատության մեջ ընկնելու»: Նա այդպես ասաց և խոսակցության վերջ տվեց, ավելի զրպարտողներին հավատ ընծայելով, քան կնոջ: Այդ օրվանց սկսած նա պահակներ կանգնեցրեց երամուհու սեմակում և սկսեց ուշադիր հետևել նրան: Նրան ապաստարկող ամենամտերիմ աղախուն նա հրամայեց իր մոտ կանչել: Երբ նա ներկայացավ, նախադր խոժոնցնելով ծուռ-ծուռ նայեց նրան ու կոպիտ ձայնով, վայրենի հայացքով ու խոսքով հարց էր տալիս տիրուհու մասին, ապառնում սպանել, եթե իրեն չհաշտնի նրան զայթաղելոցնողի մասին: Նա թեև նախատարի բերմամբ աղախին էր, բայց ստրկամիտ չէր, նա ազատ հոգի ուներ, վախից չդավաճանեց ճշմարտության, սպառնալիքից չերկուղեց և տիրուհու դեմ առապատիր խոսքեր չասաց, այլ տիրոջ դիմեց անկեղծ ու շիտակ: Նա ասաց. «Տեր իմ, այսօր իմ կյանքն ու մահը քո ձեռքում է, և եմթախ եմ կրելու ինչ որ դու կամենաս: Ես տիրուհու վերաբերյալ ոչ մի վատ բան չգիտեմ, ոչ էլ ուրիշից եմ լսել: [Նիկեիորը] դրա վրա զայրացած, հրամայեց գետին տուրաված աղախունն աստիկ գանահարել և երբ նրանից այլ բան չիմացավ, թույլ տվեց նրան վերադառնալ [իր տեղը]: Այդ բոլորին ակամատես եղած երանուհին իմացավ, որ աստանան է իր դեմ մղեգնել, մարդ ուղարկեց միանձնուհիների և վաճառականների մոտ, որոնց նա օժանդակություն էր ցուցաբերում, և հայտնելով իր գլխին եկածի մասին, Աստծո սիրույն պաղատում էր իր համար աղոթեն, իսկ ինքը, փորձության դեմ զինվելով, արտասովալից աղոթքով ու պաղատանքով, դիմում էր փրկելու կարողություն ունեցողին. «Աստուած, յօգնել ինձ նայեա, Տէր, ընկերել ինձ փութա»²⁴: Նա աղոթում էր նաև զրպարտիչների համար՝ պաղատելով ներել նրանց մեղքը: Նրա դեմ մի զրպարտիչ էլ բուսավ, Դրոսոս էր նրա անունը, որին այդ թեթևամիտ մարդը, որ դատարկ անոթների պես ուշադրությամբ տարուբերվում էր, իր տան վերակացու էր նշանակել: Նա [Դրոսոսին] իր կնոջ հակիչ նշանակեց, կարգադրելով ուշադիր հսկել նրան, նրա հետ նաև աղախիներին մեկին, որին վստահեց գանձարկը, հրամայելով ամեն կերպ վշտացնել իրանում, և

ինչ որ ցանկանա, ինչ որ խնդրի՝ չտալ: Այս տխուր բաների վրա մարմնական հիվանդությունն էլ բարդվեց, վրա եկավ նաև ստամոքսի ընկերոջ հիվանդությունը, որից նա շատ և անվերջ տատապում էր, ցավեր ունենում ու զարշաճը զգում: Նա տանջվում էր ստամոքսի ցավերից, երբ հասավ նաև մյուս աշխարհը գնալու ժամանակը: Այդ միջոցին այսպիսի մի բան էլ պատահեց:

9. Հասավ Բարեկենդանի կիրակին, երբ քրիստոնյաներս նախապատրաստվում ենք սուրբ քառասնից [պահքից]: Բայց այդ անգույթ մարդը այդ օրն անգամ չուզեց կնոջ հետ սեղան նստել, այլ կերուխում էր անում առանձնացած՝ եղբայրների և մյուս հարազատների հետ: Այդ բանը տխրեցրեց երանումուն և նա, դիմելով ներկա եղող կանանց, ասաց. «Ահա եկան պահքի օրերը, որոնց ժամանակ ապաշխարությանը մենք մաքրում ենք մեզ գործած մեղքերից: Այդ, ինչպե՛ս [Աստծո կողմից] ընդունելի կլինի պահքն ու աղոթքը իմ ամուսնու, որ շարունակում է այդպես անհաշտ ռիս պահել և անհիմն թշնամությունը՝ անվերաց: Վա՛յ քեզ, նեճգ ու դրուժան աստուհ, մեր փրկության թշնամի և Աստծուն օտար: Քո՛ւ արտերը կարծրացնողդ գործըն է դա»: Այդ խոսքը հասավ մի չարախնդի ափսոսանքին, որ շտապեց Նիկեիոսին պատմել, բայց ոչ իր լաճը, այլ այն, ինչ գիտեր, որ կզրգոի նրա բարկությունը և կբորբոքի այն: Նա ասաց. «Քո կինը քեզ քրիստոնյա էլ չի համարում, գտնում է, որ դու [փրկության] բարի հույսեր էլ չունես, քանզի չես հաշտվում իր հետ, նա պարզապես քեզ աստուհան է անվանում՝ ի սկզբանե անտի մարդասպան և Աստծուն հակառակ»: Լսելով դա, նա թեև զայրացավ, բայց այդ օրն իրեն զսպեց, քաշվելով ներկաներից, որոնք մեղմում էին նրա զայրույթը: Բայց հաջորդ օրվա լուսարացին, մի խարազան տանելով, նա մտավ նրա սենյակը և հայացք գցելով [Աստվածամոր պատկերի առջևի ճրագը վառած էր, նա ցրել էր սենյակի մթությունը և ներսում եղած ամեն ինչ տեսանելի էր], տեսավ երանուհուն մահաճակի վրա պառկած՝ մի մանուկ գրկին: Հոճելով նրա մազերից նա քարշ տվեց նրան ու անողորմ կերպով ծնեց, միմչև որ մոտիկ գտնվող երկխաներից մեկը վազեց, դրսի մարդկանց հաղտնեց, որոնք ներս մտնելով, հագիվ նրա ձեռքից պոկեցին նրան:

10. Ամուսնու ձեռքից պրծնելով նա շտապեց գնալ տան մի տեղ, բայց ոտքը սայթաքեց և գետին ընկնելով, գլուխը վիրավորեց: Նրա գլխին երեք փորձանք եկավ. հիվանդությունը, վիշտը և ստացած վերքը, որի պատճառով ջերմությունը աստիկ բարձրացավ և նա իրեն անկողին նետեց: Տալը օր անց, երբ հիվանդությունը սաստկացավ, նա հայտնեց ամուսնուն. «Եթե ուզում ես ինձ՝ թըշվախս դեռ կենդանի տեսնել, տե՛ր իմ, եկ, տեսնենք իրար»: Երբ նա եկավ, ասաց. «Ահա ես հեռանում եմ [այս աշխարհից], Տերը երազում այդ բանը հայտնեց, ինձ ողորկելով երկու երկխանե-

րին, որպեսզի յուրաքանչյուրը [իմ] ձեռքից բռնած տանեն կաննող թագավորին»: Նա լսելով դա, սկսեց ողբալ, իսկ կինը վերստին դիմեց նրան ու ասաց. «Ահա, ինչպես որ կամեցավ, այս հիվանդությունս եմ ես գնում, հետևում հասարակաց Տիրոջ մոտ: Դու ինձ չէիր հավատում, բայց գեթ հիմա ընդունիր ճշմարտությանը առկած իմ խոսքերը: Դու լավ չարեցիր հավատ ընծայելով ինձ զրպարտողներին ու ակամջ կախելով պատիր խոսքերին: Վկաս Տերն է, որի ձեռքերին եմ հանձնում իմ հոգին: Ես անտեղյակ եմ այդ նեճգ զրպարտության և դու ինձնից պահանջեցիր ասել այն, ինչ ես չգիտեի: Համիր քո արտից վատ կասկածը և ուրախ լեր ու ապրիր զավակների հետ»: Այդպես ասելով, նա իր ուսերի վրայից հանեց քղամոլը, կանջեց տնեցիներից մեկին ու կարգադրեց ծախի այն և ստացածը պարտքի դիմաց տա պարտատերերին, նշելով նրանց անուններն ու պարտքի չափը: Ամուսինն ասաց. «Քղամոլը թող երկխաներին, ինչ վերաբերում է պարտքին, ես կհատուցեմ պարտատերերին»: Եվ տեղում տեղը նա այդ բանն արեց: Երբ նրա մոտադրոտ մահվան մասին իմացան և քաղաքի երեւելի կանայք, բոլորը նրա մոտ եկան: Տեսնելով նրանց, նա ողջագուրվեց և փոքր-ինչ խոսակցելով նրանց հետ, վերջում ասաց. «Ահա, բացվում է երկինքը, ես անճատելի լույս եմ տեսնում ու ճոճվող պսակ»: Այդ խոսքերի վրա էլ նա հեռացավ:

11. Սկսվեց մեծ լաց ու կոծ՝ ամուսնու և կանանց կողմից: Երբ ողբը դադարեց, պարտատերին թաղման լուգանքը, բայց նախքան երանումուն [լողացնելը] նրա մարմնից քաղցր բուրմունք բարձրացավ ու ողողեց տեղը, այն աստիճան, որ սցոտեղ հավաքված կանայք ապուշ կտրեցին ու վախճանվածին անոթ ընտրության անվանեցին²⁵: Երբ լողացրին և ընդունված կարգի համաձայն թաղման հանդերձների պահանջը եկավ, ահա այստեղ է, որ ամուսինը համոզվեց իր կնոջ անհատնում ողորմածությանը: Նա իր համար վերջին շապիկն էր թողել: Ամուսնու մոտ մի աղախին եկավ, անունը Մարինա, և ասաց, որ երանուհու հետ թաղելու համար չկա ոչ մի շապիկ կամ շոր: Երբ [ամուսինը] զարմացած հարցրեց, թե ի՞նչ եղան այդքան շորերը, որտե՛ղ են դրանք գործածվել, աղախինն արտասվալից ասաց. «Ջարմանո՛ւմ ես, տեր իմ, և ապշում, որ իմ տիրուհին այս շորից բացի, որը հագցրինք նրան լողացնելուց հետո, ուրիշը չունի: Այդ մարդասեր հոգին չէր կարող տեսնել որևէ մերկի և չհոգալ նրա մասին, տեսնել մի աղքատի և չօգնել նրան: Ահա նրանց վրա է նա իր բազում [հանդերձները] ծախել: Դու, որ շոր ու շապիկ մասին ես հետաքրքրվում, ինչո՞ւ չես հարցնում ավելի թանկագին բաների մասին, ոսկու, արծաթի և այլ զանգեղանի, որոնք ինչքան էլ փութաջան փնտրես, չես գտնի: Այդ բոլորն էլ չխուսափեցին նրա աջից, բան չկա, որ նա աղքատներին չբաժանեց»: [Ամուսինը] լսեց այդ խոսքերը,

բայց ամռաննամ ոչնչով չհետաքրքրվեց, նա կարգադրեց իր շապիկը կանացիի ձեռն և երանուհու հետ թաղեմ: Երբ այդ սուրբ մարմինը դրվեց մանակայի վրա, նրա մոտ եկավ Եվթիմիոս եպիսկոպոսը, ապա էկոնոմ Անթիմոսը²⁶ և քաղաքի գրեթե ողջ բնակչությունը: Այս Անթիմոսը, որ տեղյակ էր երանուհու ամեն ինչին, քանզի սպասավորել էր նրան, սկսեց մեկ առ մեկ պատմել, թվարկել այրիներին ու որբերին և մյուս կարիքավորներին, որոնցից և ոչ մեկը [նրա մոտից] ձեռնուհայն չգնաց, բոլորն էլ իրենց պետք եղածն ստացան: Պատմելով դա նա արտասվեց և ներկաներին էլ արտասվել տվեց: Համայն կղերի կողմից թաղման երգասացության կատարումից հետո, նրա սուրբ մարմինը տարան կաթողիկե եկեղեցի և սուրբ տեղում այն ամփոփեցին: Մի քանի օր հետո, երբ սուգը որոշ չափով մեղմացել էր, ամուսինն սկսեց սնդուկները բանալ, փնտրելով վախճանվածի ունեցած-չունեցածը: [Անդուկները] դատարկ գտնելով, նա հրամայեց կանչել աղախնին և երբ նա ներկայացավ, հարց տվեց, ո՞ր եմ տիրուհու զարդերը, թանկագին քարերով ու մարգարիտներով ակաճեղջերք, ոսկե մատանիները, մետաքսյա, գույնզգույն հանդերձները: [Աղախինը] պատասխանեց. «Իրանց մի մասով գերիներին փրկագնեց, մյուսով՝ պարտքերը մարելու կարողություն չունեցողների պարտքերը մարեց, աղքատներին սնեց, կերպասները եկեղեցիներին նվիրեց՝ նրանց մի մասով սուրբ սեղանները ծածկեց, մյուսով՝ [եկեղեցու] շենքը զարդարեց»: Ահա հիմա էր, որ նա իմանում էր իր կնոջ առաքինության վասին, պարսավում իրեն, պարսավում նրան գրպարտողներին, իրեն խարոդ և մեղսակից դարձնող մեղսագործներին: Նա նրանց թշվառական էր անվանում, իսկ իրեն՝ ավելի մեծ:

12. Քիչ անց, դեռ չորս ամիսն էլ չէր լրացել, մի դիվաճար, անունը Ստրատեգիոս, եկեղեցի եկավ և սկսեց հանձնառու կոչել Մարիամին՝ տուր-մարիս²⁷ կնոջ: Այդ կանչի վրա ողջ քաղաքը հավաքվեց խանգարվածին տեսնելու: Երբ դեռ թողեց նրան՝ անկապ-անկապ գոռացողին և էքստազի մեջ շարժվողին, եպիսկոպոսը կանչեց և հարցրեց, ո՞վ է, ո՞րտեղից է եկել, ո՞վ է նրան սովորեցրել դիվաճար ձևանալ և առանց ամաչելու այդպես է վարվում ու գոչում: [Եպիսկոպոսն] ասաց. «Մենք խոստովանում ենք, որ [այդ] կինը լավն էր ու քարի, ականատես ենք եղել նրա առաքինի կենցաղավարության, բայց չենք հավատում, որ նա արժանացել է նման շնորհքի, քանզի հրաշագործելու [շնորհքը] Աստված պարգևել է ժուժկալ այրերի, սուրբ վանականների և մարտիրոսների: Իսկ այս [կինը] և՛ ամուսնացած է եղել, չի հրաժարվել աշխարհիկ կյանքից, ո՛չ էլ որևէ արտակարգ ու մեծ բան է գործել: Արդ, ո՞րտեղից նրան հրաշագործելու [շնորհքը]: Քեզ ո՞վ խորհուրդ տվեց այդպես ձևացնել: Գուցե մեղեցյալի ամուսին՞ը, կամ [Մարիամի] որևէ ազգականը: Արդ, եթե վերջ չտաս դերասանության, ապա խարազանը քեզ խել-

քի և ուշքի կրերի»: Դրա վրա մարդը իր մեղքերն էր խոստովանում, որոնց պատճառով դևի ճանկն ընկավ, ասաց, որ էքստազը կեղծիք չէր, այլ, պրեմիում էր, իսկական խանգարում: Նա ասում էր, թե հենց այստեղ նա բուժում կգտնի, կիրկվի իրեն տանջող դևից, և եթե նրանք չտեսնեն այդ բանը, թող իր անձի նկատմամբ անեն, ինչ ցանկանան: Բայց այդ խոսքերը չհամոզեցին եպիսկոպոսին, և այդ պատճառով պատմադիվների տակ նրան ճամփու դրեցին: Մարիամի ամուսինը նրան բանտ նետեց, հարցաքննության ենթարկեց, չարչարեց, հարց տալով, ո՞վ է իրեն սովորեցրել այդպես անել: «Ո՞րտեղից ես իմացել և հանձնառու կոչ ես անում իմ կնոջ: Կատարվածը ավելի շուտ նրա ազգականների հնարանքն է: Բայց հանդգնությունդ քո գլխին փորձանք կրերի: Եթե այստեղից անհապաղ չհեռանաս, ապա [քեզ] խորհուրդ տվողներին էլ կհասնի»: Մարդը պատասխանեց. «Ես երբևիցե չեմ տեսել քո կնոջ, նրա ազգականներին չեմ ճանաչում, որպեսզի նրանց կողմից կաշտավելով, ասածիդ պես, դիվաճար ձևանամ: Կա մի վայրագ դև, որ ինձ տանում է չուզածս տեղը: Նա է ինձ հալածելով այստեղ բերել: Դու ինձ մի սպառնա, մի փոքր համբերիր և կտեսնես փառքն Աստուծո, քանզի ոչ միայն դևեր են այստեղից հալածական լինելու, այլև բազում ախտեր են դարձանվելու և ամենից առաջ ինձնով է փառավորվելու Աստված, և եթե մի փոքր անց իսկապես ականատես չդառնաք դրան, ինչ ես ասում եմ, ապա պատրաստ եմ կրելու ձեր վճիռը»: Նա աղոթեց ասաց, իսկ Նիկեփորն ապշած լռեց: Նա ոչ կարողանում էր իսկապես հավատալ նրան, ոչ էլ չհավատալ, նա տատանվում էր, ապաստելով տեղի ունենալիքը: Եվ ի՞նչ պատահեց: Դիվաճարը [դևի] կողմից հալածվելով, բազում օրեր գնում էր սրբուհու գերեզմանը: Մի կիրակի օր, առավոտյան սաղմոսերգության պահին, երբ գրեթե ողջ քաղաքը հավաքվել էր [եկեղեցում], դիվաճարը մերձենալով երանուհու շիրիմին, փորձեց քարձրացնել շիրմաքարը, կոչ ամելով մյուս մարդկանց իրեն օգնեն, քանզի իբրև թե սրբուհին ցանկանում է շիրիմը բացվի և մարդուն դեռ թողնի: Երբ երանուհու ամուսնու թույլ-տվությամբ մարդիկ նրան օգնության հասան և շիրմաքարը քարձրացվեց, դիվաճարը շիրիմի դուռը հանելով, դեմ շարտեց, ապա խոնարհվեց երանուհու մարմնին, համբուրեց նրա աչք, այդ քանի վրա նրա փսխելն եկավ, նա փսխեց. դա արտաքննապես արյուն էր, բայց աներևույթ՝ իրեն տանջող դևն էր: Այս հրաշքի վրա բոլորն ապուշ կտրեցին, անգամ եպիսկոպոս Եվթիմիոսը: Նրանք գերեզմանի վրա խոնարհվելով, երանուհու մարմնին անասական գտան, նրանից բուրմունք էր գալիս: Ավելի ուշադիր նայելով, նրա դեմքի շուրջ արյուն տեսան: Կղերականներից մեկը, կարծելով, որ այդ [արյունը] դիվաճարի փսխածն է, ուզեց սրբուհու հանդերձներով սրբել այն: Բայց իրականում [արյունը] նրա քթից էր գալիս, և դա կենսաբեր էր: [Մարդիկ] սկսեցին արտասվալից փառավորել Աստուծո՝

քաղաքին մեծ լավություն ցուցաբերողին: Այս հրաշագործությամբ մարդը չար դևից պրծած, ճանապարհ ընկավ դեպի իր տունը՝ ոչ լուռ, այլ որպես հրաշքին ականատես, երանուհու բարեգործությունը հայտարարելով: Դրա վրա սկսեց հիվանդ մարդկանց մեծ բազմություն հոսել դեպի գերեզմանը, և բուժում ստանալով տուն էին վերադառնում. կույրերը տեսնում էին, խուլերը՝ լսում, խելագարները՝ ուշքի գալիս, իսկ դիվախները, որոնք թվով ամենից շատն էին, տանջող [դևից] պրծնում: Ամեն ինչ թվարկել հնարավոր չէ, բայց երանուհուն [Աստծո կողմից] տրված շնորհքը ցույց տալու համար ես շատից մի քանիսը կ'ապստմեմ:

18. Դատեր պատճառով կյանքը տակնուվրա եղած մի կին, տեսնելով, թե ինչպես է մա խելագարվել, որ մինչև անգամ իր սեփական աղտեղություններն ու գարշահոտ աղբն էր հավաքում ու ճաշակում, գտնվելով ամել վիճակում, ինչ որ անհրաժեշտ էր գտնում, արեց, բայց ապարդյուն: Ի վերջո, կատարյալ հուսաբեկ, բժիշկներից ձեռք քաշեց, իր դժբախտիկի հետ սրբուհու մոտ եկավ և սկսեց նրա գերեզմանի վրայի ճրագի ձեթից քսել խելագար դժբախտը, և փոքր անց նրան առողջացած տուն բերեց և նրա՝ արդեն գիտակից մարդու հետ սկսեց փառավորել սրբուհու Աստծուն: Նույն ձևով մի կույրի էլ ձեռքից բռնած բերեցին, որ վերադարձավ տեսողությունը գտած. մա սուկ ձեթ քսեց: Այսուհետև ամեն տարի մա գալիս էր երանուհու գերեզմանը՝ Աստծուն և նրան գոհանամ ասելու:

14. Մի դիվախար կնոջ սրբուհու գերեզմանը բերեցին և մա այստեղ իրեն տանջող դևից փրկություն գտավ: Այն դիվախար քահանան, որին հազիվ էին շղթաներով ու ոտնակապերով պահում, այստեղ գալով իրեն նեղող դևից փրկություն ստացավ: Այնուհետև մի միանձնուհի էլ մույն քանին արժանացավ. այդ դիվախարին Բուդլարիայից բերեցին, իսկ սրբուհին նրան հափշտակած [դևից] ազատելով, ուղարկեց:

15. Հետո՝ Նթե դիվախարներն այստեղ փրկություն էին գտնում, ապա ինչ է, այլ կարիքավորներ օգուտ չէին՝ քաղի: Շատ-շատ: Երանուհու համբավը տարածվել էր ամենուր և Կարաբիզյունից²⁸ մի կին գալիս է գերեզմանը և այն պատճառով, որ նրա ստիճքի պտուկը քարացել էր և չէր կարողանում իր մանկան կերակրել, կաթի աղբյուր է խնդրում [սրբուհուց] և ստանալով այն, բերկրացած տուն վերադառնում: Մի այլ կին էլ մույն քանը խնդրեց ու ստացավ: Բայց ճանապարհ ընկնելով, ինչ-որ պատճառով քարկացավ, ստիճքները դարձյալ չորացան ու քարացան մախկինի պես: Գերեզմանի մոտ միևնույն օրը երկու անդամալույծ բերեցին, որոնք արժանացան կատարյալ ապաքինման: Մի կույր կին էլ եկավ և աչքերին գերեզմանի ճրագի սուրբ ձեթից քսելով, կատարյալ տեսողություն ստացավ: Իսկ մի այլ կին էլ՝ դիվախար ու տառապյալ, ծծկեր մանուկը գրկին, եկավ երանուհու գերեզմանը, արտաալալից, ջերմ հավատով

մանկան գցեց [սրբուհու] ոտքերին և նրան ետ ստացավ չարչարող դևից մարդկած: Ամեն օր այսպիսի բյուր հրաշքներ էին կատարվում:

16. Հրաշքների համբավը հասավ մաև Արկադիուպոլիս²⁹: Կախլակին³⁰ կոչվող վանքի բարեպաշտ մայրապետը ցանկություն է ունենում երանուհու գերեզմանը գալ և ականատես լինել լսածը որևէ մի բանի: Երկու աշակերտուհիներով մա ճանապարհ է ընկնում դեպի Բիզյուն: Իրեն ուղեկցում էր և մի դիվախար վանական: Կինը օթևանում է Նիկեփորի, երանուհու ամուսնու մոտ, իսկ հաջորդ օրը գալիս է գերեզմանը: Սուրբ պատարագի պահին, կարծես ազդանշանով, հիմա դիվախարներ շտապում և անկապ-անկապ գոչելով, բացում են գերեզմանը: Մեկն իր շրթները [սրբուհուն] ձեռքին հպեց, մյուսը՝ ոտքին, մի ուրիշն էլ՝ պատանքներին և բոլորն իսկույն խելոքացան ու առողջացան: [Մայրապետն] ապշեց, մա խոնարհվեց հավատով ի համբուրելու սրբազան մարմինը: Տեսնելով, թե ինչպես գլխի թաշկինակը երկու պստերին է կապած, փորձում է անջատել, բայց այնտեղից արյուն կաթեց: Կինը համոզվելով հրաշքին, գոչեց. «Հիրավի, ապրում են սրբերը»: Նա մի քրջով սրբեց արյունը և այն ցույց տվեց Արկադիուպոլսի բնակիչներին, անհրազեկ մարդկանց պատմեց հրաշքի մասին:

17. Այն ժամանակ ամուսնուն երագում երանուհին երևաց ու կարգադրեց աղոթարան կառուցել և այնտեղ վերամիտիել իր աճյունը: «Որպեսզի կարողանամ տեսնել ինձ անշափ ցանկալիին» ասելով: [Ամուսինը] դա սովորական երագ համարելով, քանի տեղ չորեք, այդ իսկ պատճառով արդար պատիժ ստացավ. աչքերը քաց էին, բայց մա չէր տեսնում: Նա սթափվեց ու համոզվեց, որ դժբախտության պատճառը լոկ իր անգոսնումնն է: Նա բազում մարդկանց հավաքեց ու հրամայեց մերձակա դիրքի մոտ փորել և այնտեղից քառակուսի վիմեր բերել: Հենց սկսեցին փորել, մա էլ սկսեց աղոտ տեսնել, քանի առաջ էր գնում գործը, մա սվելի լավ էր տեսնում, իսկ երբ այն ետև սկսեց, աչքերը կատարելապես քացվեցին³⁰: Դրա վրա մա ամենայն փութաջանությամբ շինարարության ձեռք գցեց: Երբ տաճարի [կառուցումն] ավարտվեց ու արքեպիսկոպոսի կողմից սրբազործվեց, պետք էր մարմինը վերամիտիել: Նիկեփորը իր մարդկանց հետ այդ գործի համար գնում է կաթողիկե եկեղեցին, բայց կղերականները [տեղափոխման] հավանություն չտվեցին, որի վրա նրանք հարձակվեցին արքեպիսկոպոս Եվթիմիոսի վրա: Նիկեփորը տակնուվրաությունից և նրա հետևանքներից վախենալով, միառժամանակ ոչնչի չձեռնարկեց, բայց հարմար առիթ ձեռք գցելով, երբ արքեպիսկոպոսը բացակայում էր, շուրջ քառասուն հոգի վերցնելով և իրեն հակադրվելու չհանդգնած մի քանի կղերականների, գլուխ բերեց [մարմին] վերամիտիումը:

18. Երբ աճյունն ամփոփվեց տաճարում, մի դիվախար կին, քացելով սրբուհու դամբարանը, սկսեց

Նրա ոտքի մեծ մատը սեղմել, որից արդյուն դուրս եկավ: Կիներ մի փոքր գետնին շուռ ու մտն գալով, առողջացած ոտքի կանգնեց և ապաքինված ճանապարհ ընկավ: [Սթրուին] Ռեդեատուսը՝ ապրող մի ճգնաժամի անարդի երագուն երեսը՝ սպիտակ հանդերձներ հագած, գլխին կարմիր եմիփորոն գցած, աջ ձեռքին վառված ջահ, որի վրա գրված էր. «Գթության ջահ»: Նրա առաջով երկու սիրասուն ու գեղեցիկ տղաներ էին գնում, իսկ ետևից գալիս էր գեղադեմ մի կույս: Գնալովորի հարցին, թե ո՞վ է և ո՞րտեղից իր մոտ եկավ, նա ուրախ ու բերկրացած ձայնով պատասխանեց. «Ես Բիզյուն քաղաքի Մարիամն եմ, որի մասին դու շատ բան ես լսել և որին ցարդ չես տեսել: Արդ, այնպես, ինչպես որ դու այժմ ինձ տեսնում ես, այդպես էլ նկարիր» իմ որդիներ Օրեստեսի և Վարդանի և ինձ հետևող մանկիկի՝ Ագաթի հետ, [պատկերն] ուղարկիր Բիզյուն քաղաքը: Եթե Ռեդեատուսը գարթնելով և իմանալով, որ դա երանուհու կամքն է, իր երագուն տեսածի պես ուրախությամբ պատկերը կատարելով, Ռեդեատուսից Բիզյուն է ուղարկում՝ նրա ամուսնու կողմից կառուցված տաճարը: [Մարիամին] կենդանությանը տեսնողները, տեսնելով պատկերը, ապշեցին և խոստովանեցին, որ հիբալի հենց նրա և նրա զավակների իսկական պատկերն է:

19. Այստեղ մի քանի վանականներ, ավելի նախանձից, քան թե եռանդից դողված, տեղի ունեցող հրաշքների առնչությամբ ստում էին. «Հնարավոր բան չէ, որ աշխարհիկ կյանք վարած, ամուսնության հաճույքին մասնակից դարձած մեկը Աստծու կողմից արժանանա հրաշագործելու շնորհից, երբ ամեն մի հաճույքից զրկված, ամեն տեսակի չարչարանք ու տառապանք ճաշակած, գիշեր-ցերեկ աղոթքով տարված վանականները չեն արժանացել նման շնորհից»: Նրանք այդպես էին ստում, անգիտանալով, որ իր խոստացածը կատարողը արժանի է վարձատրության, իսկ ով չի կատարել այն, զրկվում է վարձատրությունից, իր դատապարտության պատճառ դառնում, քանզի խաբել է նրան, ում խոստացել է: Երանուհի Մարիամը, հրաշքը մեր սերնդի, ինչ որ խոստացավ սուրբ մկրտության [ժամանակ], մինչև վերջ ճիշտ ու ճիշտ կատարեց: Աշխարհականների համար դա լիույի բավական է: [Մարիամը] իր խոստումի վրա, բացի բազում տարբեր առաքինություններից, ավելացրեց նաև ողորմածությունը, որ բոլոր առաքինություններից ավելի է մարդուն վեհացնում, քանզի նա պտուղն է սիրո, որից ավելի շատ է բերկրանում Աստված և ցանկանում, որ այն սեր կոչվի: Եթե մարդ մեկ անգամ խոստանա և խոստումը չկատարի, երկրորդ անգամ էլ չկատարի, ապա նա ինչպե՞ս կարող է Աստծու մրցանակին արժանանալ: Բայց սրանց շուրջ փիլիսոփայելու ժամանակը չէ:

20. Կասկածի ցեցն ընկավ նաև Բոլոսի եպիսկոպոս Ստեփանոսին, նա եմթադրեց, որ սրբուհուն վերագրվող հրաշքները հորինած բաներ են,

հավատացած լինելով, որ նրա ամուսնացած, հարուստ լինելու հանգամանքը և աշխարհիկ փառքը սրբության բարձրության բացասող են: Արդ, ինչպե՞ս եղավ, որ մարդու կասկածները փարատվեցին: Մի դիվանար կին, անունը Զոնե, յոթ տարի էր, ինչ տաճարի մոտ նստած տեսնում էր ապաքինվող մարդկանց, ինքը սակայն մնում էր անդարմանելի: Բայց նա հուսաբեկ չէր լինում և չէր հեռանում այնտեղից: Սուրբ պատարագի պահին նա շիրիմի մոտից հեռանալով, բռնեց եպիսկոպոսի [ձեռքն] ու ցույց տալով շիրիմը, աղաչում էր բացել այն, դա երանուհու հրամանն էր, որպեսզի բուժի դիվանարին: Եպիսկոպոսն ապշեց, իսկ ներկա գտնվող եկեղեցուպանն ու մյուս մարդիկ աղաչեցին նրան երանուհու ամուսնուց վերցնի շիրիմի բանալին: Այդպես էլ արեցին: Դիվանար կինը բաշե շիրիմը ծածկող սավանդ և այն նետեց քահանաներից մեկի վրա, ապա երբ շիրիմը բացեցին, նա համբուրեց սրբուհու աջը և փսխելով, բուժում ստացավ: Եպիսկոպոսն ասաց, թե այդ հրաշքը իր համար կատարվեց, որպեսզի հրամարվի երկմիտ խոհերից: Նա համբուրեց սուրբ անդունդը, այն գտավ անապական ու բուրդող և ապուշ կտրած հեռացավ: Ապաքինված կինը, այն պատճառով, որ բուժվելուց հետո խելքի չէր եկել և իրեն տվել հաճույքների ու հարբեցողության և դրա ետևից եկող անառակության, մի տարի անց դարձյալ դիվանար է լինում և զիմի յետին մարդոյն այնորիկ չար քան զառաջինն³²: Ախտն այլևս բուժել հնարավոր չէր:

21. Երանուհու զրպարտիչները չէին կարող խուսափել նրան պատվող Աստծու արդար դատաստանից ու անպատիժ մնալ, կամ էլ հենց նրա [Մարիամի] դատաստանից, քանզի պետք էր, որ նրա զրպարտիչները հաշիվ տային: [Մարիամը] գտնում էր, որ նրանք պետք է պատիժը կրեն, ավելի ճիշտ՝ դատախարակվեն հենց այստեղ, որպեսզի պատասխան չտան մյուս աշխարհում: Ինչպիսի՞ն էր պատիժը: Նիկեփորը իր տան հոգացողությունը թողել էր իր քրոջը՝ Հելենին, որի մոտ էր և վերջինիս դուստր Սոֆիան: Մի անգամ երանուհին գալիս է Սոֆիայի երագուն՝ կարծես վրդովված այն քանի համար, որ Հելենեն է տանտիրություն անում, ու հրամայում, որ [Հելենեն] հեռանա այդտեղից, և թե չի ուզում այդ քանն անել ականա: Աղջիկը երագու պատմեց իր մորը, քայց նա ուշադրություն չդարձրեց: Մի քանի օր անց աղջիկը հանկարծակի ցերի ուժեղ ցավ զգաց, այն տարածվեց նաև սրտին և այդ ցավերից նա երեք օր անց վախճանվեց: Հելենեն երկու դուստր էլ ուներ, որոնք երանուհու դեմ կատաղած լինելով և իրենց մոր մեզգության մասնակից, դիվանար լինելով այդպես մնացին մինչև մահ: Իսկ Դրոսոսն էլ, որի մասին արդեն ասվեց, թե ինչպես էր զրպարտել սրբուհուն, Նիկեփորի կողմից վռնված լինելով, նախ ծայր աստիճան թշվառության մեջ տարեց, այն աստիճան, որ օրվա հաց չէր ճարում, և ապա վախճանվեց կշտացալությունից: Նիկեփորի եղբայր Ալեքսիոսը

ծայր սատիռան թշվառության մեջ ապրեց և չարաչար մահով վախճանվեց: Հատուցումը եկավ նաև Նիկեիոսին: Նա ժամանակը որսորդությամբ էր անցկացնում: Երբ հանկարծ մի նապաստակ դուրս թռավ, նա շատերի հետ շտապեց նրա ետևից, բայց ձիւն, որի վրա էր նա նստած, սայթաքեց և նրա հետ նա գետին տապալվեց: Այն ուղը տեղից դուրս եկավ, որով նրա աջ ձեռքը կատարելապես անշարժություն մատնվեց:

22. Ամեն տեղից բազում մարդիկ էին հոսում դեպի երանուհու արգո գերեզմանը և առատաբար սպաքինվում, դրա համար չգիտեմ ինչպե՞ս պատմեմ այդ հրաշքների մասին: Ինձ երբեք չի հաջողվի ամեն ինչի մասին համառոտակի պատմել, իսկ ոչինչ չպատմել նշանակում է վնասած լինել աստվածասեր ունկնդիրներին և իմ դեմ գրգռել Աստծո մեծ բարկությունը, քանզի հարկավոր է հրապարակել գործերն Աստծո: Դրա համար էլ շատից մի քանիսը պատմելով, կվերջացնենք: Ամմաքուր ոգուց աստիկ տառապող Մեֆրոնաս անունով մի մարդ, որ չէր կարողանում իր շարժումները կարգավորել, աչքերը շուտուտուտ էր տալիս, մարմինը կծոտում, շոր հագնել չէր ուզում, երկար ժամանակ լողացած չլինելու պատճառով գլուխը ծայր աստիճան կեղտոտ, մազերն էր քաշում, մի խոսքով նա բոլոր չարիքի աղբյուր էր, իր արյունակից ազգականների կողմից բռնի բերվում է երանուհու գերեզմանը և այստեղ ճակատին սուրբ ձեռք քսվելով—փառք քո արարքներին, թագավոր անմահ, ինչպես դու գիտես փառավորել ջերմեռանդությամբ քեզ սպասավորողներին—մարդն սպաքինվեց ու խելքացավ, չար ոգին այնտեղից վտարված լինելով, նա երբեք ոչինչ չկրեց: Սայլի վրա, սրբուհու գերեզմանը բերեցին և մի կնոջ, որ անդամալույծ էր՝ կատարյալ անշարժության մատնված, նրա մարմնի բոլոր անդամները սարսափելի ցավում էին: Սմեն մի ցավից բուժվելով, նա սեփական ոտքերով տուն վերադարձավ:

23. Ասվածի վրա պետք է ավելացնել և հետևյալը. Ռուդարիայի թագավոր Սիմեոնը, գազանաբարո մի մարդ, արշավելով հոռմայեցվոց երկրի վրա, համայն Թրակիան ավարառեց, նա ավերակ դարձրեց ընդհուպ մինչև Կոստանդնուպոլիս ընկած տարածությունը, քարուքանդ արեց քաղաքների մեծ մասը: Բիզյունի բնակիչները, չկարողանալով տոկլա մի ամբողջ հնգամյակ տևած պաշարմանը, հարմար առիթ ձեռք գցելով, քաղաքը լքեցին—գնացին, կրակի տալով բոլոր բնակարանները: Մի ռազմագերի, թշնամու ձեռքից պրծնելով, արագ վազքով երեկոյան մոտ հասավ Բիզյուն: Այն բնակիչներից ու բնակարաններից ամապացած գտնելով, ապաստանեց երանուհու տաճարը գիշերելու: Դեռ քուն չմտած, նա սրբուհու գերեզմանից դուրս եկող ողբացող ձայն լսեց. դա լաց ու կոծ էր: Նա ասում էր. «Հանուն ինչի՞» քաղաքում բնակվող քրիստոնյաները [քաղաքը] լքեցին—գնացին, երբ ես այստեղ եմ: Եթե այդպես որոշեցին անել, ապա ին-


չո՞ւ ինձ էլ իրենց հետ չտարան և թողեցին հեթանոսների մեջ»: Մարդը սարսափեց, գիշերն այնտեղ անցկացնելով, գնաց Մեղիա³³ և տեղի մարդկանց ամեն ինչ պատմեց: Այնտեղ էր գտնվում և քահանա Նիկետասը, մականունը Կաննակես, որ պաշարման ողջ ընթացքում գտնվում էր սրբուհու տաճարում և պաշտոն էր վարում: Գաղթականների հետ միասին նա էլ հեռացել ու եկել էր Մեղիա: Լսելով ռազմագերու պատմածը, նա վերափչեց երանուհու հրաշագործությունները և այլևս չէր կարողանում տեղում մնալ, նա [ուզեց] Բիզյուն գնալ և երկրպագել սրբուհուն, հակառակ որ թշնամիները [քաղաքում] էին գտնվում: Հիշյալ Սիմեոնը այդ ընթացքում Բիզյուն հասնելով³⁴ և այն բնակիչներից դատարկված գտնելով, բնակարաններն ավերակ, հրամայեց կրակի ճարակ չդարձած պարիսպները հիմնովին տապալել, գետինը հերկել ու ցանել: Այդպես էլ եղավ, քանզի ժամանակն հարմար էր:

24. Ժիշտ չէր լինի չհիշատակել Սիմեոնին պատահածը: Մտնելով Բիզյուն, նա կրակի ճարակ չդարձած միայն տաճարները գտավ: Նա շրջում էր աչքի անցկացնելով ամեն ինչ: [Տաճարներից] ոմանք նա պահեստ էր դարձնում, ոմանք՝ բնակարան, ոմանք էլ՝ այտու: Հասնելով սրբուհու տաճարը և տեսնելով շիրիմը, ներկաներին հարցրեց, թե ո՞ւմն է: Նրանք հայտնեցին, ասացին շիրիմում գտնվողի հրաշագործությունների մասին: [Սիմեոնը] հրամայեց բացել այն: Բացելու պահին իսկույն մի բոց ելավ և բոլորին սարսափի մեջ գցեց: Տեսնելով դա, նա իր մարդկանց հրամայեց տաճարին ամենևին ձեռք չտալ, թույլատրեց քահանաներին ամեն օր պաշտոն մատուցել: Նա այդ քաղաքը իր մերձավորներով բնակեցրեց և՛ նրա վրա կատալաքիչ նշանակելով ոմն Բուլիասի³⁵, դուրս եկավ Թրակիայի մնացած քաղաքները մույն ձևով բնակեցնելու մտադրությամբ: Հիշյալ քահանա Կաննակեսը ռազմագերու խոսքերի վրա եռանդով լցված, ինչպես ասվեց, շտապեց Բիզյուն գալ: Լինելով քերդին մոտիկ, նա ձերբակալվեց բուլղարների կողմից և հարցաքննության ենթարկվեց. ո՞վ է և ինչպե՞ս համարձակվեց այստեղ գալ: Բայց նա, ճշմարտության զավակ լինելով և սովորած ճշմարտությունն ասել, խոստովանեց իր ով լինելն ու գալու պատճառը: Երբ այդ մասին իմացավ Բուլիասը, հրամայեց իր մոտ հրավիրել մարդուն: Երբ նա եկավ, նրան ճանապարհ տվեց, հայր անվանեց, պետք եղած պատիվը ցուցաբերեց ու խնդրեց պատմել սրբուհու կյանքի և հրաշքների մասին: Նա ուրախությամբ՝ արտասովալից ու անկեղծ պատմեց ամեն ինչ, թե ինչպես նա Կոստանդնուպոլսից էր ծագում, դուստրն էր ազնվական ու փառավոր ծնողների, ինչպես ամուսնացավ քաջարի մի մարդու հետ, անունը Նիկեիոս, որն ստացավ քաղաքի գորավարությունն ու տուրմարությունը, ինչպես առաջին անգամ բերեց երկու տղա զավակ, որոնք դեռևս իր և ամուսնու կենդանության օրոք


մամնացան, ինչպես նա բաշարար տարավ իր [որդիների] մահը, ինչպես այնուհետև նա երկվորյակ որդիներ ունեցավ, որոնց մարմնին նշաններ կալին, ինչպես իրականացավ այն, ինչ մայրը նրանց առթիվ կանխագուշակեց: Մեծը, որ Վահան էր կոչվում, գինվորական ծառայության մեջ մտավ և վերջերս Սիլիվրիայում³⁶ բանական զորքի հրամանատար դարձավ, իսկ նրանից հետո ծնված Ստեփանոսը, վանականների ճանապարհով ընթանալով, հաստատվեց Օլիմպոս լեռան վրա³⁷, ապրելով լուկ իր և Աստծո համար: Բահանան ահա այդպես երանուհու մասին մնացած ամեն ինչն էլ ճշգրտությամբ պատմեց Բուլիասին, բոլորի մասին նրա սաճած անկեղծ սիրո, անչափ ողորմածության, կարեկցության, խաղաղասիրության, մեծահոգության, գթացողության, բարության, աղքատասիրության մասին, այն մասին, թե ինչպես նա ամբողջ գիշեր աղոթում էր, արտաափում ու համբերում, նրա աատրաստական հոգացողության մասին սուրբ տաճարների նկատմամբ, քրտնաթոր անվերջ ծնրադրությունները այդ [տաճարներում], սուրբ տաճարների բարեստեության վրա նրա ունեցած սիրո ու հոգատարության մասին: Ապա պատմեց նաև աստանայի դրդմամբ իր դեմ հորինած ամբաստանության մասին՝ ամուսնու իրենից երեսը շուտ տալու, ստացած վերքերի, մահվան և այդ բոլորից հետո անհաշիվ հրաշքների մասին, որոնց մի մասի

վերաբերյալ արդեն ասվեց, իսկ մյուսի մասին, ժամանակի տղության պատճառով խոսք չեղավ, ապա ամբաստանողների ստացած հատուցման մասին, այն մասին, թե ինչպես նրա ամուսին Նիկեփորը Բիզյուեի պաշարման ժամանակ վախճանվեց ու թաղվեց իր կողմից երանուհու համար կառուցված տաճարի ձախ կողմում: Բուլիասը, լսելով այդ մասին, ապշեց ու զարմացավ և ներկաների հետ փառավորեց Աստծուն: [Բուլիասն] ասաց [ռազմագերիին]՝ «Բայց, ո՞վ արգո հայր, դու ինչպե՞ս կարողացար այսպիսի բարիքը լքել, այն էլ այն ժամանակ, երբ պատերազմի բերմամբ մեզնից փորձանքի պետք է որ հանդիպեիր: Արդ, ամեն ինչ ներված է քեզ և եթե ցանկություն ունես, քեզ թույլատրվում է պաշտոն մատուցել: Ծանկացիր մեզ մոտ բնակվել, մենք քեզ կտանք ինչ հարկավոր է»: Նա պատասխանեց. «Առայժմ բնակվել չեմ կարող, քանզի ցանկանում եմ ապրել Մեդիայում գտնվող իմ հարազատների հետ, իսկ ինչ կարող եմ անել, շատ եմ խնդրում, ինձ թույլ տրվի անել. հրամայի՛ր, որպեսզի ինձ թույլատրվի [մեկ-մեկ] գալ այստեղ և պաշտոն մատուցել սրբուհու տաճարում՝ առանց որևէ մեկի արգելքի»: [Բուլիասը] մեծ գոհունակությամբ խոստացավ, դեռ ավելին, նա խնդրեց չուշանալ և հաճախակի անել դա:

(Ծարունակելի)



ԵԶՆԻԿ ՎԱՐԴԱՊԵՏ ՊԵՏՐՈՍՅԱՆ



Ավագանի անունով՝ Սամվել Ծնվել է 1955 թվականի հունվարի 19-ին Թբիլիսիում: 1958 թվականին ընտանիքով փո-

խաղրվել է Երևան և 1961—1967 թվականներին սովորել տեղի № 82 միջնակարգ դպրոցում:

1967 թվականին ընդունվել է հոգևոր ճեմարան: 1972 թվականի դեկտեմբերի 25-ին ձեռնադրվել է սարկավագ՝ ձեռամբ Մայր տաճարի լուսարարապետ տ. Հուսիկ եպս. Սանթրուրյանի:

1973 թվականին ավարտել է հոգևոր ճեմարանը փալլոն հաջողությամբ: Ավարտաճառի նյութն է եղել՝ «Մովսես փրկ. Երզնկացու «Հաաքունն համառօտ մեկնութեան սրբոյ պատարագին, զոր յսուաջագոյն արարեալ է սրբոց լուսաւոր ուրցըն» աշխատությունը (ուսումնասիրություն, բնագիր, հավելված): Սույն ավարտաճառի «Ուսումնասիրություն» բաժինը հրատարակվել է «Էջմիածին» ամսագրի 1973 թվականի Թ և ԺԱ համարներում:

1973 թվականի հուլիսի 22-ին Մայր տաճարում ձեռնադրվել է կուսակրոն քահանա՝ ձեռամբ ԱՄՆ-ից ուխտավորաբար Մայր Աթոռ ժամանած տ. Սիոն արքեպ. Մանուկյանի:

1973 թվականի սեպտեմբերի 1-ից մինչև 1975 թվականի դեկտեմբերի 31-ը աշխատել է «Էջմիածին» ամսագրի խմբագրությունում՝ քարտուղարի պաշտոնով, և միաժամանակ հոգևոր ճեմարանում դասավան-


դել «Քրիստոնեական» և «Վարք սրբոց» առարկաները: Այդ տարիներին եղել է Ամենայն Հայոց Վեհափառ Հայրապետի գավազանակիրը և այդ հանգամանքով 1975 թվականի հունիսի 5—19-ը ուղեկցել Նորին Սրբություն Ս. Տ. Վազգեն Ա Ամենայն Հայոց Հայրապետին հովվապետական ուղևորություններին Անգլիա և Ֆրանսիա:

1976 թվականի հունվարի 10-ին, Վեհափառ Հայրապետի բարեհաճ կարգադրությամբ, Մայր տաճարի լուսարարապետ տ. Հուսիկ եպս. Սանթրույանի կողմից ստացել է մասնավոր վարդապետական գավազան կրելու իշխանություն: Վարդապետական

ավարտանաոն է եղել՝ «Մովսես վրդ. Երզրնկացու դավանաբանական գործերը» (ուսումնասիրություն և քննադրեր): Սույն աշխատությունը նույնպես տպագրվել է «Էջմիածին» ամսագրում. 1974 թ. Թ, Ժ, ԺԲ, 1975 թ. Ա և Գ համարներում:

Տ. Եզնիկ վրդ. Պետրոսյանը Մայր Աթոռի երիտասարդ և խոստումնալից միաբաններից է, որը, Վեհափառ Հայրապետի կարգադրությամբ, հունվարի 19-ին մեկնեց Աթենք՝ հետևելու տեղի համալսարանական դասընթացներին և հմտանալու հունարեն լեզվի, հայրաբանական և աստվածաբանական գիտությունների մեջ:





ԹԵՄԱԿԱՆ ՊԱՏԳԱՄԱՎՈՐԱԿԱՆ ԸՆՏՐՈՒԹՅՈՒՆՆԵՐ ԵԳԻՊՏԱՀԱՅ ՏԻՐԱԽՆԱՄ ԹԵՄՈՒՄ

Հայոց Հայրապետին ուղղած իր նույն-
բեր 24 թվակիր պաշտոնական գրության
մեջ եգիպտահայոց առաջնորդական տե-
ղապահ տ. Ներսէս Ծ. վրդ. Բապունյանը
հաղորդում է վերջերս Կահիրեում և Ալեք-
սանդրիայում կատարված թեմական ամ-
բողջական ընտրությունների մասին, ըստ
համայնքի ներքին կանոնագրքի, և Նորին
Սուրբ Օծությանն է ներկայացնում «զույգ
թեմական ժողովներու և անոնցմէ բխող
բոլոր մարմիններուն հավատարմական և
որդիական զգացումները»:

Հոկտեմբերի 26-ին կատարվել են Կահի-
րեի թեմական ընտրությունները՝ «համե-
րաշխ և եղբայրական մթնոլորտի մը մէջ»:

Ընտրությանը մասնակցող բոլոր կազմա-
կերպություններն ու շրջանակները նախա-
պես մամուլին են հանձնել մի համաձայ-
նագիր՝ ազնիվ ու բարի նպատակ ունենա-
լով ընտրություններին ներկայանալ «հա-
մագործակցական ցանկով մը, կարենալ
իրագործելու թեմիս եկեղեցական, կրթա-

կան, կալվածական և վարչական գործե-
րը»:

Կողմերի սույն համաձայնագիրը ջերմո-
րեն և լեանդալառությամբ է ընդունվել
«իբրև արտահայտությունը՝ ողջմիտ և գի-
տակից ընտրողներուն զգացումներուն ու
կամքին»:

Հոկտեմբերի 26-ին ընտրվել են Կահի-
րեի թեմական ժողովի 24 անդամներ:

Հոկտեմբերի 31-ին նորընտիր թեմական
ժողովը գումարել է իր առաջին նիստը և
ընտրել իր Դիվանը.

Պոլ Բիլիտջյան՝ ատենապետ.

Դոկտ. Սուրեն Բաբայան՝ ատենադպիր:

Ապա տեղի է ունեցել Գործադիր մարմնի
կամ Բաղաքական ժողովի յոթ հոգուց
բաղկացած կազմի ընտրությունը.

Վահան Չեչենյան՝ Ա ատենապետ.

Սարգիս Սարգիսյան՝ Բ ատենապետ.

Նորայր Տեովեթյան՝ ատենադպիր:

Նոյեմբերի 9-ին տեղի են ունեցել նաև
Ալեքսանդրիայի հայոց թեմական ժողովի
ամբողջական ընտրությունները, դարձյալ

համերաշխ ու եղբայրական մթնոլորտում:
Այստեղ ևս ընտրվել են թեմական ժողովի 24 անդամներ:

Թեմական ժողովը նոյեմբերի 21-ին գումարել է իր առաջին նիստը և կազմել իր Դիվանը:

Մարտիկ Զարպհանեյան՝ ատենապետ:

Նորայր Պենոհանյան՝ ատենադպիր:

Ապա ընտրվել է յոթ հոգուց բաղկացած Բաղաբական ժողովի նոր կազմ:

Վահան Ալեքսանյան՝ Ա. ատենապետ:

Ստեփան Ստեփանյան՝ Բ. ատենապետ:


Նուբար Դավթյան՝ ատենադպիր:


Թեմական ժողովների ընտրությամբ եզիպտահայոց թեմի կյանքը մտել է իր բնականոն ընթացքի մեջ:

Հայոց Հայրապետը գոհունակությամբ է տեղեկանում եզիպտահայ թեմում կատարված պատգամավորական ընտրությունների արդյունքների մասին և շնորհավորում այդ ընտրությունները՝ այն ջերմագին բարեմաղթությամբ, որ եզիպտահայ թեմի եկեղեցական, կրթական, մշակութա-

յին, ազգային գործերը շարունակվեն այսուհետև համերաշխ ու եղբայրական մթնոլորտում՝ ի սփոփանս հայրական Իր սրտի և ի մխիթարություն թեմի հայության, ի պայծառություն մեր եկեղեցիների ու կրթական հաստատությունների, եզիպտացի ազնիվ ու հյուրընկալ ժողովրդի ծոցում, ուր հայ ժողովուրդը ապրում է խաղաղ ու բարօր՝ որպես շինարար ու կարգապահ քաղաքացի մեծ Եզիպտոսի:

«Էջմիածին» ամսագրի խմբագրությունը, հանուն Հայոց Հայրապետի, շնորհավորում է եզիպտահայության թեմական ընտրություններում հանդես եկած համերաշխության ոգին՝ բարեմաղթելով, որ համագործակցության շինարար ու ազգօգուտ այդ նոր ոգին դառնա ամուր հիմքը թեմի եկեղեցական, կրթական, ազգային բեղուն գործունեության բոլոր բնագավառներում և ապացույցը՝ եզիպտահայ թեմի կենսունակության ու բարօրության՝ ի փառս մեր սուրբ եկեղեցու և ի մխիթարություն մեր ժողովրդի:





ԷԿՈՒՄԵՆԻԿ

ԿՅԱՆՔ

ԵԿԵՂԵՑԻՆԵՐԻ ՀԱՄԱԾԽԱՐՀԱՅԻՆ ԽՈՐՀՐԴԻ ՀԻՆԳԵՐՈՐԴ ՀԱՄԱԺՈՂՈՎԸ

1975 թ. նոյեմբերի 28-ից մինչև դեկտեմբերի 10-ը Քենիայի մայրաքաղաք Նայրոբիում տեղի ունեցավ Եկեղեցիների համաշխարհային խորհրդի հինգերորդ համաժողովը, որը գումարվում է յոթ տարին մեկ անգամ: Համաժողովի աշխատանքներին մասնակցում էին ԵՀԽ-ի անդամ 270 եկեղեցիների հոգևորական և աշխարհական պատգամավորներ՝ ժամանած աշխարհի հինգ ցամաքամասերի բազմաթիվ երկրներից, ԵՀԽ-ի վարչական անձնակազմը և նրա աշխատակիցները՝ Ժնևից: Համաժողովին հրավիրվել էին նաև ԵՀԽ-ի ոչ անդամ եկեղեցիներից բազմաթիվ դիտորդներ, խորհրդականներ, միջազգային զանազան կազմակերպությունների, քրիստոնեական խորհուրդների, այլ կրոնների ներկայացուցիչներ, հյուրեր, ինչպես նաև ուղիղի և հեռուստատեսության աշխատակիցներ, միջազգային մամուլի թղթակիցներ՝ լուր ընդամենը շուրջ 2500 հոգի:

Ամենալավ Հայոց կաթողիկոսի որոշումով, իբրև Հայաստանյայց եկեղեցու ներկայա-

ցուցիչներ, համաժողովի աշխատանքներին իրենց մասնակցությունը բերեցին Հյուսիսային Ամերիկայի հայոց առաջնորդ տ. Թորգոմ արքեպիսկոպոս Մանուկյանը, Երուսաղեմի հայոց պատրիարքության դիվանապետ տ. Ծահե արքեպիսկոպոս Աճեմյանը, Անգլիայի հայոց Հայրապետական պատվիրակ և հոգևոր տեսուչ տ. Ներսես եպիսկոպոս Պողապալյանը, Մայր Աթոռի դիվանապետ և Միջեկեղեցական հարաբերությունների բաժնի վարիչ տ. Արսեն եպիսկոպոս Բերբերյանն ու նույն բաժնի ընդհանուր քարտուղար Պարգև Ծահբազյանը:

Տանն Կիլիկիո Աթոռի կողմից համաժողովին մասնակցում էին տ. Գարեգին արքեպիսկոպոս Սարգսյանը, տ. Արամ վարդապետ Քեշիշյանը և օրիորդ Թեմի Սիմոնյանը:

ԵՀԽ-ն սույն համաժողովի համար նշանաբան էր ընտրել «Հիսուս Քրիստոսն ազատագրում է և միացնում»:

Համաժողովի աշխատանքներն սկսվեցին

նունքերի 24-ի աստվածության՝ ԵՀԽ-ի նախկին գլխավոր քարտուղար դոկտ. Վիտեր Նուֆթի նախագահությամբ: Տեղական մի շարք եկեղեցիների ներկայացուցիչների կողմից բարիգալստյան և ողջույնի ուղերձների ընթերցումից հետո ժողովում հաշվետու ընդարձակ գեկուցումով հանդես եկավ ԵՀԽ-ի կենտրոնական կոմիտեի նախագահ դոկտ. Մ. Թոմասը:

Համաժողովն ուշադրությամբ լսեց նաև ԵՀԽ-ի գլխավոր քարտուղար դոկտ. Ֆիլիպ Փոթթրի բովանդակալից գեկուցումը:

Հետագա օրերի ընթացքում առանձին գեկուցումներով լիագումար նիստերում հաջորդաբար հանդես եկան մի շարք պատգամավորներ, որոնց գեկուցումները նվիրված էին հետևյալ թեմաներին. «ՌՎ Է այդ Հիսուս Քրիստոսը, որն ազատագրում է և միացնում», «Որպեսզի բոլորը լինեն մեկ», «... Որպեսզի աշխարհը հավատա», «Գերիշխանության և ճնշման շղթաներից դուրս», «Ստեղծագործություն, տեխնոլոգիա և մարդու վերապրումը», «Կանաչ բեղաշրջման ընթացքի մեջ գտնվող աշխարհում»: Վերոհիշյալ բոլոր գեկուցումներն էլ, որոնց շուրջ գրավոր առանձին մեկնաբանություններով և լրացուցիչ հարակից գեկուցումներով հանդես եկան տասնյակ հոետորներ, բազմակողմանիորեն բննարկվեցին համաժողովի կողմից:

Դոկտ. Մ. Թոմասի հաշվետու գեկուցման մեջ կենտրոնական տեղ էր հատկացված ավետարանչությանը: Այդ կապակցությամբ գեկուցողն առաջ քաշեց մի շարք այժմեական հարցեր, ինչպիսիք են, օրինակ, Քրիստոսի գործի կարևորությունը եկեղեցուց դուրս, այն կապը, որ գոյություն ունի դիալոգի և ավետարանչության միջև մի կողմից ու ավետարանչության և ընկերային պարտավորության միջև՝ մյուս կողմից՝ դրանք հանձնելով համաժողովի ուշադրությանը: «ԵՀԽ-ի քրիստոսակենտրոն հանգամանքը, — շեշտեց նա, — ստիպում է նրան աշխարհը դնել իր աստվածաբանական տեսիլքի կենտրոնում: Աստվածաբանությունը կենդանի կմնա միայն այն դեպքում, եթե այն դրվի եկեղեցու և աշխարհի հանդիպման կետում»:

Այնուհետև դոկտ. Թոմասը, իր գեկուցման մեջ ընդհանուր գծերով ներկայացնելով Էկումենիկ շարժման զարգացման ու առաջընթացի պատկերը, նշեց. «Նյու Դելհիի և Ուփսալայի համաժողովներից հետո Էկումենիզմը ստացավ երկու կարևոր մեծ մղումներ, որոնք, աստվածաբանորեն արտահայտվելով, զգալիորեն տարբերեցին նրան նախորդ ժամանակաշրջանից: Առա-

ջինն այն աստվածաբանական բախումն էր, որն առաջ եկավ քրիստոնեական երեք մեծ շարժումների՝ «Հավատո և կարգի», «Գործնական քրիստոնեության» և «Առաքելությունների միջազգային խորհրդի» միաձուլումից: Միմյանցից անկախ այս երեք մեծ շարժումները միացան իրար՝ կազմելու համար մի հզոր հոսանք, որ, աստվածաբանական և հոգևոր մակարդակի վրա, իսկույն առաջնորդեց Էկումենիկ երեք մեծ մտահոգությունների համատեղ կենսագործմանը. դրանք են՝ միություն, առաքելություն և ծառայություն:

Այդ մղումներից երկրորդը օրավուր աճող գիտակցումն էր ժամանակակից աշխարհի իրականությունների և նրա աստվածաբանական անդրադարձումը Էկումենիզմի վրա: Եվ այդ զգացվեց երեք ձևով. Արևելյան Եվրոպայի, Աֆրիկայի, Ասիայի, Լատինական Ամերիկայի բազմաթիվ եկեղեցիներ իրենց հետ բերեցին ու ԵՀԽ-ին հաղորդեցին իրենց ժողովուրդների, ազգերի և ցեղերի հույսերը, տենչանքներն ու պայքարները: Էկումենիզմի պատմության մեջ, առաջին անգամ լինելով, այդ եկեղեցիները դադարեցին այլևս արևմտյան եկեղեցիների բնությանը հանձնված ինչ-որ արտաքին առարկաներ լինելուց՝ դառնալու համար ապրող, կենդանի իրականություններ, որոնք բաղկացուցիչ մասն են կազմում ԵՀԽ-ի քրիստոնեական համայնքի: ԵՀԽ-ն սկսեց լսել նաև աղքատներին, լուսանցքի վրա գտնվողներին, բոլոր ճնշվածներին և իրավագրվածներին քրիստոնեական մի նոր ընկալումով: Բացի այդ, վերջին տարիներին, աշխարհի տարբեր երկրների զանազան աշխարհական մասնագետներ սոցիալական մի շարք այժմեական հարցեր բննարկելու նպատակով ԵՀԽ-ի հետ ունեցան հանդիպումներ, որոնցից ամենակարևորը «Եկեղեցի և հասարակություն» համաշխարհային կոնֆերանսի ժամանակ տեղի ունեցած հանդիպումն էր 1966 թվականին: Բոլորովին վերջերս քաղաքական և սոցիալական գիտությունների հայտնի մասնագետներ հավաքվեցին եկեղեցու մի շարք աստվածաբանների հետ՝ միասնաբար ուսումնասիրելու, թե ի՞նչ է իրենց քրիստոնեական կոչումը և թե ի՞նչ պիտի լինի եկեղեցու առաքելությունը այսօրվա աշխարհում՝ մարդկության առաջընթացի, սոցիալական և ցեղային արդարության համար մղվող պայքարի ոլորտում»:

Իր գեկուցման ավարտին դոկտ. Թոմասը, անդրադառնալով ժամանակակից մարդկության առջև ծառացած բազմաթիվ խըն-

դիրների լուծման ճանապարհին ԵՀԽ-ին վերապահված առաքելությանը, եզրակացրեց. «Հի կարող լինել վավերական աստվածաբանություն՝ ժամանակակից աշխարհի և նրա առաջադրած խնդիրների առջև պատասխանատու մի կեցվածք հանդես բերելուց դուրս: Եվ դա՝ հանուն մարդկային արժանապատվության...: Աշխարհի հարցերը ԵՀԽ-ի այսօրվա գործունեության մեջ պետք է հանդիսանան նրա առավել լուրջ մտահոգությունը... Հին Կտակարանում Աստուծո արդարությունը հայտնվեց ճշդողների նկատմամբ վճռական մի դիրքորոշման մեջ՝ ի նպաստ անպաշտպանների, աղքատների և անարդարության զոհերի ազատագրության: Քրիստոսն ինքը ևս Աստուծո արդարությունը հայտնեց՝ աղքատների և անպաշտպանների կողմը բռնելով: Եկեղեցին կարող է լինել իսկապես Քրիստոսի եկեղեցի, եթե նա չեղբայրանա աղքատների և իրավագրկվածների հետ: Եկեղեցին իրավունք ունի՝ նույնիսկ օգնելու աղքատներին, եթե նա ճշդողի դաշնակիցն է...»:

ԵՀԽ-ի գլխավոր քարտուղար դոկտ. Ֆիլիպ Փոթըրն իր զեկուցման մեջ համակողմանի լայն վերլուծության ենթարկեց աշխարհի ներկա կացությունը և այն դժվարությունները, որոնց բախվում է այսօրվա մարդկությունը՝ անելով նաև մի շարք խորհրդածություններ ԵՀԽ-ի բնույթի և նրա գործունեության շուրջ: Նա նշեց, որ ԵՀԽ-ն առանձնապես զգայուն վերաբերմունք է հանդես բերել այն խոռվահույզ իրադարձությունների նկատմամբ, որոնք տեղի են ունեցել անցած յոթ տարիների ընթացքում աշխարհի տարբեր մասերում, մասնավորապես Վիետնամում և Մերձավոր Արևելքում, և որոնց հետևանքներն առավել կամ նվազ չափով զգալի են դարձել աշխարհի գրեթե բոլոր ժողովուրդների վրա:

Անդրադառնալով աշխարհի այսօրվա կացությանը՝ գլխավոր քարտուղարը համագումարի ուշադրությանը հանձնեց այն պարագան, որ ներկայումս մարդկության գլխին կախված ամենալուրջ սպառնալիքը հետզհետե լայնացող այն անդունդն է, որը գոյություն ունի հարուստների և աղքատների միջև ինչպես ազգերի ներսում, այնպես էլ նրանց միջև և որը ուղղակի հետեվանքն է հարուստների և հզորների շահի վրա հիմնված համաշխարհային մի անարդար տնտեսակարգի: «Եթե պատերազմական ամենասահարկու գեներալ գերաճը, քաղցը, թերասնումն ու սովը, շրջապատող միջավայրի կեղտոտումը, աշխարհի բարիքների անհավասար բաշխումը, հա-

րուստների և աղքատների, զարգացած և թույլ զարգացած երկրների միջև ստեղծված անդունդը լուրջ սպառնալիքներ են և ծանրանում են մարդկության ճակատագրի վրա, — նշեց դոկտ. Փոթըրը, — մյուս կողմից՝ միախառնված է հաստատել այն շարժումը, որ տեղի է ունենում հակառակ ուղղությամբ: Այսօր ամենուրեք պետությունների և ժողովուրդների մեջ դրսևորվում է հետադիմադարձ աճող առողջ մի գիտակցություն, որի արդյունքն են պետությունների միջև կնքված ռազմական, տնտեսական և առևտրական բնույթի բազմաթիվ համաձայնագրերը: Վերջերս, երկարատև բազում ջանքերից հետո, կնքվեց Եվրոպայի անվտանգության և համագործակցության վերաբերյալ համաձայնագիրը: Ժողովուրդներն այսօր ձգտում են իրենք որոշել իրենց ազգային ճակատագիրը: Նրանք հաստատում են իրենց իրավունքը՝ տնօրինելու իրենց բնական հարստությունները: Եթե մեր ժամանակի հարցերն ունեն համաշխարհային բնույթ և, հետևաբար, պահանջում են համաշխարհային չափանիշով գործունեություն, անհրաժեշտ է և հրամայական՝ շարժման մեջ դնել ամբողջ աշխարհի քրիստոնյաների ուժերը, որպեսզի նրանք աշխատեն ու գործեն այդ հարցերի լուծման համար: Եվ հենց այդ է, որ ջանաց անել Եկեղեցիների համաշխարհային խորհուրդը անցած յոթ տարիների ընթացքում... Ի քրիստոս մեր ունեցած հավատը մեզ դարձնում է նոր տղամարդիկ և նոր կանայք, որոնք կոչված են միանալու Աստուծո գործին՝ ստեղծելու համար մարդկային մի նոր կարգ, որտեղ պիտի հաղթանակեն ճշմարտությունն ու արդարությունը: Այս իմաստով ըմբռնված հավատը թմրադեղ չէ, այլ մեր մեջ գործող առաջնիչ մի մեծ ուժ, որ, Աստուծո ծրագրի համաձայն, ձգտում է կերպարանափոխել նրա ստեղծած աշխարհը սիրո, ուրախության և խաղաղության թագավորության... Սրանում է մեր կոչումը որպես եկեղեցիներ և քրիստոնյաներ: Սրանում է մեր հանդիպման խոր իմաստը սույն համաժողովում որպես հավատի, հույսի և սիրո եղբայրական համայնք»:

Ծոշափելով եկեղեցիների միության հարցը, գլխավոր քարտուղարն իր զեկուցման վերջում նշեց, որ վերջին համաժողովից ի վեր մեծ ջանքեր են գործադրվել ԵՀԽ-ի կողմից՝ հասնելու համար միության վերաբերյալ փոխադարձ լավագույն մի հասկացողության, և որ անհրաժեշտություն է գազցվում վերասահմանելու եկեղեցու միությունը այն բարդ իրադրության շրջանակի մեջ, ուր ապրում են եկեղեցիներն այսօր



ՆԱԶՈՐԵԻ ԵԷԽԻ Ե ՀԱՄԱԲՈՐՈՒՄԻՑ ՎԵՐԱԴԱՐՈՒՄԻ ԺԱՆԱՊԱՐԷԻՆ. ՌՈՍ ԵՎ ՀԱՅ ՊԱՏՎԻՐԱԿՈՒԹՅԱՆ ԱՆՊԱՐԽԵՐԸ
ԿԱԶԻՐՈՒ ՀԱՅՈՑ ԱՌԶԵՆՈՒԹՅԱՆԻ ԱՌՁԵՎ

թե՛ միմյանց միջև և թե՛ իրենց ու մարդկային հասարակության միջև գոյություն ունեցող հարաբերությունների պայմաններում: «Եկեղեցիների համաշխարհային խորհուրդը ստեղծվել է,—շեշտեց նա,—օգնելու համար եկեղեցիներին՝ առաջ գնալու քրիստոնեական տիեզերական մի հասարակության իրականացման ուղղությամբ, հասարակություն, որին մաս կազմեն բոլոր եկեղեցիներն անխտիր ամեն տեղ: Այս համաժողովում մեր պարտականությունն է բացահայտել, թե ինչպե՛ս և ի՞նչ միջոցներով ԵՀԽ-ն կարող է դառնալ Աստուծո առանձնաշնորհյալ գործիքը՝ հասնելու համար այդ նպատակին գալիք տարիների ընթացքում: Համաժողովն իր առաջադրանքի մեջ ձախողված կլինի, եթե մենք չկարողանանք առաջ շարժվել նոր տիպի հավաքական մի հարաբերություն ստեղծելու համար անդամ եկեղեցիների և ԵՀԽ-ի միջև՝ իրենց կյանքի ու գործունեության բոլոր մակարդակներում... Դա, անտարակույս, չափազանց դժվար գործ է, թանկ արժող մի էկոմենիզմ, որովհետև հարցականի տակ է դնում մեր բոլոր գաղափարներն ու ավանդական դիրքերը: Բայց դա միակ ճանապարհն է, որը թույլ կտա մեզ ազատագրվելու ի Բրիտանո՝ ի խնդիր ճշմարտապես եղբայրական, ճշմարտապես քրիստոնեական մի հասարակության իրականացման»:

Շուրջ երեք շաբաթ տևած համաժողովի աշխատանքներն ընթացան բավականին բարդ կառուցվածք ունեցող ժողովական համակարգով: Համաժողովին մասնակցող անդամ եկեղեցիների բոլոր ներկայացուցիչները, ըստ իրենց նախընտրության, բաժանվեցին վեց մասնախմբերի, որոնք, նախօրոք պատրաստված ծրագրի համաձայն, մանրամասնորեն ուսումնասիրեցին համաժողովին առաջարկված վեց մեծ հարցեր.

- ա. Խոստովանել Բրիտանոսին այսօր:
- բ. Ի՞նչ է պահանջում միությունը:
- գ. Որոնում եղբայրական հասարակության (տարբեր հավատալիքների, մշակույթների և գաղափարախոսությունների տեր մարդկանց համատեղ որոնումը):
- դ. Դաստիարակություն ի խնդիր ազատագրության և հասարակության:
- ե. Անարդար կառուցվածքներ և պայքար ազատագրության համար:
- զ. Մարդու զարգացումը (իշխանության, տեխնոլոգիայի և կյանքի որակի երկյամի բնույթը):

Այս վեց մասնախմբերից յուրաքանչյուրն իր ներքին ստորաբաժանվեց երեք կամ

չորս առանձին ենթախմբերի, որոնցում քննության առնվեցին վերոհիշյալ վեց զբաղալոր թեմաներից թիող կրոնական, ընկերային, քաղաքական մի շարք այժմեական հարցեր, ինչպես, օրինակ, ծեսի նշանակությունը, ավետարանչություն, տեսանելի միության որոնում, կանանց ազատագրություն և իրավահավասարություն, գինաթափում, պայքար ցեղային խտրականության դեմ, մարդկային իրավունքներ, ճնշված ժողովուրդների ազատագրություն և այլն:

Այս մասնախմբերի աշխատանքներից զուգընթաց եկեղեցիների ներկայացուցիչները բաժանվեցին 15—20 հոգուց բաղկացած ութսուն «աշխատանքային խմբերի», որոնք ութ նիստերի ընթացքում քննարկեցին համաժողովի գլխավոր թեման իր բոլոր կողմերով, միաժամանակ ուսումնասիրության առարկա դարձրին աստվածաճնչական որոշ ընթերցվածներ՝ հարուցված հարցերի լույսի տակ: Այս խմբերից շատերը հետագայում իրենց եզրակացությունները ներկայացրին հատուկ մի հանձնաժողովի, որի պարտականությունն էր՝ համաժողովի անունից պատրաստել մի փաստաթուղթ և այն ներկայացնել ընդհանուր ժողովին՝ ի հաստատումն, որպեսզի այնուհետև հրապարակվի մամուլում:

Բացի վերոհիշյալ մասնախմբերից և աշխատանքային խմբերից, ժողովը բաժանվեց նաև չորս մեծ միավորների, որոնք իրենց ներքին ստորաբաժանվեցին սամանափակ թվով մասնակիցներ ընդգրկող խմբակների, որոնց կողմից և լայն քննարկման ենթարկվեցին Ուփսալայի համաժողովից մինչև Նայրոբիի համաժողովն ընկած ժամանակաշրջանում ԵՀԽ-ի կատարած աշխատանքները:

Այս չորս միավորները, որոնք մի տեսակ հրապարակային վիճաբանությունների բընույթ ունեցող հավաքույթներ էին, ուսումնասիրության առարկա դարձրին հետևյալ նյութերը.

ա. ԵՀԽ-ի ընդհանուր քարտուղարության և ուղղակիորեն նրանից կախված մյուս բաժինների քարտուղարությունների գործունեությունը՝ իր բոլոր երեսներով:

բ. Հավատո և կարգի միավորի գործունեությունը, որի ձգտումն է ժամանակակից մարդկության մեջ զարգացնել հավատը, տարածել քրիստոնեությունը, ուղիներ որոնել եկեղեցիների միությունն իրականացնելու և այդ ճանապարհով նաև նպատեղու համար ամ-

բողջ մարդկային հասարակության միությունը:

գ. Արդարություն և ծառայություն միավորի գործունեությունը, որի նպատակն է նպաստել արդարության և կայուն խաղաղության հաստատմանն այսօրվա աշխարհում: Այս խմբում քննարկվեցին գլխավորապես ժամանակակից միջազգային քաղաքական դրությունը, մարդկային իրավունքների հարցը և քաղաքական ու ռազմական կոնֆլիկտների մեջ ներգրավված շրջանների կացությունը:

դ. Դատախարակություն և հավատի վերանորոգում միավորի գործունեությունը: Այստեղ քննության առնվեցին ընդհանրապես դատախարակության և մասնավորապես քրիստոնեական դատախարակության հետ կապված զանազան հարցեր:

Վիճարանական այս չորս միավորների առաջադրանքն էր հանձնարարություններ և առաջարկություններ ներկայացնել ԵՀԽ-ի ապագա գործունեության ծրագրի մշակման կապակցությամբ:

Վերոհիշյալ բոլոր խմբերում կատարված աշխատանքների արդյունքները, որպես գեկուցագիր, հանձնարարություն, առաջարկություն կամ հայտարարություն, հետագայում բերվեցին ընդհանուր ժողովին, լայն քննարկման ենթարկվեցին լիազումար նիստերում և մասնակի փոփոխություններով ու քվեարկությամբ հաստատվեցին համաժողովի կողմից որպես կարևոր փաստաթղթեր:

Հայաստանյայց եկեղեցու ներկայացուցիչները տեղաբաշխվել էին տարբեր աշխատանքային խմբերում: Նրանցից յուրաքանչյուրն իր գործուն մասնակցությունը բերեց որոշ մի մարզի աշխատանքներին՝ լինի ընդհանուր նյութերի ուսումնասիրման, լինի գործնական աշխատանքը կազմակերպող զանազան մարմինների աշխատանքների կապակցությամբ: Համաժողովի ամբողջ տևողության ընթացքում հայ եկեղեցու պատգամավորները շեշտեցին Հայաստանյայց և արևելյան մյուս եկեղեցիների ավանդություններից բխող գաղափարներ ու տեսակետներ, որոնք կարևոր մի նպատակ հանդիսացան մյուս եկեղեցիներից եկած և մյուս եկեղեցիներից տարբերվող տեսակետների առաջացման մեջ:

Համաժողովում քննարկված հարցերի մեջ կենտրոնական տեղ գրավեց եկեղեցիների միության հարցը: Այդ կապակցությամբ ցայտուն կերպով դրսևորվեցին երկու հակադիր տեսակետներ: Համաժողովի

մասնակիցներից ոմանք մեղադրում էին ԵՀԽ-ին այն բանում, որ նա իր մտահոգությունների առանցքն է դարձրել պատկառելիության-քաղաքական հարցերը՝ անհրաժեշտ չափով ուշադրություն չդարձնելով եկեղեցիների միության հարցին, մինչդեռ ԵՀԽ-ի գործունեությունը պետք է կենտրոնացված լինի ամենից առաջ այդ հարցի վրա՝ հետևանքաբար ունենալով մարդու փրկության վերջնական նպատակը, որ է՝ հավիտենական կյանքն ի Տեր: Սրան հակառակ, ուրիշներ այն համոզումն էին արտահայտում, որ եկեղեցիների առաջնահերթ պարտականությունը պետք է լինի պայքարել ընկերային արդարության, ճշմարտության ազատագրության համար, և որ միությունը կարող է իրականացնել միայն այդ առաքելության ճանապարհին եկեղեցիների ստանձնած հասարակաց պարտավորության շուրջ: Եվ դա կլինի շատ ավելի կենդանի մի միություն, քան աստվածաբանական բանավեճերից, ավանդական տեսակետների քաղաքականություններից և դիալոգներից առաջացած միությունը:

Համաժողովում ԵՀԽ-ի ապագա գործունեության համար մշակված ծրագրի մեջ այս հարցի կապակցությամբ շեշտը դրվեց ընկերային, քաղաքական և մարդկային պայքարի մեջ քրիստոնեական եկեղեցիների ունենալիք մասնակցության վրա՝ եկեղեցին մեր օրերի աշխարհում մարմնացնելու մտահոգությամբ:

Համաժողովը առանձին կարևորությամբ քննարկեց կանանց ազատագրության, իրավահավասարության, եկեղեցիների ընդհանուր աշխատանքների ու մանավանդ մարդասիրական գործերի մեջ նրանց ունենալիք ավելի լայն մասնակցության հարցը: Այդ առնչությամբ համաժողովի կողմից ընդունված փաստաթղթում նշվում է, որ անդամ եկեղեցիները պետք է նյութական հատուկ միջոցներ նախատեսեն, որպեսզի կանայք ևս հնարավորություն ունենան աստվածաբանական մասնագիտություն ձեռք բերելու և մասնավորապես ստանալու բարձրագույն կրթություն: Բացի այդ, եկեղեցիները պետք է աշխատեն ապահովել կանանց գործունեությանը որոշումներ ընդունող եկեղեցական մարմինների մեջ: Անդամ եկեղեցիներն իրենց բոլոր միջոցներով պետք է ճնշում գործադրեն կառավարությունների և ազգային ու հասարակական այն կազմակերպությունների վրա, որոնք կանանց նկատմամբ վարում են ճնշման քաղաքականություն, և պաշտպան կանգնեն այն բոլոր կազմակերպություններին, որոնք աշխատում են վե-

րացնել կանանց հանդեպ գործադրվող խտրականությունը քաղաքական, տնտեսական, սոցիալական և եկեղեցական ասպարեզներում:

Համաժողովի աշխատանքների մեջ պատշաճ ուշադրություն նվիրվեց մարդկային իրավունքների պաշտպանության հարցին: Համաժողովը ԵՀԽ-ին պարտավորեցրեց՝

ա. Իր հնարավորությունների սահմաններում հավաքել և տարածել ստույգ ինֆորմացիաներ, որոնք վերաբերում են մարդկային իրավունքների ոտնահարման դեպքերին:

բ. Օգնել եկեղեցու ղեկավարներին և քրիստոնյաներին՝ ամենայն բարեխղճությամբ կատարելու իրենց դժվարին պարտականությունը իշխանության չարաշահման և այլ կարգի անմարդկային արարքների դեմ, եթե այդպիսիք նկատվեն իրենց եկեղեցիներում, իրենց համայնքներում կամ երկրներում:

գ. Անհրաժեշտության դեպքում, տեղեկություններ ձեռք բերելու և օգնելու նպատակով, հատուկ խմբեր ուղարկել այնտեղ, որտեղ քրիստոնյաներ և այլ անձինք կարիք ունեն օգնության ու քաջակերանքի՝ հանուն մարդկային իրավունքների պաշտպանության իրենց մղած պայքարում:

դ. Հրապարակել հայտարարություններ ազգերի, խմբավորումների կամ անհատ մարդկանց հիմնական իրավունքների խախտման դեպքերի վերաբերյալ՝ ըստ էության լուսաբանելով խնդրո առարկա հարցերը՝ դրանով իսկ նպաստելու համար այդ խախտումների պատճառների վերացմանը:

ե. Նյութական և այլ միջոցներով օգնել բոլոր այն մարդկանց և խմբերին, որոնք, իրենց քրիստոնեական հավատից մղված, իրենց երկրներում պայքարում են մարդու իրավունքների պաշտպանության և արդարության համար ու այդ պատճառով ենթարկվում մշտական ճնշման, չարչարանքների, բանտարկության և հալածանքի:

Յեղալին խտրականության հարցի կապակցությամբ համաժողովն ընդունեց հատուկ բանաձև: Այդ բանաձևում նշվում է, որ ցեղային խտրականությունն այսօր դարձել է համաշխարհային հարց և, հետևաբար, պարտավորեցնում է ԵՀԽ-ին իր ապագա գործունեության ծրագրի մեջ հատուկ տեղ հատկացնել այդ հարցին: Հարավային Աֆրիկան, որ ցեղային խտրականությունը դրսևորվում է իր ամենալայն թափով, պետք է ԵՀԽ-ի անդամ եկեղեցիների առաջնահերթ ուշադրության առարկա դառնա: Ապարտեիդի քաղաքա-

կանությունը, ընդգծվում է բանաձևում, այդ երկրում հնարավոր չի լինի, եթե չվաճելի տեղի մեծ թվով քրիստոնյաների աջակցությունը: Եկեղեցիներն իրենց բոլոր միջոցներով պետք է աշխատեն կասեցնել զենքերի առաքումը Հարավային Աֆրիկա, պետք է պայքարեն, որպեսզի անհապաղ դադարեցվի Հարավ-աֆրիկյան պետության ֆինանսավորումը որոշ կառավարությունների և միջազգային արդյունաբերական խոշոր ընկերությունների կողմից, որոնք մասնակցում են ջերմամիջուկային գործարանների կառուցմանը այդ երկրում: Եկեղեցիներն իրենց ուշադրության առարկա պետք է դարձնեն նաև Հյուսիսային և Հարավային Ամերիկաների սևամորթ բնակչության, Ավստրալիայի և Նոր Զելանդիայի տեղաբնիկների, ինչպես նաև եվրոպական երկրներում աշխատող գաղթականների նկատմամբ գործադրվող ցեղային խտրականության մասնավոր դեպքերը: Մյուս կողմից՝ ամբողջ աշխարհի եկեղեցիները պետք է հսկեն, որ հեռավոր երկրներում ցեղային խտրականության վերացման համար իրենց գործադրած ջանքերի մեջ մոռացության չտան իրենց սեփական երկրներում դրսևորվող ցեղային խտրականության երևույթները հաղթահարելու անհրաժեշտությունը:

Համաժողովն իր աշխատանքների մեջ լայն տեղ հատկացրեց զինաթափման հարցին: Այդ հարցի վերաբերյալ ընդունված հայտարարության մեջ նշվում է, որ համաշխարհային երկրորդ պատերազմից երեսուն տարի հետո սպառազինությունը հասել է աննախընթաց մակարդակի: Վերջին տարիներին սպառազինությունների մրցավազքը սահմանափակելու ուղղությամբ պետությունների կողմից գործադրված ջանքերը հանգեցին այդ բնագավառում մի շարք համաձայնագրերի ստորագրման: Այդ համաձայնագրերն անշուշտ որոշ չափով նրպաստեցին քաղաքական կլիմայի առողջացմանը: Այդ տեսակետից առանձնապես նշանակալից եղավ Եվրոպայի անվտանգության և համագործակցության վերաբերյալ Հելսինկիի պայմանագիրը, որ եկեղեցիները դիտում են որպես հուսա նշան այսօրվա պատակտված աշխարհում: Եկեղեցիները պետք է համարձակորեն բարձրացնեն իրենց ձայնը հանուն արդյունավետ զինաթափման և ի նպաստ այն բանի, որ ժողովուրդները ցանկանում են և կարող են ապրել առանց այդ զենքերի պաշտպանության:

Համաժողովը հանձնարարեց ԵՀԽ-ի կենտրոնական կոմիտեին անհրաժեշտ մի-

չոցներ ձեռք առնել՝ կազմակերպելու մի խորհրդակցություն, որի նպատակը լինի արգելք հանդիսանալու ռազմական ծախսերի աճին և միաժամանակ նախապատրաստել, ՄԱԿ-ի հովանավորության ներքո, համաշխարհային մակարդակով մի կոնֆերանս զինաթափման վերաբերյալ:

Մերձավոր Արևելքի դրության վերաբերյալ համաժողովն իր ընդունած փաստաթղթերում լուրջ մտահոգություն էր հայտնում այդ շրջանում օրավոր զարգացող ռազմական իրադարձությունների նկատմամբ՝ դրանք համարելով ծանր պատմալիք համաշխարհային խաղաղությանը: Փաստաթուղթը պաշտպանում էր մերձավորարևելյան տագնապի խաղաղ կարգավորման նպատակին ուղղված Անվտանգության խորհրդի հայտնի բանաձևի գործադրման անհրաժեշտությունը որպես հուսալի երաշխիք այդ շրջանում կայուն խաղաղության ապահովմանը: «Խաղաղությունը Մերձավոր Արևելքում, — նշված էր փաստաթղթում, — պետք է հիմնված լինի արդարության և շահագրգռված բոլոր կողմերի անվտանգության վրա: Նրանցից յուրաքանչյուրի բարօրությունը կախված է բոլորի բարօրությունից»:

Անդրադառնալով Երուսաղեմի հարցին, համաժողովն անհրաժեշտ համարեց շեշտել, որ աշխարհի միլիոնավոր քրիստոնյաների և միաստվածյան մյուս քույր երկու մեծ կրոնների՝ մահմեդականության և հուդայականության հետևորդների համար Երուսաղեմը միշտ մնում է որպես ներշնչման և կրոնական խոր ապրումների աղբյուր, և հետևաբար նրանց է վերապահված ստեղծումը այնպիսի պայմանների, որոնք թույլ տալին վերոհիշյալ երեք կրոններից յուրաքանչյուրի հետևորդների համար Երուսաղեմը դարձնել մի՝ բաց քաղաք, որտեղ նրանք կարողանային հանդիպել միմյանց և ապրել միասին: Մյուս կողմից՝ համաժողովն ընդգծեց, որ Երուսաղեմում և նրա շրջակայքում գտնվող քրիստոնեական սուրբ վայրերը մեծ մասամբ պատկանում են ԵՀԽ-ի անդամ եկեղեցիներին: Համաձայն սուրբ վայրերի վերաբերյալ հաստատված ստատուկվոյի, ոչ մի եկեղեցու իշխանություն, ինչպիսի դավանության էլ այն պատկանի, չի կարող հավակնել, որ ինքն է միայն ներկայացնում քրիստոնեական տեսակետը, և ոչ էլ այն արտահայտել բոլոր քրիստոնյաների անունից: Բացի այդ, համաժողովի կողմից ընդունված փաստաթուղթում ստված է. «Երուսաղեմի հարցը չի սահմանափակվում միայն սուրբ վայրերի պաշտպանությամբ: Այն օրգանապես կապ-

ված է մեր ժամանակի հավատալիքների և սուրբ քաղաքում ապրող համայնքների կյանքի հետ... Երուսաղեմի ապագա ստատուսի հաստատման հարցը պետք է քննվի Մերձավոր Արևելքի տագնապի կարգավորման շրջանակի մեջ՝ ամբողջությամբ վերցրած»:

Համաժողովը հանձնարարեց, որ Երուսաղեմի վերաբերյալ բոլոր հարցերը խորապես ուսումնասիրվեն այդ հարցով ուղղակիորեն շահագրգռված անդամ եկեղեցիների կողմից՝ հոռմեական կաթոլիկ եկեղեցու և մահմեդական ու հրեա կրոնական կազմակերպությունների հետ միասին:

ԵՀԽ-ի գործադիր կոմիտեի հանձնարարությամբ համաժողովի կողմից ԵՀԽ-ի անդամ ընտրվեցին ութ եկեղեցիներ, իսկ յոթ այլ եկեղեցիներ դարձան ԵՀԽ-ի գործակից անդամներ:

Համաժողովի քննարկմանը ներկայացվեց նաև ԵՀԽ-ի ապագա գործունեության ծրագիրը մշակող կոմիտեի պատրաստած զեկուցագիրը, որն իր մեջ ընդգրկում էր երեք հիմնական ուղեգծեր, որոնց պետք է հետևեր Եկեղեցիների համաշխարհային խորհուրդը իր առաջիկա գործունեության ընթացքում: Համաժողովը հաստատեց մեծամասնապես ԵՀԽ-ի բարեփոխված կանոնադրության նախագիծը, որ կազմվել էր կանոնադրությունը քննարկող կոմիտեի կողմից և ներկայացվել ընդհանուր ժողովի հավանությանը:

Համաժողովի աշխատանքներին զուգընթաց հաշ եկեղեցու ներկայացուցիչներն ունեցան առանձին տեսակցություններ, խլմբական հանդիպումներ ու խորհրդակցություններ համաժողովին մասնակցող մի շարք եկեղեցիների պատվիրակությունների հետ: Դրանցից կարևորագույնը արևելյան ուղղափառ եկեղեցիների ներկայացուցիչների հետ նրանց ունեցած հանդիպումն էր: Հանդիպման ընթացքում քննարկվեց արեւելյան քույր եկեղեցիների ներկայացուցիչների միջև առաջիկայում ոչ պաշտոնական մի խորհրդակցություն գումարելու կարելիությունը, խորհրդակցություն, որի նպատակը լինեք ուսումնասիրել վերոհիշյալ եկեղեցիները հուզող եկեղեցական, կանոնական, միջեկեղեցական բնույթի մի շարք հարցեր և, միաժամանակ, նախապատրաստել հետագայում արևելյան ուղղափառ եկեղեցիների պետերի հանդիպումը: Պատվիրակությունների անդամների միջև զույսցավ սկզբունքային համաձայնություն, որ սույն խորհրդակցությունը տեղի ունենա Մայր Աթոռ ս. Էջմիածնում՝ Ամենայն Հայոց կաթողիկոսի հրավերով:

Համաժողովի վերջին օրերին տեղի ունեցան ԵՀԽ-ի ղեկավար մարմինների ընտրությունները: Առաջին հերթին ընտրվեց ԵՀԽ-ի նոր նախագահության կազմը: Ըստ ԵՀԽ-ի սահմանադրության, նախագահության անդամների պաշտոնավարության շրջանը տևում է համաժողովից համաժողով, առանց վերընտրության իրավունքի: Վեց հոգուց բաղկացած նոր նախագահության անդամներ ընտրվեցին՝ Լենինգրադի և Նովոռոդի միտրոպոլիտ Նիկողիմը՝ ռուս պապականության եկեղեցուց, Սինթա Ուեդելը՝ Ամերիկայի եպիսկոպոսական եկեղեցուց, արքեպիսկոպոս Օ. Սրնդիկին՝ Օվկիդիայի լուսեռական եկեղեցուց, Ժ. Միգել-Բոնինոն՝ Արգենտինայի մեթոդական եկեղեցուց, գեներալ Տ. Բ. Սիմատուպանը՝ Ինդոնեզիայի վերակազմյալ ավետարանական եկեղեցուց, և Աննի Զիաջեն՝ Գանայի վերակազմյալ ավետարանական եկեղեցուց:

Համաժողովը միաձայնությամբ ԵՀԽ-ի պատվո նախագահ վերընտրեց Էկումենիկ շարժման բազմամյա գործիչ, ԵՀԽ-ի նախկին գլխավոր քարտուղար դոկտ. Վիսենտե Հուֆթին:

Դեկտեմբերի 6-ին տեղի ունեցավ նաև ԵՀԽ-ի ապագա գործունեությունը ղեկավարող գլխավոր մարմին՝ կենտրոնական կոմիտեի ընտրությունը: 128 հոգուց բաղկացած նոր կենտրոնական կոմիտեի կազմում Մայր Աթոռն ունեցավ երկու ներկայացուցիչներ՝ հանձնիմա տ. Ծաֆե արքեպիսկոպոս Աճեմյանի և տ. Արսեն եպիսկոպոս Բերբերյանի:

Համաժողովի օրերին պատվիրակությունների անդամները առիթ ունեցան ներկա լինելու եկեղեցական արարողությունների, տեղական եկեղեցիներում կազմակերպված Էկումենիկ աղոթքների, իրենց պատվին տրված զանազան պաշտոնական ընդունելությունների, ինչպես նաև այցելելու քաղաքի տեսարժան վայրերը: Հիշատակության արժանի է Քենիայի Հանրապետության նախագահ Ջոմո Բենիաթայի տված բացօթյա ընդունելությունը նախագահական պալատի ընդարձակ հրապարակում: Քենիայի զանազան ցեղախմբերի պատկանող երկսեռ պարախմբեր, իրենց ավանդական գույնզգույն տարազներով և աֆրիկյան զարդարանքներով, ավելի քան մեկ ժամ տողանցեցին և առանձնահատուկ ծողովրդական պարեղանակներով ու կշռությամբ շարժումներով ներկաներին ցույց տվեցին իրենց ցեղային պարերը: Համաժողովի նախագահի և ԵՀԽ-ի գլխավոր քարտուղարի ողջույնի ելույթներից հետո Քենիայի Հանրապետության նախագահը

բոլոր պատգամավորներին ողջեց քարկալության սրտագին ու ջերմ մի ուղերձ՝ նախ տեղական առանձին լեզվով, ապա անգլերենով:

Դեկտեմբերի 10-ի երեկոյան համաժողովն ավարտեց իր աշխատանքները:

Հետևյալ օրը տեղի ունեցավ նորընտիր կենտրոնական կոմիտեի առաջին ժողովը, որը գումարեց երկու միաս: Երկրորդ միասի ընթացքում կենտրոնական կոմիտեի կազմից ընտրվեց ԵՀԽ-ի նոր գործադիր մարմինը: Կենտրոնական կոմիտեի նախագահ ընտրվեց Կանադայի անգլիկան եկեղեցու արքեպիսկոպոս Էդուարդ Սքոթը:

Այսպիսով, երեք շաբաթվա լարված աշխատանքից հետո, փակվեց քրիստոնեության պատմության մեծագույն դեպքերից մեկը լինելու կոչված սույն համաժողովը:

ՄԱՅՐ ԱԹՈՌԻ ՊԱՏՎԻՐԱԿՆԵՐԸ ԵԳԻՊՏՈՍՈՒՄ

Մայր Աթոռի պատվիրակները Նայրոբիից հալոնքի վերադարձի ճանապարհին, համաժողովին մասնակցած այլ քույր եկեղեցիների պատվիրակությունների հետ, Եգիպտոսում մի քանի օրով հյուրը եղան դպրական եկեղեցու պետ Նորին Ամենապատվություն Ծենուդա Գ. Պատրիարքի:

Հայ եկեղեցու պատվիրակությունը, որի կազմում էին տ. Ծաֆե, տ. Արսեն սրբազանները և Պարզև Ծաֆազյանը, Կահիրե ժամանեցին դեկտեմբերի 12-ին և դիմավորվեցին Կահիրեի ազգային-եկեղեցական իշխանությունների ներկայացուցիչների կողմից:

Դեկտեմբերի 13-ին, շաբաթ օրը, հայ եկեղեցու պատվիրակությունը, ընկերակցությամբ Եգիպտոսի հայոց առաջնորդական տեղապահ տ. Ներսես ծայրագույն վարդապետ Բապունյանի և Կահիրեի հայոց թեմական խորհրդի անդամ պր. Հովհաննես Քեհյալանի, պաշտոնական այցելություն տվեց Կահիրեի դպրոցների պատրիարքարան՝ Նորին Ամենապատվություն Ծենուդա Գ-ին, որը ջերմորեն ողջագուրվեց հայ եկեղեցու ներկայացուցիչների հետ:

Սույն այցելության առիթով տ. Ծաֆե արքեպիսկոպոս Աճեմյանն Ամենայն Հայոց Հայրապետի եղբայրական սրտագին ողջույնները հաղորդեց Նորին Ամենապատվությանը, որը, իր հերթին, հուզումով հիշեց իր այցելությունը Մայր Աթոռ ս. Էջմիածին՝ Հայոց Հայրապետին, և խնդրեց փոխադարձաբար իր եղբայրական սիրո զգացումները հաղորդել Նորին Սրբությանը:

Այնուհետև երկու քույր եկեղեցիների բարձրաստիճան հոգևորականների միջև տեղի ունեցավ ջերմ գրույց, որի ընթացքում Նորին Ամենապատվությունը կարևորությամբ անդրադարձավ երկու քույր եկեղեցիների հարաբերությունների վրա՝ ցանկություն հայտնելով, որ այդ հարաբերությունը մեր օրերում է՛լ ավելի սերտանան Էկումենիկ ոգով, աստվածաբանական, վարդապետական դիպլոմների միջոցով, ինչպես այդ պատահել էր այս տարի, սեպտեմբերին, ս. Էջմիածնում կայացած միջեկեղեցական ժողովի առիթով:

Ղեցիների համաշխարհային խորհրդի՝ Նայրոբիում գումարված հինգերորդ համաժողովի արդյունքների և այդ համաժողովում հայ եկեղեցու մասնակցության մասին՝ շեշտելով համաժողովի կարևոր նշանակությունը մեր օրերի քրիստոնեական եկեղեցիների պատմության մեջ, հօգուտ եկեղեցիների ապագա ցանկալի միության և աշխարհի խաղաղության:

Նույն օրերին Կահիրեում էր գտնվում նաև, որպես հյուրը Ծեմուդա Գ Սրբազան Պատրիարքի, ուս պրավոսլավ եկեղեցու պատվիրակությունը՝ գլխավորությամբ Լե-



Ձեռնադրությունից մի պահ

Դեկտեմբերի 14-ին, կիրակի օրը, Կահիրեի հայոց ս. Գրիգոր Լուսավորիչ եկեղեցում ս. պատարագ մատուցեց տ. Զավեն եպիսկոպոս Չինչինյանը և կատարեց երեք սարկավագների ձեռնադրությունը՝ իր խրատական քարոզի մեջ վեր հանելով այդ արարողության հոգևոր, ազգային նշանակությունը թեմի եկեղեցական կյանքի համար:

«Տէր, ողորմես»-ից առաջ քարոզեց նաև տ. Ծահե արքեպ. Աճեմյանը, որը նախ Ամենայն Հայոց կաթողիկոս Վազգեն Ա Վեհապատ Հայրապետի ողջույններն ու օրհնությունը հաղորդեց եգիպտահայությանը, ապա հանգամանորեն խոսեց Եկե-

նիզարդի և Նովգորոդի միտրոպոլիտ Նիկողիմ արքեպիսկոպոսի:

Դեկտեմբերի 15-ին, երկուշաբթի օրը, երեկոյան ժամը 18-ին, Կահիրեի հայոց ազգային-եկեղեցական իշխանությանց սրբտագին հրավերով, հայոց ս. Գրիգոր Լուսավորիչ եկեղեցի այցելեց ուս եկեղեցու պատվիրակությունը, որը հանդիսավորապես դիմավորվեց տ. Ծահե, տ. Զավեն, տ. Արսեն արքագանների, տ. Ներսէս ծայր. վարդապետի, եկեղեցու քահանա հայրերի, թեմական և քաղաքական ժողովների անդամների, երեսփոխանների, եկեղեցու տիկնանց հանձնախմբի ու հայ մամուլի ներկայացուցիչների կողմից, և ապա տաճարի

գանգերի դողանքների ներքո «Հրաշափառ»-ով մուտք գործեց եկեղեցի, ուր տեղի ունեցավ Էկումենիկ աղոթք։ Արարողության ավարտին, հանուն եգիպտահայ համայնքի, առաջնորդական տեղապահ հայրուորքը ֆրանսերեն մի ուղերձով ողջունեց ներկայությունը տ. Նիկողոսի միտրոպոլիտի և ռուս եկեղեցու պատվիրակության մյուս անդամների՝ շեշտելով հայ և ռուս եկեղեցիների դարավոր բարեկամության կարևորությունը նաև մեր օրերին՝ Էկումենիկ շարժման այս ժամանակաշրջանում, բարեկամություն, որն է՛լ ավելի է ամրապնդվում Ամենայն Հայոց Հայրապետ Նորին Սրբություն Ս. Ս. Վազգեն Ա.-ի և ռուս պապության և եկեղեցու պետ Նորին Սրբություն Պիմեն Պատրիարքի գահակալության օրերին՝ հոգուտ քրիստոնեական եկեղեցիների սերտ համագործակցության, ժողովուրդների բարեկամության և աշխարհի խաղաղության։

Տ. Նիկողոսի միտրոպոլիտն իր հերթին ռուսերեն մի ուղերձով շնորհակալությամբ և երախտագիտությամբ պատասխանեց տ. Ներսեն ծայրագույն վարդապետի ողջույնի խոսքին, ջերմ գոհունակություն հայտնեց իր և ռուս եկեղեցու պատվիրակության հանդեպ Կահիրեի հայ համայնքի կողմից ցույց տրված եղբայրական այս սիրալիր վերաբերմունքի համար՝ վեր հանելով մամական Մայր Աթոռ սուրբ Էջմիածնի օրհնության ներքո և Ամենայն Հայոց կաթողիկոս Վազգեն Ա.-ի հովվապետության օրով հայ եկեղեցու կատարած քրիստոնեական, մշակութային, հայրենասիրական ու խաղաղասիրական առաքելությունը հայ ժողովրդի ծոցում։ Տ. Նիկողոսի արքեպիսկոպոսը նույնքան կարևորությամբ անդրադարձավ մեր օրերին, հանուն ժողովուրդների եղբայրության և աշխարհի խաղաղության, ռուս և հայ եկեղեցիների համագործակցության և նրանց միջև քրիստոնեական կապերի ամրապնդման անհրաժեշտության։

Այնուհետև ռուս եկեղեցու պատվիրակությունն առաջնորդվեց տեղի հայոց առաջնորդարանի ընդունելությանը դահլիճ, ուր

տեղի ունեցավ ջերմ ընդունելություն և հյուրասիրություն՝ ի պատիվ հյուրերի։

Այստեղ ևս տ. Նիկողոսի միտրոպոլիտն ու տ. Ծաֆե արքեպիսկոպոսը ողջույնի և բարիգալատյան ջերմ խոսքեր փոխանակեցին ռուսերեն և ֆրանսերեն լեզուներով, որոնք կրկին անգամ արտահայտում էին հայ և ռուս եղբայրական ժողովուրդների, ինչպես նաև երկու եկեղեցիների միջև գոյություն ունեցող անքակտելի բարեկամությունը, մանավանդ մեր ազգային հայրենական վերածննդի այս օրերին։

Դեկտեմբերի 16-ին, երեքշաբթի օրը, տ. Ծաֆե արքեպիսկոպոսը վերադարձավ Երուսաղեմ, իսկ տ. Արսեն եպիսկոպոսը և Պարզե Ծաֆազյանը, տ. Զավեն եպիսկոպոսի ողջկցությամբ, մի քանի օրով այցելության մեկնեցին Ալեքսանդրիա։

Դեկտեմբերի 20-ին հայ եկեղեցու պատվիրակները վերադարձան Կահիրե։


Հետևյալ օրը, դեկտեմբերի 21-ին, տ. Արսեն եպիսկոպոսը պատարագեց և քարոզեց Կահիրեի հայոց ս. Գրիգոր Լուսավորիչ եկեղեցում։

Կահիրեում և Ալեքսանդրիայում գտնվելու օրերին հայ եկեղեցու պատվիրակները հանգամանորեն հետաքրքրվեցին թեմի եկեղեցական, ազգային, մշակութային կյանքով, այցելեցին տեղի հայ մշակութային կենտրոնները, ջերմ միջնորդություն հանդիպումներ և զրույցներ ունեցան եգիպտահայ համայնքի ազգային իշխանությանը ներկայացուցիչների ու ժողովրդի հետ և իրենց դասախոսություններով խանդավառեցին եգիպտահայությանը։

Դեկտեմբերի 21-ին Մայր Աթոռի պատվիրակները հրաժեշտ տվեցին տ. Զավեն եպիսկոպոսին, Եգիպտոսի հայոց առաջնորդական տեղապահ տ. Ներսեն ծ. վարդապետին, ազգային-եկեղեցական մարմինների ներկայացուցիչներին և լավագույն տպավորություններով վերադարձան Մայր Աթոռ այն համոզումով, որ այսօր էլ եգիպտահայ տիրախմամ թեմը գտնվում է եկեղեցական, ազգային, մշակութային իր կենսունակության մեջ։

ՊԱՐԳԵՎ ԾԱՀԱՍԶՅԱՆ





ԲՈՎԱՆԴԱԿՈՒԹՅՈՒՆ

Հայրապետական քարոզ Փրկչի հրաշափառ և սուրբ Ծննդյան տոնի առթիվ Մայր տաճարում	3
ԽՄԲԱԳՐԱԿԱՆ—Ա. Հ.—Ամանորի և սուրբ Ծննդյան խոհեր	6
Ամանորի և Փրկչի հրաշափառ և սուրբ Ծննդյան տոների առթիվ Ամենայն Հայոց Ծայրագույն Պատրիարք և կաթողիկոս, Նորին Սուրբ Օծություն Տ. Տ. Վազգեն Ա. Հայրապետի և քույր եկեղեցիների հոգևոր պետերի ու կրոնական այլ համայնքների և կազմակերպությունների ղեկավարների միջև փոխանակված ողջույնի հեռագրերն ու գրությունները	9
Ամենայն Հայոց Վեհափառ Հայրապետի շնորհավորական գիրը Ամանորի և սուրբ Ծննդյան տոների առթիվ՝ ուղղված Հայաստանյայց եկեղեցու միության և կազմակերպության երեք Աթոռներին, թեմակալ բոլոր առաջնորդներին և եկեղեցական համայնքներին	12
Նոր տարվա առթիվ փոխանակված հեռագրեր Ամենայն Հայոց Վեհափառ Հայրապետի և պետական անձնավորությունների միջև	14
Հայրապետական հանդիսավոր ու պատարագ և քարոզ Մայր տաճարում՝ Փրկչի հրաշափառ Ծննդյան տոնի առթիվ	16
Ա. Հ.—Ամանորյա և սուրբ Ծննդյան հանդիսություններ Մայր Աթոռում	17
Ա. Հ.—Ընդունելություն Վեհաբանում՝ ի պատիվ Մայր Աթոռին աղբյուր ճարտարապետների հանձնաժողովի	21
ՄԱՅՐ ԱԹՈՐՈՒՄ—Եկեղեցական բեմ. լուրեր	23
ԳՐԻԳՈՐ ԱՐԾԱԿԻ ՀԱԿՈԲՅԱՆ—Կոմիտաս կաթողիկոսի «Անձինք մուրիեպը» շարականը	25
ԳՐԲԵՐԻ ՀԵՏ—Ա. Հ.—«Մանապարհորդություն Մեսրոպյ Դ. Թաղիադեանց Վ. Ա. տարկատագի սրբոյ Էջմիածնի ի Հաջա»	31
Լ. ՀԱԶՏԱՆ—Գաթրիել արքեպիսկոպոս Այվազյանը Ի. Ա. Կոիլովի առակների թարգմանիչ	36
Հ. Մ. ԲԱՐԹԻԿՅԱՆ—Մամիկոնյան (՝) սուրբ Մարիամ Նորավկայի (+902—908 թթ.) բյուզանդական վարքը	42
Եզնիկ վարդապետ Պետրոսյան	50
Թեմական պատգամավորական ընտրություններ եգիպտահայ տիրախնամ թեմում	52
ՊԱՐԳԵՎ ԸԱՀԱԶՏԱՆ—Եկեղեցիների համաշխարհային խորհրդի հինգերորդ համաժողովը	54

ԽՄԲԱԳՐՈՒԹՅԱՆ ՀԱՍՑԵՆ

ՀԱՅԿԱԿԱՆ, ՍՍՀ, ԷՋՄԻԱԾԻՆ

«ԷՋՄԻԱԾԻՆ» ԱՄՍԱԳՐԻ ԽՄԲԱԳՐՈՒԹՅՈՒՆ

Армянская ССР, Эчмиадзин, Редакция журнала «Эчмиадзин».
Rédaction de la revue «Etchmiadzine», Etchmiadzine. Arménie, URSS

Հանձնված է արտատրության 4/I 1976 թ.: Ստորագրված է տպագրության 13/II 1976 թ.:
Տպագրական 4 մամուլ + 3 ներդիր, թուղթ 60×84¹/₈, պատվեր 4

Մայր Աթոռ ու Էջմիածնի տպարան, 1976 թ.